

39214

LE

CHAVVE

OV LE

MESPRI


DES

CHEVEUX.

PAR

JEAN DAN

ALBIGEOIS.



A PARIS,

Chez PIERRE BILLAINE Rue S.  
Jacques à la bonne Foy.

*Avec Privilege du Roy.*

M, D, C. XXI.

1851

18

CHAVE

OV

ME 3-18-18

DE

CHAVE

LEANDRO

ALBINO



1851

CHAVE

ALBINO

CHAVE

ALBINO



# EPISTRE AU LECTEUR.



*Ly a environ deux ans  
qu'on me fit voir en ceste  
Ville, ie ne sçay si ie dois  
dire ou vne traduction  
ou vne corruption Fran-  
çoise de l'oraison Grecque que Synesius  
a composée à la louange des Chaues.  
Le personnage qui l'auoit en main m'as-  
seura auoir appris de bonne part, comme  
le traducteur possedé de ie ne sçay qu'el-  
le passion, n'auoit mis son travail au  
iour que sur l'esperance qu'il auoit con-  
ceüe d'empescher mon Chauue (duquel il  
auoit ouy quelque sourde nouvelle) de*


jouyr du mesme aduantage: s'estant peint  
en la phantasie, qu'il n'oseroit paroistre  
sur le theatre public, comme celuy qui  
n'estoit riche que des despoilles d'au-  
truy, Et sur tout de l'auteur ia nommé.  
Cela me piqua Et comme il suffit de  
peu de chose à nous alterer Et nous fai-  
re changer d'aduis: ie resolu d'exposer à  
ta censure, Et produire en pleine lu-  
miere celuy que i'auoy long temps au  
parauant pour sa laideur condamné  
aux tenebres perpetuelles Et à l'oubli.  
Le voicy deuant toy, tu verras que ce  
qu'il a de Synesius n'est rien moins que  
pillerie ou larcin: puis que le nom de l'au-  
teur n'y est point oublié, lequel, si ie ne  
me trompe, tu trouueras autant de fois  
qu'il le faut, ou à la marge, ou dans le  
corps du discours. S'il y a d'autres escri-  
uains Grecs ou Latins, Anciens ou  
Modernes qui se soyent esbattus sur le  
mesme subject, ie t'aduisse Et t'assure

qu'ils me sont iusqu'à present incogneus.  
Car quant à ceux qui ont escrit du poil  
Phyſiologiquemēt et en Naturaliſtes,  
c'eſt tout autre choſe : leur ſin & leur  
deſſeing ſont bien differents des miens.  
Ils tirent vers le Nord et ie tends  
vers le Sud : tant nos routes ſont eſloi-  
gnées voire contraires. En ſomme ie  
maintiens ceſt enfant, ou ceſt auorton  
(appelle-le comme tu voudras) parfait-  
tēment mien. Mais à quel propos me  
donne ie tant de peine à te diſpoſer à  
croire qu'il eſt à moy ? ſes foibleſſes, ſes  
imperfections, & ſes deſſauts ne le deſ-  
couurent que trop : et ceux qui cognoiſ-  
ſent mon eſprit ; n'auront ſi toſt ietté  
l'œil deſſus, qu'ils ne luy appliquent le  
vers ancien, & ne dient, Ce n'eſt le  
fils d'Achille, mais luy meſme :  
tant ils trouueront remarquable le rap-  
port et la reſſemblance qui eſt entr'eux.  
Mais au reſte plus il eſt foible, plus ſes

foibleſſes obligent ta courtoisie à le ma-  
nier doucement et de la sorte qu'on  
manioit iadis les vases Samiens si fres-  
les et delicats, de peur que de mesme  
qu'eux, il ne se casse entre tes mains. Es-  
pargne le de grace: aussi bien ne ſçauroys  
tu trouuer que fort peu à tondre sur vn  
Chaue comme luy. Si tu es des Chau-  
ues ta faueur luy doit desia estre toute  
acquise: si tu ne l'es pas, attens sans t'es-  
mouuoir ce que le temps t'amenera: car  
tu ne ſçauois te promettre de ne deuoir  
quelque iour estre de ceste bande. Et  
puis tu n'aurois pas bonne grace de te  
mettre en cholere contre mon caprice: la  
matiere en est trop legere. Tu vois bien  
qu'il ne s'agit icy ny de la religion, ny  
de l'estat, ny de ton patrimoine. Il  
n'est question que d'un poil. En vn mot  
meſ que tu ſois, ou chaue ou chenelu, si tu me  
demãdes cõmẽt est-ce que ie desire estre  
traictẽ de toy: ie ne diray pas, royalle.

ment, ainsi que Porus à Alexandre : car  
ie ne suis pas Roy comme luy, ny toy pa-  
raventure : mais ie diray , humaine-  
ment: car ie suis homme et tu l'es aussi,  
cela comprend tout, Adieu.

A iiii





# LE CHAVVE

## OV LE MESPRIS

### DES CHEVEVX.



GESILAVS s'esmerueilloit que de son temps on fist tant de cas de ceux qui nourrissoient des cheuaux pour enuoyer aux courses des ieux Olympiques, & conseilloit a sa sœur d'y aller elle mesme disputer le prix pour faire voir la vanité de cest exercice. Diogene trouuoit estrange qu'on achetaist vne statue trois mille drachmes, & qu'on eust vne bonne mesure de farine pour deux ou trois oboles. Demosthene s'estonnoit qu'on prisast Philippe Roy de Macedone pour estre grand beueur, qui est la qualité d'une esponge. Caton n'estoit pas moins estahli de voir que de son âge, vn poisson se ven-

dist plus qu'un bœuf. Ainsi de temps en temps il s'est trouué des personnages eminents en sagesse par dessus les autres qui ont admiré la sottise du peuple luy voyant priser quelque chose qui ne le valoit pas. Reuez au monde, belles & grâdes âmes, sortez de vos tombes poudreuses rares & precieuses testes, & vous sortirez bien tost de cest estonnement, pour entrer en un plus iuste. Combien facilement, si les destins vous permettoient de reuoir nostre iour, vostre esprit se porteroit il dâs l'extase, quand vous verriez le poil, la plus basse honte de nature, les cheveux, la plus abjecte la plus vile, & la plus contemptible des choses, estre non seulement estimez, & prizez, mais honnorent mesme iusque a l'idolatrie. Ie sçay qu'ès siecles vieux il y a eu des effeminez qui ne les ont eu que trop en estime, & qui ne l'ont que trop tesmoigné par la peine, & le temps qu'ils employoyent à les renger: Mais ie sçay bien aussi que ce qu'ils en faisoient n'estoit rien, au pris de ce qui s'en pratique en nos iours. Mille preuues me fauorisent, apres lesquelles si ie vouloy

m'amuser, ie me rendroys sans besoing  
outre mesure ennuyeux. Il me suffira de  
remarquer en passant, que quand les  
Anciens Grecs vouloyent faire conce-  
uoir vne dispute d'une chose de neant,  
ils auoyent accoustumé de dire que c'e-  
stoit le debat d'un poil: prouerbe telle-  
ment en vogue parmy eux, qu'il a bien  
malgré tant de siecles qui ont roulé  
depuis, eu la force de se maintenir en-  
tier, & de passer mesme iusques à nous,  
puis que nostre triquenique, ne signifie  
autre chose, que le debat d'un poil.  
Ainsi disons nous vn homme de trique-  
nique, lors que par mespris nous vou-  
lons qualifier vn homme de nulle va-  
leur. Il est vray que ce que ces sages an-  
ciens disoyent pariugement, & par co-  
gnoissance, nous le disons seulement  
par coustume & par ignorance, raualans  
de bouche & sans y penser, ce que nous  
prisons en effect & du meilleur du cœur.  
Les Latins n'ont pas esté d'autre aduis  
que les Grecs quant au mespris de ce-  
ste ordure: tesmoing leur forme de par-  
ler si vsitee, estimer quelque chose vn  
poil, cest a dire la mettre presque au des-

sous du neant. Et quand à moy bien que ie m'esmerueille à tous les coups comment vn subject si mesprisable peut estre si prisé, considerant toutesfois combien les hommes d'aujourd'hui ont le goust malade, & ne trouuant que trop sortable au desreglement de nostre âge l'extrauagance d'une telle humeur, ie destourne aussi-tost ma consideration de cest object, pour me mettre à penser, que de tant de beaux esprits du temps passé, lesquels pour faire valoir la force de leur bien dire ont pris à louer, qui la peste, qui la pauureté, qui vn Busyre, qui vn TherSITE, qui vne mouche, & qui quelque autre telle chose moins digne d'estre louée: s'il s'est trouué quelcun qui ait entrepris les loüanges du poil, puis qu'au monde il ne se peut rencontrer vn subject plus maigre, plus bas, ny plus sterile, ny par consequent plus propre à faire esclatter la suffisance & l'adresse d'un habile orateur: celuy-là me semble auoir par dessus tous les autres fait autant paroistre son iugement, ayant si bien choisi & l'ayant loué à ce dessein: comme il auroit fait paroistre son im-

*Mespris des Cheueux.* S

pertinence, s'il l'eust loüé pour l'en estimer digne.

Aussi ne plus ne moins que celuy qui iadis s'alloit temerairement engager dans les loüanges d'Hercule de qui le merite estoit si clair & si fameux au monde, fust aussi tost arresté, oyant qu'avec admiration on luy demanda, qu'il le blasme ? De mesme quiconque entreprendra de raualer le poil, au lieu d'auoir subiect de craindre que matiere luy defaille, il deueroit seulement auoir peur, que par mocquerie on luy demandast, qu'il l'estime ? si l'erreur & l'aveuglement des ames d'aujourd'huy ne l'affranchissent de ceste apprehension. Car autant qu'il est malaisé de dire quelque chose qui vaille en le loüant : autāt seroit il superflu de gaster & l'ancre & le papier a le mesestimer, si ces iugemens detraquez qui prient les cheueux & mesprient les Chauues n'en rendoyent le blasme vtile & le mespris necessaire.

Mais voyez ie vous prie, la vanité de l'homme ! ô argile orgueilleuse, ô superbe poussiere, nature t'a couronnée d'une saleté, pour abbatre ta folle arrogan-

ce & te faire entrer dans le mespris de toy-mesme, non pas en abaissant tes regards iusques à tes pieds comme le Pan, mais en esleuant ta consideration vers ta teste : & voicy que ton impertinence est telle, qu'on te void tout bouffi du vent d'vne sotte gloire, pour te voir sur le front vn cimier de honte, vn thymbre de reproche & de des-honneur : n'est ce pas de la sorte qu'un fol se contenteroit de son chaperon verd garni d'oreilles & de sonnettes ?

Et quoy, vn vil excrement donc, vne puante fumee, vne suye inutile, que nature chasse hors du corps pour conseruer la vie & la santé : vne superfluité qui n'a vie, nourriture, ny sentiment, & qui prouient, s'entretient & s'augmente du fortuit abord d'une sale matiere, pourra-t'elle apporter quelque gloire legitime à vn homme bien sensé ? en pourra-il tirer de la satisfaction sans qu'il se des-honore ? pourra-il se faire croire que pour auoir plus de poil il ait quelque aduantage sur les autres hommes, si ce n'est qu'au mesme instant luy mesme cedela presseance aux ours & aux san-

guers, qu'il leur defere la palme & loge son merite bien loing derriere le leur: puis que ces lourds animaux le deuantent en cestepartie d'une si grande distance. Ce qui n'arriue pas à l'aduanture: mais bien ceste sage nature( ce nous dit le docte Chauue de Cyrene ) a elle trouué bon, que son chef d'œuure, l'homme, le plus noble & le plus accort de tous les animaux fust aussi le plus nud & le plus net de ces superfluitez mortes & inutiles: nayant pas iugé à propos qu'il en fut entierement depouillé, de peur qu'il s'enorgueillist par trop, s'il n'auoit aucune societé avec ces choses mesprisables. Et comme, entre les hommes ceux-là se trouuent les plus excellents, qui sont les moins couuers de ce honteux excrement: aussi parmi les bestes, se font voir plus gentiles & approchantes de la raison celles-là qui en sont le moins reuestues. Pour le prouuer, qu'auons nous affaire des autres bestes? si toy seule nous vaux vn million de bestes, ô noble, ô genereuse, ô peu s'en faut diuine, ien'ose dire, beste, Toy dis-ie qui nous transis d'eston-

nement & de merueille, qui nous ravis par l'excez de ta prudence & de ton iugement, qui parles & qui entends les parlans, qui enseignes & qui apprens, qui estudies & qui t'examines, qui medites, qui escriis, & qui prophetises. Toy qui dances, & qui escrimes, qui renges les escadrons & qui ordōnes les batailles, qui combats, qui renuerfes, qui terrasses & qui foudroyes les armées: Toy qui aimes la gloire, qui professes l'honneur, qui redoutes le diffame, qui adores les astres, qui honnores les dames, & qui blessé des fleches de leurs beaux yeux, sçais languir, sçais soupirer, sçais gemir, sçaiste plaindre, & sçais mourir d'amour. Faut il que ie te nomme? tant de graces du ciel, tant de dons, de vertus & de merites, ne te font ils point cognoistre encore? Cest toy donc la merueille des bestes, cest toy cher Elephant qui t'honores de n'auoir point de poil. Mais au rebours regardez le plus sot & niais de tous les animaux, cest la brebis, vous la verrez si couuerte de poil qu'elle ne l'a point distingué, comme la plus part des autres: mais ramassé en

houpes & floçons. Regardez le plus sale & le plus vilain animal qui marche sur la terre, cest le pourceau, vous verrez qu'oultre l'abondance du poil, au lieu que tous les autres perdent le leur tous les ans & le renouvellement, il n'y a que luy qui ait ce beau priuilege de conseruer le sien. Regardez la plus poltrone, la plus lache & la plus cotiarde de toutes les bestes, cest le lieure, prenez garde que nature, selon sa procedure ordinaire, qui est de faire bon marché de poil aux animaux insignes en quelque qualité ou vilaine ou mesprisable, semble en cestuy-cy s'estre presque surmontee elle mesme. Car ne s'estant point contentee de le reuestir tout entier & luy couvrir le dehors de poil dru, & bien espais, elle a bien voulu par vn excez de liberalité luy en estrener le dedans: estant ce vn propre du lieure, sinon propre a toute l'espece, du moins a elle seule, d'auoir le palais de la bouche velu. Et ce qui est plus remarquable en cest animal; cest que cecy se trouue encore propre & à toute & à la seule espece, d'auoir la plante ou dessous du pied fourré

depoil. Je veux croire qu'en partie ce dernier luy naist en cest endroit , pour autant que toutes les armes & l'entiere deffence de ceste beste la plus peureuse des bestes, consistent en la vistesse de ses pieds, iusques là qu'ordinairement on dira qu'elle s'est bien deffendue lors qu'elle aura bien fuy deuant son ennemi: la prouidente nature, de qui le soing embrasse mesme la conseruation de ses enfans les plus vils , luy a voulu munir ceste partie gardiene de sa vie , d'un rempart capable d'empescher que les cailloux ny les espines ne l'offencent en fuyant: ainsi qu'il en prend bien souuent aux chiens, lors qu'ils courent apres ceste timide proye par de lieux espineux, & rabetreux. Mais estant ainsi que d'une mesme chose il y peut auoir plusieurs & diuerses fins, quoy que les vnes plus , les autres moins principales : ie tiens qu'icy la principale & la plus noble fin, cest que ne plus ne moins que ce fameux Cynique se vantoit iadis de fouler aux pieds l'orgueil de Platon, cependant qu'il fouloit la plume de son liët: le ciel de mesme a trouué iuste que la

plus poltronne des creatures viuantes, & peu s'en faut que ie ne die la poltronnerie mesme, se puisse vanter de fouler sous ses pieds l'orgueil & le faste des testes effeminees, en foulant le poil, subject de cest orgueil. Voila comme le poil est d'ordinaire la marque de tout ce qui vaut peu. Et qu'elle marque pour marquer ce qui vaut peu, eust sceu choisir nature qui vaille moins que le poil? qui a iamais descouuert qu'aucune vertu? ou faculté residast au poil! si ce n'est que quelque cheuelu morguant, quelque mouton à la grand laine pretende de le mettre en credit par certaine qualité dangereuse & maligne, telle qu'on la rencontre au poil du chat, que Dioscoride à ceste cause place au reng des venins. Mais de proprietiez prisables, de qualitez salutaires & qui tournent au profit de l'homme, cest vn subject qui ne s'en trouue point capable. Il s'engendre & en nos corps & en ceux des autres animaux, plusieurs & diuers excrements outre le poil, mais si nous y prenons bien garde, nous trouuerons qu'il ny en a pas vn, tant soit il ou sale ou

contēptible qui ne se face quelquefois  
rechercher par les vtiles facultez. Celuy  
que nous n'osons presque nommer  
qu'en nous bouchant le nez, combien  
d'vsages en tiroit iadis & en tire encore  
la medecine: au remede de combien de  
maladies l'accommodoit Asclepiades,  
le mēlant non seulement aux medica-  
ments qui s'appliquent au dehors, mais  
aussi à ceux qu'on prend par la bouche.  
Celuy de l'homme entre autre vtilitez  
qu'il apporte, faict des merueilles pour  
la guerison de la squinance. Celuy du  
chien s'employe a la mesme maladie  
avec pareil succez, comme encor à la  
dysenterie & aux vlcères extremement  
malins. Celuy du loup apporte aux co-  
liquieux vn soulagement incroyable.  
Celuy de la cheure est fort propre aux  
tumeurs dures de la rate & des autres  
parties, à l'hvdropisie qui prouient des  
eaux amassees entre chair & cuir, à la le-  
pre, aux dertres, aux bubons & a tout  
plain d'autres maux. Celuy du pigeon  
profite a la migraine, au tournement de  
teste, aux douleurs des rains inueterées  
& aux gouttes des pieds. Celuy de la

poule de liure ceux qui sont en danger d'estre suffoquez pour auoir mangé des champignons, outre l'allegement qu'en reçoient ceux que la colique tourmente. Celuy du Crocodile de terre est singulier a l'embeillissement du cuir & de la face: & bref, qui voudra suiure és autres animaux les excremens de ce genre il y remarquera de semblable vertus. Que dirons nous del'excrement qui sort de la vessie? celuy des ieunes garçons ne sert il pas contre la salive de cest aspic surnommé le cracheur, pour autant qu'il crache son venin contre les yeux de l'homme, ne sert il pas encore contre l'obscurcissement de la veuë & à effacer les cicatrices? Celuy de l'homme paruenü à l'agé viril, ne fournit il point de remede aux mesmes gouttes dont nous parlions naguere: d'ou venoit qu'anciennement les foulons qui s'en seruoient pour leur mestier, ne s'en trouuoient iamais trauaillez. le mesme ne vailt il pas à guerir la blessure des scorpions? & outre tant d'autres vertus, n'est ce pas vn remede tout prest contre la morsure des chiens

enragez & des serpents ? sans que ie parle de celuy des autres animaux, comme du Sanglier, remede propre au mal caduc & aux douleurs d'oreille, à quoy sert aussi celuy du Bouc & du Torreau : ne plus ne moins qu'environ le leuer de la canicule, celuy de l'Asne efface les lentilles & autres taches de la face. Ce sont les excremens, ceux la de la premiere, ceux-cy de la seconde coction : Il reste encor ceux de la troisieme, lesquels estans de mesme les premiers, l'un humide, qui est la sueur, & l'autre sec, qui est la matiere tant du poil que de l'ordure qui s'arreste sur le cuir: si est-ce que ceste ordure, quoy que tellement ordure, que soit les Grecs soit les Latins, ils n'ont sceu comme quoy l'appeller autrement qu'ordure: ceste crasse, dis-ie, n'est pas si dedaignable, qu'elle n'oblige l'homme a recognoistre tout plain de biens & de seruices qu'il en reçoit. Sur tout anciennement on l'appliquoit à diuers vsages pour la medecine : d'où venoit qu'en nettoyant & estrillant ceux qui se lauoient aux estuues on la gardoit avec

grand soing: celle mesmement qu'on racloit du cuir des Athletes escrimeurs & luiteurs, comme ayāt vne vertu d'amollir, d'eschauffer moderement & de digerer. En fin tout ce que nous auons dict, pour le respect que nous auōs dict, merite que nous en faciōs quelque estime: la plus sale de ces saletez, la moins nette de ces ordures, pour quelque vtilité qu'elle nous apporte serend digne enuers nous dēquelque recognoissance. Mais quand au poil, en peut on dire autant, & peut il bien aller du pair avecque ces ordures? non nō, tournez le hardimēt de tous costez, prenezle de tous biais, pour voir s'il a qu'elcune de ces bonnes qualitez, vous n'y trouuez rien ie m'en assure. Je suis contēt dēexcepter la laine: car iauoie qu'elle est vantee pour estre a quelques vns de nos maux vn salutaire remede. Je ne sçay pourtant si on la vante avec raison: mais si rien me le persuade, cest que l'animal qn la porte est moins fait pour soy-mesme qu'autre animal qui viue: mais comme tout entier il n'est fait que pour autrui & n'a rien en luy qui ne

profite à l'homme: aussi n'en est il point de si foible ny de si niais, luy ayans la foiblesse & la niaiserie esté baillees comme en partage, pour se rendre plus propre à seruir de butin & de proye, & à se laisser tondre, escorcher & manger, despourueu tout à fait de ruse, d'adresse, de courage & de force. Peut estre aussi trouuerez vous dans quelque auteur, que les cheueux de la femme bruslez chassent les serpens par leur odeur. Je m'esbahi de ceste antipathie, puis qu'on nous dit que les cheueux des femmes deuiennent des serpens. Mais ie vous prie, qu'elle louange leur est deuë, si les erpens mesme, les pestes & les venins ont encore trop de delicatesse pour souffrir le venin de leur gentil parfum? Ceste delicatesse combien dauantage me plaist elle, & combien me semble elle plus naturelle & raisonnable, que la bisarre delicatesse des escharbots, qui s'offencent iusques là de l'agreable odeur des roses qu'ils s'en laissent mourir. Vous trouuerez encore que les poils coupez de la teste d'un pendu guerissent la fieure quarte: mais quine  
 , riroi

riroit de l'inuention d'un si extraua-  
gant remede , si l'horreur qui l'ac-  
compaigne n'en faisoit perdre l'enuie ?  
Cesont là presque toutes les vertus qui  
se donnent au poil. S'il y en a d'autres,  
elles sont si peu en nombre & si suspec-  
tes que les bõsiugemēs s'en mocquēt  
ou en tiennent fort peu de conte: vertus  
& proprietēz phantasques & pleines  
de sotise, comme par exemple, qu'un  
poil de cheual pendu deuāt vne cham-  
bre ou cabinet a la vertu de chasser les  
cusins : ou que le poil arraché de la  
queüe du loup a la force de faire aimer,  
& autres pareilles, lesquelles, outre le  
vice qui se trouue au dessein de ceux  
qui les employent, sentent trop eu-  
demment l'imposture du forcier. Et  
vrayement cest à telles forcelleries im-  
pies & detestables qu'on a de tout  
temps faict seruir le poil. Le prince de  
l'Erebe, ce tyran du Tartare, que les  
Hebrieux ( ainsi que le remarquent  
mesme les protecteurs du poil ) entre  
autres noms qu'ils luy donnent ont  
appellé velū, luy a porté tousiours vne  
particuliere amour, & a bien voulu luy

faire cest honneur de le consacrer ordinairement au seruice de ses plus noirs mysteres. Cest à l'ombre de ses touffes obscures qu'il aime a faire sa demeure, cest là dedans qu'il choisit ses cabinets, & les lieux plus secrets de ses menus plaisirs. Ce que les sacrez prestres de Themis n'ignorās point, quand quelcū est preuenū de tels malefices & accusé d'estre forcier, ils ordonnent qu'on luy mette a bas le poil & qu'on le rase par tout le corps, pour desnichier de dessous ces lfs mortels, cest oiseau de tenebres: autrement quelque torture & quelque boutons de gehēne qu'on face souffrir à ces miserables, cest pour neant qu'ons'attēd d'arracher de leur bouche vne confession veritable. Et ce n'est pas d'aujourd'hui qu'on a introduit la coustume de faire ioüer le rasoir contre le poil de tels galans. Cest ainsi qu'en vsa l'Empereur Domitian en l'endroit d'Apollonius Thyaneus fameux enchanteur; apres qu'il l'eust fait serrer en prison, de peur qu'il mendiaſt encore là dedans le secours de sa noire science. Ce n'estoit pas seulemēt

le poil de l'homme qui s'employoit à telles diableries : mais celuy encore des autres animaux : pourueu que ce fust du poil, ce cauteleux artisan d'illusions ne refusoit rien, tout luy estoit bon & l'accōmodoit. Auquel propos le compte d'Apulee est assez celebre, touchant le poil des outres que coupa la chambriere Photis pour l'apporter à sa forcere de maistresse. Assez vulgaire encore est le compte que Procope fait de ce Roy des Gots qui voulust apprendre l'arrest de ses destins, des foyes des pourceaux. Or donc, messieurs les cheuelus, vous est il pas aduis, parce que nous venons desia de discourir à l'aduantage du poil, qu'il y a bien de quoy mespriser les Chauues, & vous preferer a eux, pour auoir la teste bien houppee?

Voire, dira quelcū, tu te donnes beau ieu : tu peins les cheveux des couleurs qu'il te plaist, & les manies à ton aise, laschant la bride à ton discours le long d'une libre carriere, où nulle obiection ne le choque, où nulle dispute ne le heurte. Mais si quelcū veut plaider la cause de ceux que tu flestris, avec tant

de dedain , il fairs voir fans peine qu'ils font bien d'autre estoife que tu ne dis, & qu'ils ont bien des conditions plus aimables. Tules fais des ordures, des excremens inutiles , des choses abjectes qui n'ont ame ny vie : & toutefois ce sont des parties viuantcs de nos corps, doüees & enrichies de mesmes facultez que les autres, qui se nourrissent & qui croissent d'un accroissement propre, & conuenable au corps animé , & ausquelles en fin nous sommes redeuables de mille bons offices. Voyla ce que dirõt quelques cerueaux phrenetiques , amoureux des destours esgarez : & qui conçoient ie ne sçay quoy de gräd & de subtil d'eux mesme, lors qu'ils osent s'escarter du chemin battu des opinions receües. Ie sçay que tels broüillõs, sy l'on veut les escouter en conteront de belles, se permettant sans hôte de cõtroller l'arrest des plus graues philosophes & excellents medecins qui ayent point fleuri de tout temps. Pour donner quelque teinture de vray semblance à ceste opiniõ monstrueuse qui anime le poil, ils tachent

d'amener quelques raisons , mais si vuides & qui ployent de tant de foiblesse, que outre que ce n'est pas icy vne leçon de Physique ou de medecine que i'aye entrepris de faire: ce seroit trop indiscrettement abuser de la patience du lecteur de vouloir en m'y arrestant l'entretenir d'un mets si mal assaisonné. Apres tout il m'importe bien peu de leur faire teste & de leur contredire quant à ce point : car soit que les poils soyent animez , soit que non : peut on nier du moins qu'ils sont de si peu de valeur qu'on est contraint à tous les coups & pour la santé & pour mille autres respects de les retrancher du corps, non seulement comme inutiles, mais cōme incōmodes voire tout a faict dōmageables. Je diray toutesfois en passāt que ces extrauagās se cōtredisent assez eux mesmes & qu'ils s'entredestruisent les vns les autres, car apres auoir mis en auant bien des absurditez pour loger l'ame dans vn poil , les voyla quand & quand au coupe-gorge entr'eux , se trouuans partis en deux bandes. Les vns veulent que le poil soit animé de

l'ame de tout le composé, comme par exemple, celuy de l'homme de l'ame raisonnable : non quand à tous ses degrez, mais seulement quand au degré vegetatif. Les autres maintiennēt qu'il est animé non de l'ame du tout, mais bien chacun de son ame propre & particuliere, fournie aussi sans plus de la faculté vegetante. Les premiers alleguent qu'un seul corps vivant ne peut auoir qu'une seule ame, & qu'une seule estant suffisante pour animer toutes les parties, elle suffit aussi pour animer les poils. Adioustent à cecy, que les poils suiuent les mesmes changemens & alterations que le reste du corps, comme ceux qui non seulement croissent & descroissent, mais aussi changent de couleur selon les âges de l'animal & selon l'abondance ou le defaut de la chaleur naturelle, & partant qu'il faut bien qu'ils soyent regis d'une mesme ame. Les secōds semocquēt de toutes leurs raisons & pour establir leur opinion disputēt qu'une chacune partie vivante en l'animal a non seulement un terme presni & limité pour son accroisse-

ment, mais aussi durât le cours de la vie, vn certain temps, passé lequel, sa substance perdue, ne peut estre iamais plus n'y réparée ny regencree. Mais les poils n'ont n'y l'vn n'y l'autre, l'experience faisant voir qu'ils croissent tousiours & en tout temps, pour s'y souuent qu'ils soyent coupez & recoupez: d'où s'ensuit qu'ils ont vne ame propre, dictincte de celle qui informe les autres parties. Il y a plus, cest qu'ez hectiques à mesure qu'ils vont seichant de toutes leurs parties, il n'y a que les poils & les ongles qui croissent plus que deuant, & qui profitent & s'esgayent de ce dommage. Ce qui n'arriueroit pas si chacun d'eux n'auoit son ame particuliere. Qui plus est, on est assez informé cōme le poil croist manifestement aux corps morts, accroissement qui ne se peut attribuer à l'ame de tout le composé, laquelle n'y est plus, & par tāt il faut le rapporter à vne ame dictincte & informante chaque poil. Ne sert de riē pour affoiblir le dernier argumēt, de respōdre que le cuir de l'animal viuāt, se trouue plus esleué & plus tendu à raison de l'esprit vital & de l'humeur qui

l'arrose, l'un & l'autre desquels s'espuis-  
fant & se consumant apres la mort, le  
mesme cuir, se flaistrit, s'abat & s'appla-  
tit, & parainfi ceste partie du poil qui  
demeuroit cachée & enfoncée entre la  
peau, venant a se descouurir, le poil en  
paroist plus long, quoy que veritable-  
ment il n'ait rien gaigné de ce costé. res-  
pōce, disent ils, qui merite d'estre siflée.  
puis qu'un mois voire deux, apres leur  
mort, on void ces miserables qu'on ap-  
prend à danser sous la corde, croistre  
de la moitié, & de barbe & de cheueux:  
au lieu que cest applatiffement de peau  
ne les scauroit allonger guere plus que  
d'euirō l'espaisseur d'une paille. De ces  
deux partis, ie vous prie à qui donnerez  
vous gaigné? a mon iugement, les der-  
niers qui font un si grād marché d'ames  
l'emportent sur les autres, & font leurs  
raisons plus de mise. Or donc si chaque  
poil est un corps animé, faisant un tout  
à part, il faut de toute necessité qu'il  
soit ou plante ou animal. Car il n'ya  
point de corps animé qui ne se rapporte  
à l'un ou à l'autre de ces deux genres. Il  
n'est pas animal: car outre qu'on nere-

marque en luy aucune operation animale ou sensitiue, eux mesme ne luy donnent quel'ame vegetante. Le voila doncques plâte. Courage, messieurs les cheuelus, nature se trouue bien trompée en vous, elle vous auoit couuerts de fumier pour nous des-honorer, elle auoit deschargé ses excrements sur le plus haut de la fabrique de vos corps, cōme ceux de Madrit, & d'autres lieux encore se deschargent des leurs sur les toicts des maisons, bref elle vous auoit esmeuti sur la teste, & voila ses cloaques conuerties en iardins agreables ses esgouts en vergers delicieux, iardins & vergers bien haut montez & bastis en l'air au modelle de ceux de Babilone. Pourquoi non? & qu'y a t'il de si estrange en ce changement? les griues & les tourtes esmeutifsēt sur les arbres, & leur esmeutiffement tantost apres se change bien en guy, mysterieuse plante de nos anciens Druides. Et puis qu'en Goa (si lerecit de ceux qui ont visité les Indes Orientales est veritable) la nature du terroir conspirant avec l'extreme courtoisie des dames du pays a peupler de

cornes toute la contree, celles qu'on iette emmy les champs prennent racine, croissent, & deuiennent des plantes: Pourquoy les poils ne peuuent ils faire le mesme, veu qu'on tient qu'ils sont produits d'une mesme matiere, si bien qu'a raison de telle fraternite la Grece leur a mis vn mesme nom? Le ne m'estonne donc plus de ceste metamorphose, ie m'esbahi sans plus que ceux qui ont tant pris de peine à nous faire cognoistre les plantes & a nous en d'echiffrer les especes, les differences & les vertus, ne se soyent auisez que les poils en estoient, & ne nous en ayent descouuert les proprietiez. Possible les Apothicaires y auroient ils trouué de quoy faire leurs apozemes, & les cuisiniers leurs salades. Que sçai- ie pourtant si Paracelse, qui comme dit le motancien, a creué les yeux aux corneilles, & veu plus clair que ses peres n'auoyent fait, ne s'en feroit point apperceu: & que cest pour ceste raison qu'il adiousté par fois du poil aux autres ingrediens de ses remedes. Que diray- ie des Barbiers qui en font vn si grand abatis tous les iours.

& à toutes heures, ne craignent ils point de faucher quelque belle Hamadryade au gresle corsage, logee sous l'escorce dequelcune de ces plantes, & pour punition d'un tel crime se voir frappez de la faim du temeraire Erisichon. Et toy le vaillant fils de Pelée, l'exemple des pitoyables amis, que pensoys tu ietter sur le corps meurtri de ton cher Patrocle, lors que tu le couvroys de tes cheveux; c'estoyent des aux & des oignons que tu arrachois de ta tette pour honorer ceste chere despoüille: car en fin, si ce sont des plantes, que peuvent elles estre que celles que nous venons de nommer, ou autres qui ne valent guere mieux, puis que, au tesmoignage mesme d'Auerroës, ne plus ne moins que les habiles iardiniers plantent des aux & des oignons tout à l'entour des roses: afin qu'en attirant pour leur nourriture le suc plus terrestre & grossier, elles laissent à ces belles fleurs le plus pur & le mieux temperé, & en ce faisant les rendent encore de plus souefue odeur. Ou bien comme les accorts laboureurs environnent le champ où ils ont semé le

pur froment de porée & de lupins, afin que telles plantes choisissans pour leur aliment le suc le plus amer & le plus vicieux, le meilleur reste pour la nourriture du bled : De mesme, disent ils, les poils ont esté plantez autour du corps, afin qu'attirants à eux les excrements fuligineux, le sang plus espuré soit reserué pour les parties viuentes. Mais qu'est ce que ie dis? ay-ie le cerueau sain, & suis ie bien en moy mesme? quel aueuglement d'esprit me fait imaginer des Aux & des Oignons, cependant que mon discours a pour objet non pas vne plante vulgaire, mais le miracle des plantes? Car si l'excellence de l'arbre ne se peut mieux faire voir que par l'excellence de son fruit, quelle arbre & quelle plante ne doit ceder a la valeur des cheueux, de qui le fruit est incomparable. Icy i'implore vostre indulgence, esprits courtois des cheuelus. I'ay failly, ie recognoy ma faute, l'imprudence & l'erreur m'ont iusqu'icy fait descharger sur ce papier mille blasphemes cōtre ces diuines plantes dont vos testes sont honorées: agréez que

pour marquer ma repentance ie m'estendemainenant vn peu sur les louanges de leur fruit, & qu'en d'escourant les perfections ie face voir les leurs. Ie sçay que des plantes les vnes nous portent le sucre, les autres la canelle: les vnes nous donnent le poiure, les autres le girofle: les vnes nous presentent le coton, les autres la foye: les vnes nous font part du baume, & les autres, comme le cocos, de mille choses ensemble. Mais qu'est-ce que tout cela, pour aller du pair avec le fruit miraculeux de ces petites plantes? non, la nature n'offre point à nostre cognoissance quelque autre pareil chef d'œuvre: il faut aller aux fables, & voir si les cerueaux des poetes ont conceu rien de semblable. S'ils l'auoyent fait, ce seroit sans doute. leurs vergers Hesperides & l'or de leurs riches pomes: mais ceste fiction encore se trouuera elle au dessous des veritables merueilles de nos plantes. Plantes de qui les fueilles sont des œufs, qui en leur extreme petitesse imitent l'esclat naif & la beauté des perles: fueilles bien admirables. qui en tombant de

leurs brâches sur les testes cheuelues, se changent en vn moment, ô changement estrange ! non pas en des canarts ou des oïsons, comme font en tombant dans la mer les fueilles de ie ne sçay quels arbres plantez sur la coste Hirlandoise : mais bien en des animaux qui bien qu'ils soyent des plus petits du monde, logent en eux mille vertus dignes d'estre admirées : œufs bien prodigieux qui escloüent non pas des grues ny des cocus, mais des Castors & des Pollux, de qui les belles actions meritent les Chroniques. Tout le monde ne le sçait pas : car tout le monde n'a pas l'esprit d'y prendre garde : mais les sages, qui sans se soucier du vulgaire ignorant, n'ont point de hôte de considerer les plus petits effects de nature, & les plus mesprizez, sçauent bien y descouurir mille secrets misterieux. Nous sçauons que Cleanthes prist la peine d'estudier le formi, & que Aristomaque donna cinquante ans de sa vie, à l'estude de l'Abeille. Plus sages, à mon auis, & l'un & l'autre, s'ils eussent employé ce temps apres la speculation de nos peti-

tes bestes, & s'eussent a bon escient obserué leur nature. Car ils auroyent appris quelles ont bien le cœur en si bon lieu, que sans estre equipées d'autres armes que naturelles, elles se permettent d'attaquer, non les hommes communs, non les gueux seulement: mais tellefois les plus grāds Roys & les plus fameux Capitaines. Tu le sceus bien, braue Roy de Sparte, tu le cogneus bien, valeureux Agésilas, qui cependant que tu sacrifiois aux Dieux, te sentant percé iusques au sang par vn de ces auanturiers, n'eus point vn meilleur expedient que de quitter au plus viste & vœux & sacrifice, pour te deffendre des coups d'vn ennemi si dangereux. Si est-ce que tu estoys Roy d'vn peuple, où les enfans mesme se laissoient bruler pour ne troubler les mysteres d'vne pareille action. qu'eusses tu fait? les Romains estoient fort religieux, mais ils s'escartoyent du respect de la religion en la guerre des Gaulois: & contre vn si fier combattant tu fus contraint d'en faire de mesme. Il est vray, tu vainquis cest assaillant & le mis a mort: mais il est

vray aussi que tu tesmoignas sur le champ l'estime que tu faisoys d'un exploit si heroïque: te brauant là dessus, & comme chantant à toy mesme le pæan & l'hymne de ta victoire. L'histoire rend bien ce tesmoignage à cestui-cy: mais qu'elle iniustice fait elle à tant d'autres, de qui elle cache les gestes, soit en les taisant par negligence, soit en les donnant par vne malicieuse enuie à tels qui de leur vie ne songerent pas mesme à les executer. De cecy, ie ne veux autre preuue, que le seul traictement qu'ils ont receu de ceux qui nous ont laissé dās leurs escrits la deliurance du Capitole assiegé par les Gaulois & le repoussement des ennemis qui auoyent donné l'escalade. N'ont ils pas bonne grace de nous conter que ce furent les oyes qui par leurs cris esueillèrent les Romains: au lieu que l'honneur d'une telle deliurance n'est deu qu'à ces fidelles & vigilantes sentinelles, qui decourant l'ennemi, vous picquerent si viuement les dormeurs qu'ils furent aussi-tost sur pieds pour empoigner leurs armes. Iugez s'il n'y a point plus d'appa-

d'apparence en ceste narration qu'en la precedente. Puis que ceux dont a si iuste tiltre ie celebre la gloire, ne se contenterent pas pour ce coup là de rendre vn si bon office à leurs concitoyens : mais depuis ils s'employèrent courageusement à restaurer la liberté Romaine, vengeance tant de noble sang espendu par la cruelle cholere de ce voleur de Sylla, vn des plus insignes tyrans de ceste grande republique. Ce furent eux qui le mirent a mort, ils firent ce beau coup : personne ne leur en dispute la gloire : & personne aussi ne leur pourroit raiuer la premiere, s'ils auoyent rencontré de si fidelles historiens à escrire leurs faicts, que les freslons qui se trouuerent au secours de Bacchus contre les Indois. Ce furent eux, vous dy-ie encore, qui deliurerent le Capitole. Et de fait, outre qu'vn siege de six mois si pressé, qu'il estoit bien à ceux de dedans & l'enuie & le loisir de manier le peigne, auoit presté la main à la naissance de plusieurs bataillons de ces genereuses bestes : combien sont elles plus propres à faire le guet que ne sont les

oyes? Celles-cy, de mesme les autres animaux, passent la plus grande partie de la nuit à dormir : au lieu que les autres mesurent leur veille à la longueur de leur vie. Car comme nous apprend le philosophe, ce qui n'a point de cerueau ne dort point : & qui est celuy qui aura si peu de cerueau, qu'il se permette d'en imaginer au pou? Pou qui, nonobstant la courte duree de sa vie, se peut bien en ce point iustement esgaller aux demōs, & immortelles intelligēces separées de toute contagion de matiere, qui ne sont point subjectes au sommeil, n'y n'ōt besoin de reparer leurs forces par ceste trefue & cessation de sens, mais de qui proprement on peut dire qu'elles viuēt tant qu'elles vivent. Et de combiē peu s'en faut il aussi que les poux ne soyent tout a fait de ces esprits simples & de ces formes toutes pures que nous venōs de dire, puis qu'il ny a qu'un petit atome de matiere qui serue de barriere pour empescher ces deux natures de confondre leurs confins. Aussi tous animaux n'ont pas l'honneur d'engendrer de tels enfans. Le baudet, qui est le plus

abject de tous, & celuy à qui nous auons  
desia donné la niaiserie en souuerain  
degré, qui est la brebis, n'en produisent  
iamais. Peut estre quelque poinctilleux  
me viendra dire icy, que ce sont non  
pas ceux des testes cheuelues: mais ceux  
qui naissent es autres parties qui ont  
fait toutes ces belles choses que i'ay di-  
ctes: & ie reparts que quand ainsi seroit,  
ce qui se dit des vns se peut dire des au-  
tres, & ce que les vns ont fait, les autres  
ont esté & sont capables de le faire:  
mais toutefois il y a bien plus de raison  
de donner ceste gloire à ceux qui nais-  
sans de la teste, comme Pallas, ont aussi  
vne humeur guerriere, comme elle, &  
sont plus ardants que les autres aux  
grandes entreprises. Ce qu'ils tesmoi-  
gnent bien à toutes heures: car, pour tai-  
re tant d'autres preuues, à quoy faire  
croyez vous qu'ils tournent & virent  
haut & bas, du long & du large, par les  
testes cheuelues & à quel dessein, si ce  
nest que poussez d'une forte ambition,  
ainsi que des Magellans ou des Coloms  
ils cherchent quelque destroit inco-  
gneu pour passer à d'autres globes, &

descouurir d'autres mondes, cest a dire d'autres testes : recherche digne d'un Alexandre & imitee d'Alexandre. Qui s'esbahyra donc qu'un de nos braues Roys ait autrefois recōpensé d'un bon nombre d'escus le petit seruice d'un pauvre homme qui tout ~~en~~ tremblant auoit d'eniché un de ces petits heros de sa cape royalle, se resiouyssant avec raison ce grand prince qu'on l'eust conueincu d'estre homme par la production d'une si noble vermine. Ce n'est pas seulement un grand Roy qui leur a fait de l'honneur, des peuples tous entiers & des nations bien grandes leur en ont fait encore. Car pourquoy pensez vous qu'en certain pays on void pratiquer vne coustume, ainsi qu'une inuiolable loy de courtoisie, qui veut qu'au mesme instant que quelcun descouure un de ces bestions sur la robe ou le corps de son voisin, il le croque sans marchander & l'enuoye habilement dans son estomach: si ce n'est pour le respect que ces gens là portent au parentage : ne plus ne moins que certains peuples d'Asie, les Derbjes, ce me sem-

ble, enseuelissoient par honneur & pieté les corps de leurs peres trespassez dans leurs propres entrailles : iugeans plus honorable qu'ils fussent mangez par leurs parents & amis que par les vers. Et que sçait-on si le singe qui veut trencher de l'homme, pour la mesme raison plus que par friandise, ne cherche point de tel gibier dans les cheueux ? Que diray-ie plus ! celui qui ne sçait pas qu'il y a eu encore des peuples qui se sont honnorez de porter leur nom, il n'a iamais leu les Historiens n'y les Geographes, qui nous parlent des Pedicules, cest a dire des poux, anciens habitans d'Italie: qui volontiers à l'imitatiō des Myrmidons, lesquels prindrēt le nom des fourmis, se vantās d'en estre descendus, pour se faire estimer bons mesnagers comme eux & biē diligens: furent inspirez de leur vanité à prendre celui des poux & rapporter à eux leur origine, pretendans par là des'attribuer la perrogatiue de vaillance : dautant que peut estre ils aimoyent la guerre comme eux, & lesang, & trouuoient leur poison dans la molle douceur de la

paix, demefme qu'eux trouuent le venin & leur mort dans la douceur du miel. Et comme anciennement ceux d'Athenes laiffoient croiftre leurs cheueux, afin d'y attacher leurs belles cigales d'or, par où ils vouloyent dire qu'ils eftoyent naturels & ordinaires du pays, comme elles, qui naiffent, viuent & meurent en mefme lieu: ainfi nos Pedicules, comme ie coniecture, deuoyent nourrir les leurs, afin de les garnir de cefte petite engeance, & de faire parade de la noblefle de leur extraction. Mais il ne s'en faut guere que tant de prefomption ne les abusast, de vouloir attribuer à eux feuls l'honneur d'une origine quin'appartient pas feulement à tout le refte des hommes, mais à tout ce qu'il y a de corporel en la nature. Car apres que i'ay bien fongé aux atomes d'Epicure, ie trouue mille raifons qui me conuient a la fuiure. Or qu'eftimez vous qu'il ait entendu par ces atomes, fi ce n'eft ces cheualiers errants des teftes cheuelues? Il nous les depeint des petits corps garnis de pieds ou petits crochets, pour pouuoir en tombant de

trauers par le vuide, s'attacher les vns aux autres, & ce faisant composer le mōde & le peupler de corps. Qu'y a t'il en ceste peinture qui disconuienne aux conditions de nostre menu peuple? mesmes crochets, mesme façon à se couler en bas & descendre par le vague. L'agilité des puce, ny leur humeur fretillarde & trop esueillée ne permet pas qu'on leur approprie vne telle description. Car si biē le reste s'y rapporte, du moins sont elles mal propres a garder la forme du mouuement requis, comme celles qui n'iroient qu'a gambades, qui ne descendroyent qu'a bonds à sauts & à groupades. Et quand à ces honteux auortons qui s'attachent avec non moins de priuauté que d'opiniaistreté aux plus secrettes parties de nos corps, ils aiment trop constāment la paresse & le lieu de leur naissāce. La gloire de forger mille mondes ne les en scauroit arracher ny les induire a s'en aller voltiger par l'air: & contraires au Daufin, le mouuement est leur mort, comme à luy le repos. Ayant donc trouué de si profonds abysses de merite dans la confi-

deration de ces glorieux enfans des  
cheueux, dois- ie bien maintenant raua-  
ler & mon discours & leurs honneurs à  
de plus basses loüanges, en ramenât icy  
ce que leur attribue le prince des Philo-  
sophes: cest qu'ils deffendent de la dou-  
leur les testes où ils logent. Je n'en par-  
leroy pas, n'estoit qu'aucuns ingrats, de  
peur de leur deuoir la recognoissance  
de ce bienfait, alleguent a l'encontre,  
qu'ils ont veu en leur temps plus d'un  
gueux qui crioit de la teste, cependant  
que ces hostes y couroyent à douzai-  
nes. Mais lourdauts & Cumains, n'a-  
uoient ils point l'esprit de comprendre  
que la douleur, s'estant esgarée ou blot-  
tie quelque part dans ces forests obscu-  
res, ces meutes diligentes couroyent  
apres, esuentans & flairans de tous co-  
stez, iusques à ce que l'ayās r'attrappée  
ils la mettoient en pieces & en faisoient  
curée. Je pensois que ce fust assez ry de  
ces refueurs & de leurs belles plantes:  
mais ie voy bien qu'il me reste encore à  
rire vn petit sur le subiect de ces admi-  
rables cauitez, que treuuent & que sont  
obligez de trouuer dans les poils, soit

les premiers qui les animent comme parties du corps viuant, soit les derniers qui distribuent à chacun son ame. Ils sont dy-ie obligez de les y trouuer pour y loger tant l'aliment qui leur est necessaire pour se nourrir, que les excrements de cest aliment imaginaire. Or ces gens là n'ont point de honte de nous presser, parmy leurs autres preuues, par l'exemple del'herisson en nous opposant la manifeste cauité de ses pointes, de mesme que celle des plumes des oiseaux : & comme s'ils nous tenoyent à la gorge, ils croient bien nous forcer par là d'aduouier la cauité des poils. Merueille, puis qu'ils se sont tant permis, qu'ils ne se soyent aduisez des cauitez des coleurines & des doubles canons, pour nous prouuer encore par ces exemples leurs cauités pretendues. Or allez moy, dorenauant faire cas de la dexterité de ces Pheniciens qui trouuerent moyen de loger dedans vn cuir de bœuf, les orgueilleuses tours & les palais releuez de la fameuse Cartage. Allez moy dorenauant estimer la gentille industrie de celuy qui enferma tou-

tel l'Iliade d'Homere dās vne coque de noix. Vantez moy iamaïs plus l'ingenieufe main d'un Mirmecide, ou d'un Callicrate qui trouuerent bien assez despace, pour placer vn distique elegiaque dans vn grain de Sefame, aussi menu que le grain du millet : qu'est ce que lourderie au pris de la subtile adresse de ceux-cy, qui dans vn petit poil, & peu s'en faut que ie ne die dans vne ligne mathematique, qui n'a des trois dimensions que la seule longueur, ont bien sceu bastir des gardemangers, des cheminées, des fours & des cuisines ? qui doute qu'au ecle temps leur esprit se subtilisant dauantage, n'y bastisse des belles sales, & des galeries, des chambres & antichambres, des ieux de paume & des portiques. Quitans donc là toutes ces niaiseries, soit ces vergers phantasques & poüilleux, ou soit ces chimeriques cautez, qui ne furent iamaïs que dans les creux cerueaux qui les ont inuentées : tenons nous à ce que les bons maistres nous en ont de tout tēps enseigné, & disons que tout ainsi qu'au grand monde on void deux sortes, d'e-

uaporations : l'vne humide qu'on appelle vapeur: d'où s'engendrent les meteo- res aqueux, comme pluyes, neiges, gresles, rosées, & bruines: l'autre seiche, qu'on nomme exhalaison, qui fournit de matiere aux foudres, aux vents, aux cometes, aux poutres flamboyantes, & autres impressions tant aërienes qu'ignées : De mesme au petit monde, des vapeurs il s'engendre diuerses defluxions & desbordemens catharreux, qui respondent à la pluye, à la neige, & aux gresles: & de l'exhalaison se font les poils, les ongles, les cornes & autres excrements secs, qui sont iettez dehors comme superfluitez inutiles. Ces poils, comme prononce Galen, ne constituēt point la substance de nos corps, comme ceux qui ne sont point principes des facultez, n'y ne seruent de rien aux principes des facultez, n'y n'ont en soy aucunes facultez, n'y n'en empruntent des vraies parties du corps. Car ils n'ont n'y sentiment n'y mouuement n'y vie. Ils n'ont la vertu n'y d'attirer ny de contenir ny de cuire ou alterer: ny ne fournissent ces vertus à pas vne partie: seule.

ment ils s'engendrent d'une matiere fuligineuse qui passant par les subtils pertuis du cuir, y demeure quelque temps arrestée, iusques a ce qu'elle est poussée par une autre semblable, & celle-là de mesme par une autre nouvellemēt succedante : ne plus ne moins qu'un clou pousse l'autre clou : si bien que s'entretenant & s'attachant l'une à l'autre, le poil se fait en ceste sorte, & croist par une simple addition de matiere, comme feroit en roulant un peloton de neige, non par assimilation de substance : n'estant apres tout, comme nous auons desia dit auparauāt, qu'une ordu-re que nature bannit pour conseruer la chaleur naturelle, la vie & la santé. Le dessein qu'a ceste bonne mere en iettant hors par les conduits d'en bas les excrements qu'on estime si sales: cest le mesme qu'elle a en se deschargeant de ceux-cy par les pores du cuir. Bref autant de pores dont le cuir est ouuert, se font, pour parler librement, autant de chaires percées dont elle s'est accommodée pour se vuider de ceste vilainie: & tout autant de poils qui vous tien-

nent au cuir, ce sont autant de crottes  
que la tenacité opiniastre de la matiere  
visqueuse arreste sur le passage. Ie vous  
voy, ce me semble, messieurs les testo-  
nez, boucher le nez, & censurer mes  
comparaisons, comme trop licentieu-  
sement inciviles: mais certes si vous y  
prenez bien garde & iugez equitable-  
ment, vous me trouuerez excusable.

Que puis ie faire? que dois ie dire? Si ie  
traictoy des gemmes qui naissent sous  
l'Aurore, ie vous esblouyrois de lesclat  
des Rubis flamboyans, des Diamants  
brillants & des Perles luisantes. Si ie  
parloy des fleurs, la Rose vous rauiroit  
du lustre de son beau teint vermeil, Lœil-  
let vous esgayeroit par ses replis pour-  
prez, le Lis vous attireroit à contem-  
pler sa belle face argentée: discourant  
des odeurs ie vous ferois flairer l'Ambre,  
le Musc & la Ciuete: ie vous offri-  
rois le Baume & l'Amome, le Nard &  
l'Encens, & bref tous les parfums de  
Sabée. Mais puis que traictant du poil  
ie traicte d'une saleté, si la matiere souil-  
le tout ensemble mon discours & blesse  
vos oreilles, prenez vous en à elle, mais

bien plustost à vous mesme quila cherissiez tant, & qui vous glorifiez, profanes que vous estes, de donner a ceste belle & admirable princesse la diuine raison, le logis de la hupe, puis que vous la logez dans vne teste couuerte de cheueux.

Nous auons veu que cest que le poil, de qu'elle estoit il est fait, & ce que pour son respect il merite. Voyōs maintenant si pour les commoditez qu'il nous apporte, nous pourrons luy donner quelque pris. Car ie voy bien que les ennemis ne sont pas encore es termes de mettre bas les armes, ils sont en humeur de combattre, & veulent pour releuer d'autant ma victoire, me faire au pris de plus de peine acheter leur defaicte. Le poil ce disent ils, & sur tout celui de la teste, nous fait deux sortes de seruices generaux qui en comprennent beaucoup d'autres, l'vn interne, l'autre externe. Le premier est, que la matiere dequoy il se fait estant poussée dehors, le corps se trouue deliuré de tout plain de maux qui luy arriueroyēt, si elle estoit retenue: l'autre est double,

afçauoir l'ornement & embellissement du corps, & la deffence & remparement d'iceluy. Quand au premier i'aduouie que ie feroiy bien defraisonable de nier que si ceste odieuse matiere n'estoit chassée, elle ne nous caust mille facheux & bien dangereux accidents. Certes ce n'est aussi pas moy qui leur veux contredire sur ce point : au rebours fort volontiers ie me rends à l'opinion de ceux qui tiennent, que nature a voulu à dessein faire la peau du corps humain fort tenve & delicate, de peur, qu'ayant a receuoir vne bonne partie de ce que les autres membres ont de superflu : si elle eust esté plus robuste, elle n'eust comme présenté les griffes, & rechassé vers les parties plus necessaires & plus nobles, ce qu'on vouloit decharger sur elle. Ie suis encore de leur aduis, que ceste mesme peau se trouue comparable à l'Afrique, en ce qu'en Afrique, à cause de la seicheresse & disette d'eau douce, grand nombre d'animaux de diuerses especes venans à se rencontrer en mesme lieu pour estancher leur soif : tout ainsi qu'apres auoir

beu ils se meſlēt diuerſemēt les vns aux autres, & de tels accouplements bigarrez ils ſ'engendre tous les iours quelque monſtre nouveau: tout en la meſme forte diuers excrements & ſuperfluitez venans a ſe confondre & meſler ſous le cuir, de ce diuers meſlange il arriue iournellement quelque choſe de monſtrueux: ſoit inanimé, comme craſſe, gales, poreaux, taches & autres: ſoit animé, cōme ſirons, poux cōmuns, poux aiſlez tels que ceux qui cauſent la mort aux Acridophages ou mangeurs de locuſtes, habitans le long de la mer rouge: & ceſte eſpece de puce que les Indiens Occidentaux appellent Nigue, qui les tourmente tant. Ces deux derniers ſont eſtranges & meritent qu'en paſſant on les faiſſe cognoiſtre à ceux qui n'en ont pas encore ouy parler. On dit qu'en uiron l'Equinoxe du printēps il ſoufle des vents qui portent vers ces Acridophages vne fort grande multitude de ſauterelles, qui volent preſque comme oiſeaux, quoy qu'au reſte elles ſoyent plus petites aſſez. Ce peuple ne ſe nourrit d'autre viande, de laquelle il  
fait

faict sa prouision pour tout le long de l'année , mettant saler à grands tas ces bestioles pour mieux les cōseruer. Vne si mauuaise nourriture fait que ces gens ont ordinairement le cours de leur vie borné de quarante ans : & qui plus est qu'ils finissent leurs iours d'une mort miserable. Car leur vieillesse approchāt, il s'engendre en leur corps vne sorte de certains poux aislez , r'apportans assez aux mouches de nos chiens, mais plus petits. Ils commencent a se faire sentir à la poitrine & au ventre, & delà, dans peu de temps gaignans le haut ils se poussent iusques à la face, la peau de laquelle ils rongent entierement. Ceux qui sont attains de ceste vermine se des-chirent, peu s'en faut, le corps à force de se gratter, si bien qu'à la fin ils trespas-sent au milieu de mille tourmens. Au regard de la Nigue , cest vne espece de puce fort menue & qui a le bec ou meufle fort aiguisé, elle attaque le plus sou-uent les pieds , rarement les autres parties. Cest au dessous des ongles qu'elle se fourre, liurant l'assaut non seulement à ceux qui marchent , mais aussi à ceux

qui font couchez : quoy que ces Indiẽs pour euitter ce mal , tendent leurs liẽts de cotton bien haut. La picqueure de ce bestion est fort douloureuse , & plus dangereuse encor si on n'y remeie à bonne heure. Car il s'y fait vne vessie , d'environ la grosseur d'un pois , d'où ceste petite peste vient à prouigner & multiplier de telle sorte , que plusieurs en perdent les pieds & quelquefois les mains. Mais de tous ces enfans bastards engendrez de tels meslanges , il n'y en a point de plus meschans & detestables que les poils , n'y qui plus affligent le corps humain. Car il naist des poils sous le cuir , de si poltronne nature , qu'ils n'osent exercer leur rage que contre les enfans qu'ils tourmentent en mille fortes & bourrellent estrangemẽt. Tels sont ceux qu'en Languedoc on appelle, cridons, à cause comme i'estime des cris pitoyables qu'ils font ietter à ces petites creatures innocentes , le foible & honteux object de leur lache cruauté. Ce sont certains poils peu en nombre, gros cõme foyes de pourceau , & n'excédants que de peu la longueur d'un

espingle. Vous diriez que ce sont des  
espines bien poignantes qui leur per-  
cent la peau au pres du dos, de façon  
qu'ils ne peuuent trouuer repos, que ces  
ennemis sans pitié ne soyent iettez de-  
hors. Tel est encore ce fleau de pe-  
tits enfans vers la Poloigne, ie di ceste  
maladie procedante de ie ne sçay quels  
poils qui leur naissent sous la peau, non  
en petit nombre, ny gros, comme les  
precedants, mais en grande quantité  
& deliez. Et comme le mal est estran-  
ge, aussi en est le remede bisarre. Ce s'ont  
les femmes qui le pratiquent commu-  
nement, sans en alleguer autre raison  
que del'experience. Elles baignent les  
enfans atteints de ce mal dans vne cuue  
d'eau chaude, où elles versent quel-  
que peu de cendre & quelque poignée  
de pain esmié. Après que le garçon  
s'est laué la dedans, ayans transoulé  
cette eau, elles reduisent ce pain en mas-  
se. Ceste masse ou paste estant despecée  
auec les mains, vous y voyez parmy  
grande quantité de poil subtil & menu,  
reiterant le remede vous y en apperce-  
uez encore, non tant qu'à la premiere

fois , mais bien tousiours en moindre quantité , iusques à ce que le malade estant parfaitement gueri, il n'y en paroist point du tout. Ce nest pas sans plus , prochainement sous le cuir qu'il s'engendre du poil : mais encore en diuers autres endroits au dedans de nos corps. Il s'en engendre és roignons , il s'en engendre és mamelles , il s'en engendre en l'estomach , il s'en engendre en la vessie, il s'en engendre dans les venes : & tout au despens de nostre santé, & tout pour nous donner du martyre. Quels tourmens souffrent le plus souuent ceux qui logent de telshostes dans leurs roignons ou dans leur vessie , iusques à tant qu'ils les ayent tirez dehors , les medecins qui nous ont mis par escrit leurs obseruations le font assez entendre. Non moins cruelles sont les douleurs que liurent ceux de l'estomac, ou ceux des venes, & particulièrement aux femmes ceux des mamelles. Il est vray qu'Aristote suiuy de quelques autres , estime que ces derniers ne naissent point dant le corps : mais qu'ayans esté aualez en beuuant, de l'esto-

mac puis apres ils passent aux venes meseraïques, de là au foye, du foye aux autres venes, iusques à ce qu'en fin ils arriuent aux mamelles, où ils excitent des douleurs violentes avec fieure & autres accidens, tous lesquels s'appaisent soudain qu'auecque le laiët ce poil est mis dehors. L'histoire de leurs cruautez est veritable, mais me conformant à l'aduis de beaucoup d'habiles medecins, j'aime mieux croire qu'ils naissent où ils font le mal, que me laisser persuader qu'ils s'achent pour arriuer iusques là, pour suiure vn chemin, ou pour mieux dire, vn destour plus embroüillé que l'ancien Dædale. Et puis, si comme eux mesme aduoient, il naist du poil en tant d'autres endroits au dedans de nos corps, qu'elle raison les empesche de croire qu'il n'en puisse naistre es mamelles? Ie nedy pas que le poil qu'on aura aualé ne se fasse tousiours cognoistre poil: cest a adire tousiours meschât & tousiours tyran aussi bien que celuy qui sera né dans le corps: mais icy il n'y a que la difficulté du chemin qui me recule de l'opinion cōtraire. Vous auez

beau vous cacher , & ne monſtrer que vos pointes , importuns hoſtes des narines : voſtre malice ne ſçauroit ſi bien eſchapper à ma cognoiſſance , que ie ne la mette au iour : car vous ne valez pas mieux que vos freres. Mais quel rang vous dois-ie donner , où de ceux du dedans ou de ceux du dehors ? Vous eſtes de tous les deux , afin de vous rendre doublement coupables. Dedans, vous incommodez le corps , & conſpirez ſans ceſſe contre la liberté de ſa reſpiration. Dehors, vous eſtes ſi cōtrairès à la bien ſeance, & ſi partials aux auteurs de la mauuiſe grace : que le maiſtre d'amour vous hayt & vous deſcrie comme des peſtes, deſſendant autant que toute autre choſe aux amans de vous ſouffrir ſur eux. Quelcun me dira qu'au moins naiſt il du poil ſur le cœur de quelques hommes , quoy que rarement & extraordinairement , lequel au lieu de faire iniure au corps , eſt en luy ou cauſe ou ſigne d'vne force rare , extraordinaire & qui ſemble aller au delà de la nature. Ie l'aduouë, mais d'vne force brutale, violente & tyrannique, qui transfor-

me tels hommes ( du naturel , sinon du corps) en tigres cruels, & en loups ravis-  
sans ; hommes bestiaux qui abusans de  
cest aduantage ne cessent de se porter  
au meurtre , à la rapine & à toute inso-  
lence, iusqu'à ce que la diuine iustice les  
ait montez sur vn honteux & tragique  
eschafaut , comme nous en font foy les  
histoires. Je pouroy m'estendre dauan-  
tage sur ce point : s'il ne suffisoit de ce  
que iay dit , pour faire voir de quelles  
incommoditez nous sommes attaquez  
autant de fois qu'un seul cherif poil  
vient à naistre au dedans de nos corps ;  
& que ne plus ne moins que ce petit  
animal que les Grecs ont nommé de la  
mort du Lion , ne naist iamais qu'aux  
lieux où naist ceste genereuse beste , &  
ne naist qu'a fin qu'elle meure : de mes-  
me ce detestable poil ne scauroit iamais  
naistre dedans nous , sans faire mourir  
nostre repos & nostre santé. Orie de-  
mande, si ie discouroys ainsi. Les coup-  
peurs de bource , tireurs de laine, vo-  
leurs & sacrileges : les seditieux meur-  
triers & assassins , tandis qu'ils viuent  
dans vne republique, la troublent de

telle forte, que le repos n'y peut estre qu'apres qu'ils en sont bannis: donques les coupeurs de bource, tireurs de laine & toute ceste fuitte causent le repos aux republiques: seroy-ie pas vn habile architecte de consequences? Et si ie dy, les poils & la matiere de quoy ils se font, sont si dommageables durant qu'ils se tiennent dans nostre corps, qu'il ne peut viure sain, s'ils ne sont chassez & condamnez à perpetuel exil: les poils donques font de grans biens au corps, seray ie plus habile en ma Logique, & ma conclusion sera telle plus mettable? & quoy! tu seras vn boutefeu, vne furie & vne peste en vne famille, tu y seras mille desordres, & bien que le plus chetif valet, tu viendras gourmander le fils de la maison: le pere de famille ne pouuant plus souffrir de ton insololence, meud'vne iuste cholere te poussera dehors avec honte & ignominie, & ce faisant remettra l'ordre & la tranquillité dans sa maison. Cependāt il se trouuera de si foibles cerueaux, qu'ils croiront que ce sera toy le boutefeu, la furie, & la peste qui seras la cause

de ce bien, & non pas la prouidence de celuy qui t'aura deslogé. O grandes & genereuses ames, vous Camilles, Scipions, Maries, & Pompées, qui pensiez acquerir à vostre nom vn honneur immortel, lors qu'avec tant de sang, de peine & de sueur, vous acqueriez à vostre pays le repos & la seureté, en nettoyant, & la terre & la mer, qui des Gaulois, qui des Cartaginois, qui des Cimbres & Teutons & qui des insolens Pyrates: combien vous seriez vous mescontez en vos hautaines esperances si vos exploits guerriers la glorieuse, semée de tant de triomphes, & de trophées eussent deu passer par l'examen de si pertinens iuges. Ce ne seroit plus vous à qui vos citoyens deueroient leur calme & leur deliurance: ceux que vous auriez battus chassés & dissipés, ce seroient ceux là mesme qui auroyent droit de s'en approprier l'honneur. Car n'est-ce pas ceste puissance de l'ame qui a la charge de bannir hors du corps tout ce qui ne vaut qu'à troubler sa police: n'est-ce pas elle, di-je, qui nous rend ce bon office d'escarter de

nos trailles ces monstres intestins? quel estourdissement donc, ou qu'elle phrenesie d'aimer mieux, au lieu de luy recognoistre ceste obligation, la deuoir à nos capitaux ennemis & desquels mesme elle nous a deliurez.

Ce point vuidé, nous voicy sur les bienfaicts avec quoy le poil (ainsi qu'on nous veut faire croire) oblige le corps quand aux parties externes. Il faut voir ce qui leur est deu pour ce regard. Mais pour autāt que ie n'en veux, principalement qu'aux cheueux & que leur honte particuliere est le blanc où ie vise: Pour ceste raison bien que generallement en quelque endroit du corps que le poil ait pris quartier, il ait vne origine esgallement mesprisable, & soit presque esgallemēt pauvre de bonnes qualitez: encore puis ie souffrir qu'on donne quelque prix à celuy qui prouient en toute autre partie qu'à la teste, en consideration de quelque vtilité qu'il nous peut apporter, & pour la fin à quoy avec quelque apparence, il semble auoir esté destiné. Celuy des sourcils, puis qu'on le veut ainsi, est comme vn

manetelet ou comme vn boulevard, propre à deffendre l'œil, partie si sensible, si delicate & si noble: à le couvrir des iniures du dehors & particulièrement à retenir les sueurs du front & de la teste. Cest comme vne seuronde qui les escarte au loing, empeschant qu'elles ne s'escoulent dans ce precieux organe de la veuë. Les poils attachez aux extremitez des paupieres, outre qu'ils rendent à peupres vn semblable seruice, sont aussi voüez (du moins, selon les Platoniciens) à dresser & conduire les rayons visuels, prestant cest office à la fonctiõ la plus vtile & agreable de tous les sens. Et quoy que les Peripateticiens ne vueillent point que la veuë se face par l'emission & dardement des esprits: ils ne laissent pourtant d'aduouër que ces poils luy sont grandement fauorables, faisans que les especes s'vnissent beaucoup mieux au point qu'elles abordent l'œil. Encore remarque l'on icy, qu'il n'y a de tous les animaux que l'homme seul qui ait la paupiere de dessous garnie de poil: non seulement pour pouuoir voir plus net

les objects, dont les especes entrent par ce moyen plus vnies : mais aussi pour autant que les brutes ayans la teste penchante & courbée vers la terre, il leur suffit d'auoir du poil en la paupiere superieure, afin de receuoir les especes qui viennent d'embas. Au lieu que l'homme celeste & diuin animal, comme il a la teste droicte & releuée, pour pouuoir contempler ces hautes & immortelles voutes, & leurs estoiles lumineuses: aussi a t'il du poil en la basse paupiere afin de receuoir leurs especes qui descendent d'enhaut. Qui plus est il y en a qui se font a croire, que ces mesmes poils tant de l'une que de l'autre paupiere sont vtils à l'œil en l'action du dormir: de sorte que celuy à qui on les auroit arrachez, passeroit le meilleur de la nuict a veiller, iusques à ce qu'ils luy seroyēt reuenus. Quoy la barbe ne fera-ce pas vn enseigne & comme vn estandard que nature a arboré en l'édroit le plus apparent, pour marquer la virilité, & discerner en la plus digne espece des animaux le sexe le plus digne, qui ne peut estre honnestement distingué par

les parties que la honte commande de tenir voilées : à quoy regardant Diogene, comme vn iour il eust rencontré quelcun qui venoit de raser son menton, & quoy, dit-il, veux tu donc accuser nature, de ce qu'elle t'a fait homme & non femme? Cest pour la mesme raison, ce dit-on, qu'un vieillard de Lacedemone interrogé à quoy faire il portoit si longue barbe. Cest afin, repart-il, qu'autant de fois que ie la regarderay, ie me garde de faire rien indigne d'elle. Aussi trouuons nous que parmy certaines nations, cestoit vne coustume religieusemēt obseruée, de ne mener point deuil, n'y lamenter, lors que l'occasion en arriuoit, que premier on n'eust coupé la barbe : estimans ces peuples chose mesleante & de mauuaise grace, de porter la marque de l'hōme, cependant qu'en femme on s'abandonnoit aux regrets & aux pleurs. Cest ce qui faisoit que le mol Othon pour paroistre de visage ce qu'il estoit de cœur, apres s'estre bien rasé, se frottoit d'ordinaire le menton & la iouie avec du pain mouillé : remede qu'il pratiquoit pour empescher

que le poil ne luy creust en cest endroit là. Voila l'vsage du poil des sourcils, des paupieres, & de la barbe: & qui considerera le reste qui se pousse es autres lieux du corps, il y remarquera, peut estre, quelque autre cōmodité vray semblable. Il n'y a que ceste temeraire, arrogante, & orgueilleuse touffe de cheueux qui s'est indiscrettement plantée au plus eminent lieu de la personne, au dessus des plus nobles & releuées puissances de nostre ame, & du siege mesme de la diuine raison, de qui l'on ne sçauroit dire, à quoy cest qu'elle est bonne: Si ce n'est d'aduanture à produire au dehors de la teste de l'infection, de la crasse & de la vermine: & au dedās, des monstres de vanité & des chimeres de presumption, qui font que bien souuēt, vn Therfite difforme s'idolatrant soy-mesme dans le miroir, apres deux tours de peigne se trouue vn Nirée, vn Narcysse ou vn Adonis. Cest là tout le seruice qu'ils rendent au corps, au lieu de l'embellir ou le deffendre: verité qui est bien claire en elle mesme, mais que nos opiniaistres ne logerōt pas chez eux sans

beaucoup de bruit, de dispute & de poussiere. Cest à quoy nous en sommes, nous voicy dans la lice.

Et premierement quand à la beauté, pour y aller de bonne foy dès l'entrée, i'aduoüe qu'entre autres personnages de consideration qui ont soustenu que les cheueux font les hōmes plus beaux, Polypheme se fait voir au front de la troupe pour le plus remarquable. Car dans Theocrite, ce beau fils extrememēt passionné de l'amour de Galathée, parmy tout vn milion de beautez & de graces qu'il auoit receuës de nature liberalle, n'oublie pas à vanter celle-cy: ains il maintient fort & ferme que si de mēse luy, vn homme n'a le dos & les espaules ombragées de longs cheueux biē espais, il ne sçauroit estre aduenant n'y auoir bonne grace. Il auoit raison: Car si les cheueux sont des plantes, comme ceux de tantost nous vouloyēt faire croire, il en auoit sās mētir, la teste mieux peuplée, que la forest Hercinie ny toutes les Ardenes. Aussi ce ieune damoiseau, apres auoir bien peigné d'vn grand rasteau sa perruque mignō-

ne, se regardant dans le Crystal de son pere Neptune, son miroir ordinaire, se trouuoit si aimable & si fort à son gré, qu'il ne pouuoit s'esbahir assez de la delicateſſe de ſa Nymphe, qui au lieu de deuenir de Soufre & de Salpeſtre, de Naphte & de Bitume deuant luy, ſe monſtroit ſans meſure dedaigneuſe, cruelle & plus froide en ſon endroit que les plus roides glaçons des monts Riphées. Et vrayement ceſte cruelle fille monſtroit bien qu'elle auoit pris naiſſance des ondes de l'impitoyable mer, puis que le marbre de ſon cœur ne ſ'amolliſſoit aux plaintes d'un ſi gentil amant, n'y l'hyuer de ſes rigueurs ne ſ'attiedifſoit à tant de ſouſpirs qu'il pouſſoit de ſon eſtomach, qui teſmoignoient bien l'excez de ſa ialouſe amour: puis qu'ils ſentoient encore, la chair cruë des malheureux riuaux dont il auoit ſarcifon ventre. Apres le Cyclope, ie trouue qu'Artemidore fait vn meſme iugement des cheueux. Car, dit-il, autant d'ornement qu'apportent les enfans aux peres, autant en apportent les cheueux à la teſte. Et partant ſi quel-

cun

cun songe qu'il luy sont arrachez, c'est vn presage que la mort luy raura bien tost quelcun de ses enfans. Ne voila pas vne belle philosophie? ne voila pas vne plaisante boutade prophetique? que voulez que ie responde à ce Guilan le songeur, si ce n'est que ie resignela charge de luy repliquer à quelque Endymion ami de la Lune & des songes comme luy, ou à quelque Epimenide, qui luy refuera, dormant à son aise vne septentaine d'années, quelque subtile responce digne de ses refueries. Mais qui est celuy qui cognoit plus parfaitement que moy la vanité de cest affronteur? Ayant quelque fois songé que ie voyoy des maisons ardantes d'un feu clair & net de fumée, sans qu'elles tombassent n'y diminuassent: vne forte curiosité me porta à fueilleter les morfondus oracles. Et ie trouuay qu'un tel songe promettoit beaucoup de biens & de richesses aux pauvres. Moy donc qui scauoy bien que sans me faire tort, ie ne deuoy quand à ceste partie, ceder à homme de la terre, ie commence à conceuoir des esperances toutes

d'or & de pierrerie. Au bout d'un peu de temps ie songe qu'un grand dragon venoit à moy, qui me presentoit ie ne sçay quoy que ie n'ay sceu grauer en ma memoire. Consultant mon Thyresie, voila derechef que les dons du dragon ne me signifioient que thresors & richesses. Le songe peu apres que ie faisoys des grandes distributiōs, des données, & des aumosnes. Voyla, comme deuāt richesses à grāns tas à ceux de ma conditiō pauvres & miserables. Le songeay que ie voloy mediocrement haut, argent encore aux pauvres, que ie combattoy ie ne sçay qu'elles bestes, or & argent aux pauvres, que ie dormoy sur vn fumier, thresor aux pauvres. En fin que ie me trouuoys en des beaux festins & celebritez nocturnes, & tousiours mon interprete ne me promettoit que des thresors à grāns sommes: de sorte que voyant tant de songes & leur truchement si constamment prometteurs de ce que ie souhaitoys si ardemment: si vne sotte curiosité m'auoit auparauāt induit à recourir à ce charlatan: vne plus sotte niaiserie m'ayant fait croire à

ses fornetes, & que ie deuoys en bref recueillir toute vne moisson d'or ; m'endormant là dessus au lieu de penser à mes affaires, ie commençay selon mes forces à me donner du bon temps : attendant de iour à autre , que le ciel espanchast dans mes coffres ceste cornue d'Amalthée, iusques à ce qu'apres l'abus de tant d'années , voire de tant de lustres que i'abayay le vent d'une si ridicule attente : à peine en fin le sentiment de ma misere me mist-il hors de ceste piperie, & me fit voir que ie songeoys, voire que ie refuoys encore,

Et tu songes, voire tu refuses encore, me dira quelque partisan des cheuelus. Ny a-t'il point d'autres gens dont l'autorité pese plus que celle du Cyclope ou d'Artemidore, qui ayent maintenu que la grace du corps est apuiée sur les cheueux, autant que autre chose. N'as-tu iamais leu ce qu'on trouue de ce sage legislateur qui conseilloit à ceux de Sparte de porter les cheueux lōgs, pour autant, disoit il, qu'ils font trouuer les beaux plus beaux, & les laids plus terribles aux ennemis ? n'as-tu iamais veu ce

que dit S. Ambroise mesme, que la che-  
uelure fait reuerer les vieillards, qu'elle  
est venerable és prestres, terribles és  
guerriers, bien seante aux iouuançeaux,  
de bonne grace és femmes, & douce &  
aimable és garçons. Il me mettra ces au-  
toritez en barbe, enfilât en suite vne lō-  
gue cordelée de loüanges des cheueux  
accompaignées d'autant de raisons,  
pour me prouuer que c'est en fin pour  
nous faire beau fils que nature les dō-  
ne. Sur quoy me tenant en cest endroit  
& à la duis & à peu pres aux termes d'un  
de nos escriuains François, si fameux  
parmy les cheuelus les mieux goffrez,  
qu'ils n'ont point d'autre breuiaire, que  
ses escrits n'y d'autre oracle que ses  
phantaiesies : pour leur faire plaisir ie re-  
pars premierement avec luy, que quant  
à la beauté du corps auant de passer ou-  
tre, il me faudroit sçauoir si nous som-  
mes d'accord de sa description: & qu'il  
est vray semblable que nous ne sçauons  
guere que cest que beauté en nature &  
en general: puis qu'à l'humaine, qui est  
la nostre, nous donnons tant de formes  
diuerfes: de laquelle, s'il y auoit quel-

que prescription naturelle, nous la recognoistrions comme la chaleur du feu. Mais nous en phantasions les formes à nostre appetit. Il y a des nations qui la peignent noire & basanée, aux leures grosses & enflées, au nez plat & large: & chargent de gros aneaux d'or, le cartilage d'entre les naseaux pour le faire pēdre iusques à la bouche. Cōme aussi la leure de dessus de gros cercles enrichis de pierrerie: de sorte qu'elle leur tombe sur le menton, & consiste leur grace à monstrier leurs dēs iusques à la racine. Il y a des quartiers où les plus grandes oreilles sont les plus belles: & les estendent ceux du pays autant qu'ils peuuent par artifice, iusques là qu'on voit en vne nation Orientale ce soing de les agrandir, en tel credit, & de les charger de pesans ioyaux, qu'à tous coups il s'en trouue qui passent leur bras vestu par vn trou d'oreille. Il est ailleurs des nations qui noircissent leurs dens avec grand soing, & ont à mespris de les voir blanches: ailleurs ils les teignent de couleur rouge. Les Mexicanes ont en si grande recommandation la

grandeur des tetins qu'elles affectent de pouuoir donner la mamelle aux enfans par dessus l'espaule, nous formeriõs ainsi la laideur. Les Italiens façonnent la beauté grosse & massiue : les Espaignols vuidée & estrillée, & entre nous l'un la fait blanche, l'autre brune : l'un molle & delicatte, l'autre forte & vigoureuse: qui y demande de la mignardise & de la douceur, qui de la fierté & majesté. Voylà qu'elle discordance d'opinions il y a touchant la description de beauté, & comme nos phantaisies en diuersifient l'idée, selõ les diuers gousts d'un chacun. Or ceste diuersité se trouue bien encore plus grande quand au particulier iugemẽt qu'on fait des cheueux. Car les vns ne les scauroyent voir de bon œil s'ils ne sont d'une telle couleur, les autres d'une telle, les vns ne les peuuent souffrir que sous une telle tonsure, les autres sous une telle. Les Anciens Gauloys laissoyent croistre les leurs sur le deuant, & rasoient le derriere de la teste, representans en quelque sorte l'occasion des poëtes, qu'il falloit empoigner, tandis qu'elle mon-

estroit le front, sur peine des'en repentir, si on luy souffroit de tourner les espaulles. Les Abantes au contraire, peuple d'Eubée se rasoient le deuant & nourrissoient le derriere. Qui plus est en fait de cheueux, ce qui est trouué beau en vn tēps est mocqué & trouué laid en vn autre. Ce qui est approuué és hommes d'vne condition, est reprouué és autres & iugé de mauuaise grace. Les Lacedemoniens vn temps fut, ne nourrissoyēt point leur perruque, puis le temps vint qu'ils en prindrent la coustume. Les Argiues la nourrissoient, & puis ils s'en deffendirent l'vsage. La plus part des sectes des Philosophes par vne affectation de grauité portoyent les cheueux longs; mais ceux qui faisoient profession de se mocquer de la pauvreté, de brauer la douleur, de mespriser le mespris & la mort mesme: qui prenoient plaisir pour l'essay de leur patience, à se faire chatoüiller à la goutte & à la colique, la plus genereuse secte, en vn mot les Stoïques se rasoient la teste iusques au cuir. Et quant aux sages Prestres d'Isis ils ne se contentoyent pas de raser

tant seulement leur teste: ils s'estimoyent pollus, si encore ils ne mettoient à bas leurs fourcils. Quelle & combien remarquable se trouue en ce temps mesme ceste varieté, non seulement au regard de plusieurs nations, mais qui plus est d'une mesme Ville & d'une mesme Bourgade, ie ne veux que l'exemple des Mores de Barbarie pour en seruir de preuue. I'en suis vn tesmoing oculaire, ayant ces années passées vne generosité de chauue, malgré les menaces de la mer & les embusches des corsaires, porté la foiblesse de mon corps iusques à la cour du Cherif. Cest en ces quartiers là qu'on void, & cest là que iay veu les cheueux asubjetis à tant de tonsures, qu'une bonne partie des differences eschape à ma memoire. Les ieunes filles de sept de dix de douze & de quinze ans diuisent en quatre parts leur cheuelure, en façon qu'elle represente naïfvement & les allées & les carreaux de nos iardins. Vous diriez qu'elles sont encore la de l'opinion de nos forgeurs de plantes. Pour les hommes, eux se ioians aussi fort diuersément de leurs cheueux, cō-

uiennent neantmoins presque tous en ce-cy, qu'ils en laissent croistre vn toupet, qui sur le sommet de la teste, qui sur le derriere, & qui, de mesme qu'il se fait parmy nous, à l vn des costez. Oseray-ie mettre icy, que demandant la raison de ceste coustume, quelque vns me dirent bien, que c'estoit par là que les parens & amis faisoient leurs morts pour les tourner & virer à leur aise lors qu'ils pleuroient & qu'ils menoyent dueil sur eux : mais qu'à la mesme demande vn ieune coquin de More me paya de cest impie & profane repart, que Dieu deuoit vn iour prendre les vns par ceste touffe pour les tirer au ciel, & que quāt aux autres qui estoient tous ras comme luy, ce seroit par la partie honteuse qu'ils seroyent empoignez.

Or reuenans à nous il n'y a point de doubte que tous ceux qui iadis soubmettoient leur teste au rasoir, ne se creussent des-honorez de se voir couuerts de cheueux, de sorte que ne pouuans obtenir de nature la faueur d'estre chauues, ils amendoyent ce defaut le mieux qu'ils pouuoient, tachans de

ressembler aux chauues tout autant qu'il leur estoit permis. Quand aux autres qui nourrissoient leur cheuelure, les plus sages d'entr'eux le faisoient, non pour s'estimer bien parez, mais au contraire pour monstrier, qu'en laissant croistre sur eux ce qui disgracioit leur personne, ils dedaignoyent toute ceste elegance & delicat soing qu'on met à l'embellissement du corps. Tels estoient, exceptez les Stoïques, les Philosophes d'ont nous auons fait mention. I'entens ceux qui auoyent des cheveux : car la plus part n'estoyent en peine ny de les nourrir n'y de les couper, comme ayās l'honneur d'estre chauues. De ce rang fut entre autres, la lumiere & l'honneur des Philosophes, le flambeau, le phare & le Soleil de la sagesse humaine, ce grand & incomparable Socrate qu'Apollon de sa propre bouche voulust prononcer le plus sage de tous ceux de son siecle. Aussi quoy qu'au reste il fut le plus modeste de tous les hommes du monde, & le plus sobre au fait de ses propres loüanges, si ne pouuoit il se cōtenir iusques là dans les limites de la

modestie, qu'il ne se glorifiast souuent de la ressemblance qu'il auoit à Silene & d'estre chauue comme luy, signifiant par là en termes couuers l'excellence de sa sagesse & de son iugement. Car, à ce que disent les Poëtes, & comme à remarqué nostre chauue Synese, Iupiter ne sceut choisir vn plus sage & capable Gouverneur de la libertine ieunesse de Bachus son enfant, que le chauue Silene. Il fallut de necessité que ce fut vn chauue qui se peut maintenir sobre & de sens rassis, tandis que le reste chancelloit d'yuresse : & qui temperast avec la froideur de sa prudence les bouillantes fongues de ceste cheueluë brigade, que l'âge & la folastre humeur plongeoyent à tous les coups dans les courans de la desbauche. Cest de ceste ressemblance que se contentoit ce demon de sapience. Le vulgaire grossier, lourde masse de plomb, n'entendoit pas ce qu'il vouloit dire : & comme presque en tous les autres discours de ce diuin personage ne s'arrestoit qu'à l'escorce des parolles. Seulement quelques vns des plus r'affinez iugeoyent qu'il pretē-

doit s'accompagner à certaines boistes des Apothicaires d'alors qu'on appelloit Sileres; boistes, comme dit Rabelais, propres à faire rire: comme celles qui estoient par le dehors toutes peintes de figures boufonnes, de cerfs volants, d'oisons bridez & de canes bottées: mais quand on les ouuroit, alors demeuroit on ravi de l'excellence des drogues & de l'odeur des onguens précieux dont elles estoient pleines. Tout de mesme, disoyent ils, Socrate faisoit bien rire d'abord ceux qui le rencontroyent & qui iettoient les yeux sur les traicts ridicules de son visage. Mais aussi-tost qu'il venoit à tirer de son esprit, ainsi que d'une boiste ce qu'il cachoit de rare & précieux, alors ravissoit il le monde par la diuinité de ses discours & par la hauteſſe de ses conceptions. Ceste interpretation ne luy fait point des-honneur: tant y a que nous tenons des plus entendus & mieux informez l'explication premiere. Je dy donc que les Philosophes qui portoyent longs cheveux en vsoient ainsi, pour (suiuant leur profession) tesmoigner

par ce signe le mespris du corps & de la beauté corporelle : d'où venoit que ceux qui tranchoyent du Philosophe à fausses enseignes, s'accoustroyēt à leur guise, n'ayans au reste rien de Philosophe, que le poil & le manteau. Le semblable presque se pratiquoit entre les Romains par tous ceux qui estoient mis au rang des accusez d'un crime capital. Ce qui aduenoit lors que le iuge, apres auoir reietté toutes exceptions dilatoires, declinatoires, & peremptoires declaroit qu'il falloit passer outre au fait du preuenu. Tels criminels alors pour esmouuoir à pitié les iuges, & témoigner enuers eux toute humilité, prenans & vn habit, & vn maintien conuenable à leur fortune, s'affubloyēt d'une longue robe noire & crasseuse, & laissoyent croistre leur barbe & leurs cheveux nonchallammēt au alleez, qu'il n'estoit permis de couper, que premier il ne fussent ou condamnez ou absous.

De tant de gens si diuers en gousts & iugemens sur le fait des cheveux, qui choisirons nous pour iuges de la con-

trouuerse, & pour decider par leur sentence s'ils contribuent à la beauté ou s'ils font le rebours? Si nous nous en remettons aux plus sages, il est clair que les cheueux n'y gagneront rien. Toutefois ie voy bien que tous ceux que nous auons alleguez seront, où de l'un ou de l'autre costé, tenus pour suspects en la matiere. Mais s'il le trouue des hommes candides, francs & nets de toute alteration, non passionnez non partiaux, non preoccupez serez vous si delirables, messieurs, de ne vouloir pas acquiescer à leur iugement, n'y passer cōdemnation en cas qu'ils iettent la feve noire contre vous? Or tels iuges assortis de toutes les conditions que i'ay dictes, si nous voulons nous les trouuerons encore. Ce seront, non pas les Philosophes de Grece, non les Gymnosophistes ou Brachmanes des Indes, non les Mages de Perse, non les Chaldées d'Assyrie, non les Prestres d'Egypte, non les Druydes ny les Bardes des Gaulois: mais biẽ seront ce ceux que volontiers vous ne deuineriez pas que ie choisisse pour iuges, ce serōt les Toupinābaous,

& autres peuples leurs voisins que nous appellõs Sauvages: peuples à qui l'erreur & le desbordement, n'ont encore que peu ou point alteré les droictes & innocètes inclinatioõs que nature auoit mises en l'ame de l'homme lesquels guidez de la pure lumiere de leur raison non offusquée de loix n'y de coustumes extrauagantes, cognoissans combien il est bien seant aux hommes d'estre chauue, serasent (i'entens les masles) autant qu'ils peuuent le deuant & le sommet de la teste, afin de paroistre chauues, & cherchēt dans ceste ressemblance la perfection de leur grace & de leur beauté. Ce sont là les iuges qu'il nous faut pour vider la querelle, & ie ne rougiray point à dire, que, s'il n'est question que d'une humaine autorité nous ne sçaurions faire vne plus iudicieuse election. Qu'on ne die pas que cest leur nonchalāce à se parer qui leur fait mespriser les cheveux, puis qu'il n'y a nation sur la terre qui si cherement ny si courageusement accepte l'ornement & la parure du corps que ces gens-là, comme ceux qui s'enjoliuent non au

prix de l'or ou de l'argent, mais de leur propre sang, qu'ils font ruisſeler de diuers membres de leur corps, cependant qu'ils ſe les decouppent à grandes balafres pour parade & pour marque tout enſemble des degrez de leur valeur. Non moins magnanime eſt le choix qu'ils font de l'ornemēt particulier de la face, laquelle ils ſe percent & aux ioües & au menton, pour y enchaffer leurs belles pierres vertes & leurs os biē polis. Mais lors qu'il leur prend enuie d'adiouſter des atours plus delicats à ces ornemens ſi virils & de ſ'adjancer vn peu plus mollement : ce n'eſt ny à peigner ny à goffrer leur perruque qu'ils ſ'amuſent : au contraire apres en auoir retranché la partie qui leur faiſoit honte ( celle meſme qui manque aux chauues ) ils mettent en ſa place des belles plumes peintes des plus agreables couleurs, ayans le iugement de cognoiſtre, que comme nature en embellit les oiſeaux qui les portēt, puis qu'elle leur auoit refusé l'industrie de ſ'embellir par art : elle meſme a donné aux hommes l'eſprit de les emprunter d'eux  
& d'en

& d'en empanacher leur teste, puis qu'au lieu de leur auoir decoré ceste partie d'un ornement digne d'eux, elle l'a de telle sorte des-honorée, que cōme si ceste bonne mere se repentoit d'auoir fait ceste iniure au plus glorieux de ses ouurages, non seulement elle rend chauues de bonne heure les plus honestes hommes: mais mesme fait naistre chauues des nations entieres, comme le sont entre autres les Myconiēs. Nous rirons de la lestise de nos Bresiliens, elle nous paroistra sauuage, mais ils riront avec plus de subject encore de l'impertinence qui nous en fera rire. Ne dra-pons point sur leur nudité, ie vous prie, ny ne l'alleguons pas pour affoiblir mes raisons. Leur nudité ne nous seroit non plus qu'à eux messeante, si de mesme eux nous auions retenu la simplicité. Mais ils mangent les hommes, presferez vous, voila de belles gens pour opposer leur exemple au iugement des testes cheuelues & faire bouclier de leur autorité. Ie ne veux pas les faire des anges: ils ne peuuent estre hommes icy bas & parfaicts tout ensemble, si ce n'est

que nous appellions parfaicts ceux qui ont le moins d'imperfection. Ils mangent quelquefois en leur vie leurs prisonniers de guerre, pour venger vn pareil traictement que ceux à qui ils doiuent leur naissance ont autrefois receu de ces publiques ennemis. Ie n'approuue ny n'excuse vne façon de faire si Barbare, i'y recognoy de bonne foy l'humaine infirmité. Mais si ( comme ont desia fait quelques vns de nos sages) nous y prenons bien garde, nous mesmes qui au recit d'une telle coustume mordons nos leures d'estonnement & vouïtons nos fourcils de merueille, combien nous trouuerons nous plus coupables que les mangeurs de ces cruels morceaux. N'estās entr'eux qu'un nion & que paix, que concorde & qu'amour ils tuent les ennemis publiques & les mangent tous morts : parmy nous tous les iours ô Barbarie plus barbare, nos Rodomons & nos Usuriers, nos Scyres, doif-ie dire, & nos Canibales, ceux-là pour vn caprice massacrent sans pitié leurs amis mesmes, leurs parens & leurs freres, & font là consister leur plus

grande gloire : & ceux-cy pour le gain d'une pite les deuorēt viuans. Mais que vay-ie alleguant & le Bresil & les Bresiliens ? C'est biē de la façon que ces peuples en vsoyent durant qu'ils voguoyēt sans tempeste dans la mer d'une calme innocence, & que leur âge n'estoit que de pur or : mais hélas ! ceux de nous qui ont avec tant de hazards passé la mer pour leur aller apprendre l'iniustice, l'auarice & l'ēuie, ce sont eux mesmes qui leur ont appris n'aguere la vanité de porter les cheueux comme nous. La mesme humeur au reste que ceux-cy ont eu si longuement en l'autre hemisphere, eurent iadis en nostre monde, & l'ont peut estre encore les Arimphées, peuple habitant assez pres des montagnes Riphées, non loing des Hyperbo-reans. Car de ceux-cy, comme en font foy les Anciens Geographes, les bois estoient le domicile, les bagues & graines des arbres l'aliment, les mœurs & coustumes plus prisées la douceur & la clemence, & le mespris des cheueux, l'ornemēt. C'est ce peuple innocent qui fut tousiours tenu pour sacré & inuiol-

lable des nations les plus farouches & indomptables, iufque là que ceux mefmes qui ſe refugioyent vers eux, ſe mettoyent à l'abry de toute crainte, & ne pouuoient eſtre tirez delà, non plus que d'un Afyle & d'un Saint Temple de ſeureté.

Mais ſi nonobſtant toutes ces raifons la ſimplicité des vns & des autres vous eſt à contre cœur, & que vous appelliez lourderie ce qui ſe doit appeller iugement: que me reſte-t'il encore, ſi ce n'eſt comme vn ſecond Aſtolfe de trouuer le moyen de m'enuoler au ciel, pour vous rapporter voſtre ſens eſgaré, dans des preuues ſi fortes & ſi claires, que les plus obſtinez en facent voir la force en ſe taiſant: ou leur impieté meſme en les oſant conteſter. Me voicy deſia reuenue du ciel, & voicy non ſeulement des preuues, mais des arreſts irreuocables du ciel. Eſcoutez les & vous orrez, que l'homme ſe deſ-honore qui nourrit ſa cheueſſure, que nature meſme le luy enſeigne, & qu'eſtant la gloire de Dieu & ſon image, il doit aller la teſte deſcouuerte: c'eſt à dire, non cachée n'y

empeschée d'une espaisse criniere. Et comment peut apporter de l'ornement vne chose que le ciel mesme condamne au des-honneur & qu'il afferme estre honteuse. Les iuges de la terre ne vous contentent pas. Iay honte en bonne foy, que pour vne chose si honteuse, & pour biẽ exprimer la plus honteuse des choses, pour vn poil, il ait fallu consulter les oracles du ciel. Les voila toutefois, que leur repliquerez vous? que leur opposerez vous? auez vous des objects receuables contre eux? peut-estre soupçonneriez vous celuy de qui la bouche & la plume seruirent autrefois d'organe à les prononcer & à les escrire, de les auoir en faueur des chauues falsifiez. Car de vray ce diuin truchement estoit encore du rang des chauues. Lucian, commel'ont mesme remarqué les amis des cheueux, n'a pas voulu, quoy qu'ennemi iuré des chrestiens, luy desrober ceste gloire, nous descriuant vn chauue Galileen, au nez aquilin, & qui par l'air auoit penetré iusques au troisieme ciel, d'où il auoit remporté la cognoissance de mille beaux mysteres. Il n'y a per-

sonne qui mette en dispute qu'il ne soit là parlé de ce glorieux vaisseau d'élection, non qu'il fut Calileen, mais ainsi appelloit on par mépris les chrestiens aux premiers commencements de l'Eglise naissante. C'est luy qui fut ravi iusqu'au troiesme ciel, & ne fut le premier des chauues qui iouyt de cest honneur. Ce grand Prophete qui ouurist le Iordain en deux, y auoit fait plusieurs siecles au parauant son entrée sur vn char flamboyant. Car quelle apparence y a-t'il de doubter que ce mignon du ciel ne fut chauue, non seulement en si grande vieillesse, mais mesme en si grande excellence de vertus & de graces diuines. Il le fut, & le fut encore son bien heureux disciple, successeur de sa charge & de ses perfections. Et cestuy-cy ne le fut que trop au dommage de ceste marmaille qui brocardeoit sa teste honorée de ce defect. Car le ciel mesme prist le soing d'inspirer à la vengeance de ceste iniure la cholere des ours, qui seruerēt sur le champ sur ces petits impertinens mocqueurs, & les mirent en pieces, voulant la diuine iustice que des

animaux les plus chargez de poil, chastiaſſent ſi rigoureusement, ceux qui avec tant d'insolence en reprochoyent la rareté, ſans quela cōſideratiō de leur bas age meſme, les peut ſauuer d'une punition ſi ſeuerement exemplaire. Cependant, meſſieurs des cheueux, ie vous prie de remarquer en paſſant vn petit aduantage des chauues, c'eſt de monter au ciel viuant & couuers de leur corps, par où vous deuez apprendre qu'il n'en va pas des cheueux des hommes, comme des plumes des oiſeaux. Il faut que les oiſeaux s'habillent de plumes pour ſe guinder en haut & s'approcher du ciel: mais les hommes ſe rehauffent par deſſus les eſtoilles, apres qu'ils ſe ſont deſpouillez des cheueux. Ainſi ſe deſpouille la cigale, ainſi ſe deſpouille le miraculeux ver à ſoye des membranes qui les couurent, pour mettre en liberté leurs aiſles & s'eſleuer en l'air. Auſſi n'eſt ce pas ſans propos que des Theologiens non vulgaires ont doubté, ſi les corps glorifiez qui ſeront introduits apres le iugement dernier dans l'eternelle felicité, y ſeront receus avec leurs

cheueux, ou bien si auant que d'entrer, ils n'en seront point desgarnis : leur paroissant bien absurde de loger vn excrement si contemptible dans le seiour de gloire. Il ne faut pas s'estonner s'ils ne peuuent se respondre que les poils ayent l'entrée au ciel : puis que l'espouuantable gouuerneur de l'aby sme, qui les aime si fort, & qui en emprunte l'vn de ses plus beaux titres, en fut autrefois si honteusement ietté bas. Las ! que ie crains que ce fardeau, ores que biẽ léger ne soit à trop de gents vn enclume sur la teste, les poussant vers le cẽtre, & les empeschant, ie ne dis pas de voller au ciel, mais mesme d'y tourner les yeux & la pensée. Au reste si le poil ne peut entrer là haut, aussi ne peut-il pas avec trop d'assurance se promettre ; ce que l'autre se promet chez le Poëte, si ie ne puis fleschir le ciel du moins esmouray ie l'Acheron. Non pas qu'on refuse l'entrée de ces lieux effroyables à ceux qui portent des cheueux, ny que pas vn deux s'en retourne à faute d'y trouuer ou loger : mais bien c'est que, s'il en faut croire quelques escriuains de l'antiqui-

ré, auant de passer la riuiera infernalle  
on fait quelquefois le poil assez rude-  
ment aux ombres avec la coignée, de  
peur que la barque surchargée de ce  
pois ne s'aualle sous l'eau. Mais nous  
gauchissons du droict fil de nostre dis-  
cours, reuenõs au poinct. Nous estions  
aux termes de chercher si les cheueux  
sont vne piece de la beauté, & auons  
desia gaigné beaucoup de pays dãs ce-  
ste dispute: voire si nous voulons, nous  
auons desia fourni la carriere entiere:  
puis que nous auons monstré par preu-  
ues suffisantes, & par exemples & par  
authoritez tant diuines qu'humaines,  
qu'ils ne sont à rien moins propres qu'à  
nous faire beaux: & qu'au rebours ils ne  
sont qu'un des-honneur & un reproche  
du corps humain. Mais pourray-ie bien  
obtenir de vous la patience fauorable  
d'ouyr quelque chose de plus releué,  
plus haut & plus mystérieux, qui vous  
apprendra encore mieux, comme les  
chauues ont non seulement les plus  
belles testes: mais, qui plus est, les plus  
belles ames? ha non! ie ne veux pas faire  
ceste iniurè à la beauté de vos esprits, de

ne croire pas qu'au premier son d'une si douce promesse, leur curiosité ne se soit esueillée. Je l'ay desia mise en ceruelle, ie vay la contenter, & ie me persuade que si ie prens mon discours vn peu de loing, elle m'approuuera.

Dieu, premiere cause, principe & origine de toutes choses, crea de soy l'entendement, & de l'entendement fut creé l'ame du monde, qui meut, qui agit, qui regit & gouerne tout ce grand corps, sans en abandonner vn seul moment la conduite. Ceste ame, de l'entendement dont elle est engendrée reçoit vne Idée tres-pure, qui est la raisonnable, & vne vertu generatiue d'intelligences & formes immortelles : tout ainsi que de sa propre nature elle obtient vn seminaire de puissances sensitiues & vegetantes. Ces formes intelligētes qu'elle contient en infinie multitude ; & qu'elle (s'il faut ainsi dire) couue dans son sein, poussées d'une ardente ambition de gouerner & animer, de mesme que ceste grande ame, quelque corps qui leur serue de matiere, se sentent, qui plustost qui plustard, tressaillir du de-

fir de se desprendre & desunir d'auec elle, pour s'acquerir chacune à part le gouuernement de quelque petit monde. Adonc iettans leur regard d'en haut ainsi que d'une luisante eschauguette sur les corps inferieurs, elles ne sont si tost esprises des attrayans appas qu'elles descouurent en la matiere, & n'en conçoient si tost l'amour, qu'elles ne se sentent au mesme instant fondre & couler en bas cōme appesanties par ces terrestres cogitatiōs. Il y a deux endrois où le cercle qu'on appelle la voye de laiēt coupe le Zodiaque, à sçauoir les deux poincts par où passent les signes de Cācer & de Capricorne. Les Philosophes appellēt ces deux poincts les portes du Soleil: par ce que les deux Solstices se rencontrans là, il semble que le Soleil ne puisse passer outre, & soit cōme contraint de rebrosser vers la Zone torride, les limites de laquelle il ne frāchit iamais. C'est par ces deux portes que les ames viennent en terre & que de la terre elles s'en remontent au ciel. C'est pourquoy l'une est appellée la porte des hommes, l'autre celle des Dieux. Celle

de Cancer est la porte des hommes, par ce que c'est par là que les ames descendent. Le Capricorne, celle des dieux: par ce que par là les ames retournent au siege de leur propre immortalité. De là vient que Pythagore estimoit que du cercle de laict en bas, commençoit la domination & empire de Pluton; à cause que les ames s'estans deualées de là, semblent desia s'estre desparties de la diuinité & du conforce des intelligences pures & immortelles. Et c'est aussi pourquoy le mesme philosophe tenoit, que le premier aliment qu'on presente aux enfans qui viennent de naistre, c'est le laict: par ce que lors que les ames prennent la descente pour s'aller vnir aux corps, leur premier bransle & mouuement commence de cé mesme cercle. Or quand elles sont encore au Cancer toutes prestes à couler, par ce qu'elles n'ont encore abandonné le cercle, de laict, elles retiennent leur originaire pureté: mais lors quelles sont paruenues au Lion, c'est là quelles prennent le commencement de leur future condition. Et d'autant qu'en la place du

Lion sont les premiers rudimens de la naissance de l'homme, & comme les esbauchemens de l'humaine nature, & que le Verseau se trouue vis à vis du Lion, de sorte que l'un se leue au mesme instant que l'autre se couche : c'est la cause pourquoy le Soleil entrant au Verseau, les Anciens faisoient certaines effusions, & propitiations pour les Manes, comme estant ce signe contraire à la vie humaine. De l'endroit que nous auons dit, asçauoir des confins du cercle de lait & du Zodiaque, les ames commençans à descendre, de la forme ronde, qui seule est la forme diuine, s'estendent & s'allongēt en la pyramidale, tout ainsi que du poinct naist la ligne.

A mesure qu'elles descendent, on dit qu'en trauerfant chacune des Spheres, elles produisent quelque vn des mouuemens qu'elles doiuent exercer dans le corps. En la Sphere de Saturne, la ratiocination & intelligence : en celle de Iupiter la vertu d'agir, qu'on appelle pratique : en celle de Mars, l'ardeur de l'animosité, qu'on appelle irascible : En celle du Soleil la sensitiue & imagina-

tiue : en celle de Venus la concupifcible: en celle de Mercure, la prononciatiue & interpretatiue : & en celle de la Lune, la vegetatiue. Mais par ce que les ames raisonnables eftans diuines & immortelles, & les corps corruptibles & mortels, il ne fe pourroit faire que deux natures fi difpareilles s'accouplaffent & alliaffent enfemble d'un liẽ si eftroit, fans l'entremife d'une fubftance pure, nette, & qui, comme prononce Aristote, refponde par proportion à l'element des eftoiles: à ceste fin les ames s'estans, ainfi que dit eft, du Zodiaque & du chemin de laiẽt, abaiffées iufques aux Spheres qui font au deffous, elles fe reueftẽt en paffant d'un corps pur, ætherée, & lumineux, qui leur fert comme d'une fimple, fubtile, & deliée chemife, ou pluftoft ceste fubftance qui participe de la nature, & de l'ame & du corps, eft cõme le Paranymphe qui moyenne les amoureuses approaches de ces deux parties, & procure la confommation de leur heureux mariage. C'est le lien & la couple de ces deux extremes qu'elle concilie & accorde l'un avec l'autre,

comme estant à tous les deux familiere. Car n'estât point du tout sãs corps, elle peut s'vnir avec le corps: & cōme estât plus pure que tout ce qui tient de l'element, elle peut aussi se conioindre à l'ame. Ainsi tenant quelque chose de l'un, & de l'autre, elle accouple la nature incorporelle avec la corporelle, l'immortelle avec la mortelle, la pure avec l'impure, la diuine avec la terrestre. Ces deux corps sont ce que les Philosophes & Medecins appellent communement la chaleur & esprit vitaux, dont le second qui est l'esprit, sert cōme de base, de sujet, & de matiere au premier qui est la chaleur: tout ainsi que dans le corps, l'humide radical sert d'appuy & de soustien à tous les deux. Mais en fin quelque pureté qu'il y ait en ces deux corps si est-ce qu'ils sētet tousiours biē euidēmēt les conditions de la matiere, de l'influxion de laquelle les ames estās abreuuées, elles sont (comme dit Platō en son Phædon) tirées vers le corps cōme tremblantes & chancellantes d'une nouuelle yuressse. Pour marque de ce beau secret, vous auez entre le Cancre

*Ce mot de chaleur, est icy nom de substance, non de qualité.*

& le Lion, le Goubeau du bon pere Liber qui a este placé iustement en cest endroit, pour marquer que c'est là que les ames descendantes pour aller informer les corps, commencent à estre at-  
taintes de l'yureffe qui leur vient de la matiere influante: & c'est là mesme encore que l'oubly compaignon de ceste yureffe commence imperceptiblement à les saisir. Car si les ames emportoient iusques dans les corps la memoire des choses diuines dont elles eurent la cognoissance, il n'y auroit point de dispute entre les hommes touchant la diuinité. Mais elles puisent toutes de cest oubly, à mesure que comme vn trait de feu, qui suit à trauers l'air l'amorce de quelque vapeur seiche, elles glissent en bas. Et partant en ceste basse terre, iac-  
çoit que tous n'ayent pas la science du vray, tous neantmoins en ont bien vne opinion, laquelle ne naist que d'vn defect & imperfection de memoire. Mais ceux là trouuent bien plustost le vray & en recourent la cognoissance, qui ont le moins puisé de cest oublieux breu-  
uage: parce qu'ils se ressouuiennent faci-  
lement

lement de ce qu'au parauant ils auoyēt  
fceu & cogneu dans le ciel. De là vient  
que les Grecs appellent la lecture, vne  
reconnoissance, & lire, reconnoistre,  
pour autant que toutes les foys que  
nous apprenons quelque chose, nous  
reconnoissons aussi-tost que c'est cela  
mesme, dont nous auions vne naturelle  
notice, auāt que l'influēce de la matie-  
reenyurast nos ames tendantes vers le  
corps. C'est ceste hyle ou matiere, de la-  
quelle empreinte d'idées ont esté faits  
tous les corps que nous voyons au mō-  
de. Mais la plus haute & plus pure por-  
tion de ceste matiere a esté des Anciē  
appelée Nectar & la boisson des Dieux:  
tout ainsi que la plus basse & plus trou-  
ble, lethé, le fleuve doubli, & la boisson  
des ames. Or quoy qu'il y ait en la natu-  
re vn nombre infini de corps, tant s'en  
faut qu'ils soyent tous indifferemment  
capables de receuoir ces diuines hostes-  
ses, qu'il n'y a que les estoiles dās le ciel,  
& les corps humains icy bas, qui puis-  
sent fournir vn logis digne d'elles. Cel-  
les-la, à raison de leur pureté & de leur  
formeronde: ceux-cy en partie à cause

de leur stature droicte & releuée, qui se-  
ble se reculer de la terre & la dedaigner  
pour s'approcher du ciel : en partie  
d'autant que la figure de leur teste ap-  
proche plus de la Spherique, qui seule-  
ment s'accommoder à la diuinité de no-  
stre entendement. Et partant entre les  
ames qui pipées d'une basse & rampan-  
te ambition de gouverner vn corps, s'a-  
cheminent vers la matiere, celles qui  
ont moins degeneré de leur diuinité &  
moins humé de l'influxion que nous  
auons dite, s'emparent chacune avec  
iugement de quelqu'un de ces corps lu-  
mineux qui roulent dans le ciel, lequel  
durant vn bien long temps elles infor-  
ment & animent. Apres celles-cy les  
autres qui ont plus retenu de leur gētil-  
lesse & se sont moins escartées de leur di-  
uine nature pour s'estre assez sobremēt  
abreuées de la matiere, elles ont enco-  
re la discretion de choisir les testes les  
plus dignes : au lieu que les autres qui se  
sont tout à fait enyurées, ayans perdu  
route puissance d'election & ne tenans  
que bien peu des conditions de leur  
premiere nature, sans faire vn tel triage

s'accommodent facilement dans les pires testes. Mais quand au bout de quelque temps ces aimes plus nobles & genereuses s'aduisent de la bassesse de leur condition, & du miserable eschâ-ge qu'elles ont fait d'auoir quitté vn sejour répli de lumiere & de gloire, pour se ietter dans vn meschât cabaret, mais bien plustost dans vn croton obscur & tenebreux, où c'est qu'au lieu des objects immortels dont elles iouyssoyent, il faut qu'elles se contentent de ie ne sçay quels simulacres, spectres, & phantomes menus venans de dehors, que les sens leur presentent: sans pouuoir se promettre encore qu'il y ait du rapport entre ces idoles sans corps & les subjects d'où elles partent. Alors commencent elles à sentir mille pointes de regret pour se voir confinées dedans telles cloaques. Elles fremissent d'impatience des'en desprendre & de briser le lien qui les y tient attachées, bruslantes d'vn desir ardet des'aller reioindre au premier beau duquel elles se ressou- uiennent estre issues. Etc'est alors que, comme cest animal qui n'est porc que

de nom, animal dont le dos est herissé d'une forêt de pointes, lors que par fois on le met en humeur d'esueiller sa cholere, il fait à tous les coups en se recoüant sauter à bas quelques vnes de ses espines poignantes. Tout de mesme ces belles & diuines ames se roidissant (& s'il faut ainsi dire) se recoüans pour eschapper de leur obscure prison, font tomber les cheueux dont les testes qu'elles emprisonnent se trouuent reuestues : Mais c'est principalement du costé par où elles fretillent de sortir, c'est seulement vers la part qui regarde le ciel, où aspirent tous leurs vœux. Ne pouuans toutefois contre la loy du destin anticiper le terme de l'esslargissement qu'elles cherchent, elles sont contraintes d'arrester, ayans du moins ce contentement de s'estre ouuertes mille iours, & mille fenestres, que l'ordure du poil leur tenoit au parauant estoupées. C'est par ces flancs ouuers, & par ces canonieres qu'elles descochent au ciel, comme fleches empennées, leurs desirs embrasés, leurs regards amoureux, & leurs plus deuotes pensées. Les Sages d'Hebrurie de qui les Romains em-

prunterent les sacrées ceremonies de leurs augures, auoyent bien entendu ce mystere. Car il falloit necessairement qu'à Rome la lanterne des Augures fut tousiours descouuerte, & que la lampe qui brusloit au dedans ne fnt iamais cachée aux yeux du ciel. Ceste mystique lanterne ainsi descouuerte ne representoit que le chauue, & n'apprenoit si ce n'est à imiter le chauue, de qui l'ame releuée est ceste lampe pure & celeste, qui dedaignant de nourrir sa diuine & immortelle flamme de ces foibles desirs & de tous ces bas pensers qui rampent sur la terre: cependant qu'elle attend le congé de reuoller au ciel, où est son aliment incorruptible, & où loge en sa plus haute gloire l'eternel object de son amour, commence desia à descouuir le roict de la geole caduque où elle est enfermée, afin de contēpler & voir mieux à son aise le palais superbe où elle a pris origine. Or quand ces belles ames ont en fin le congé desiré, quoy que pour leur generosité & la constance de leur amour enuers la diuinité, qui leur a fait mespriser les choses basses & perilla-

bles, elles se foyent renduës dignes de recouurer la place qu'elles auoyent au fejour de l'immortalité, & de se paistre comme deuant à plain souhait de l'ambrosie & nectar celeste: si est-ce quelles n'y vont pas tout d'une tire: mais y montans comme par vn escalier à repos, elles s'arrestent pour vn temps dans les corps flamboyans des estoiles, logis qu'elles trouuent tous prests à les recevoir, à mesure que les autres intelligences plus pures qui habitoient dedans, merisans de mesme qu'elles de recouurer leur premiere gloire par vne belle repentance de l'auoir mesprisée, leur cedent la place, & vident de là, pour s'aller reunir à la cause premiere, leur souverain bien & perfection derniere. Là se reposent elles pour vn temps dedans ces loges radieuses, afin qu'à leur tour de mesme que les autres, elles facent place à celles qui auront meritè vn pareil honneur, & que de là elles en fin se portent au faiste & plus haut sommet de l'eternelle gloire. Mais quand à celles qui se sont acoquinées dans leurs failles cachots, & qui semblables aux

grains qui se gastent & pourrissent dās leur escorce & sous leurs arestes auant que de pouuoir meurir: se corrompent & deprauent dans les testes, elles ne font que rouler de teste en teste, durans ainsi en ce chetif estat, & perpetuans leur misere à iamais: si ce-n'est que quelcune se rauissant & se faisant sage comme par vn miracle, apres vn long tour de siecles & de milliers d'années, passe des testes cheuelues aux testes chauues, des testes chauues aux estoiles, & des estoiles arriue en fin à l'estat des premieres. & partant qui voudra distinguer les ames nobles, ces ames belles & releuées qui doiuent quelque iour vestir vn de ces astres brillans qui tournent dans les cieux, & qui plus est s'aller de là reioindre au souuerain moteur de ces eternels & merueilleux globes, pour se perdre à iamais dans vn abyssme de ioye, de plaisirs & de gloire: qui voudra di-ie les distinguer d'avec les ames ignobles, basses, & basses mēt attachées à l'amour du corps & des choses terrestres, qu'il prenne garde dās quelles festes elles logent: & qu'il tiennē cecy de

moy pour vn oracle auffi certain, que si ie le prononçois sur le trepied de Delphes, que dans les testes chauues sont les gētilles ames: tout ainsi que les grossieres & terrestres dedans les cheuelues. Pour le faire court, les estoiles ne sont que les chauues du ciel: & les chauues ne sont que les estoiles de la terre. C'est pourquoy ie conclu que les chauues excellent autant en beauté soit du corps soit de l'ame par dessus tous les autres hommes, que les estoiles par dessus tous les autres corps. Et qu'y à t'il de plus beau, voire de plus diuin, que de estre lumineux comme les testes chauues, lesquelles par leur rondeur & lumiere representent si parfaictement les estoiles, que les Grecs pour ceste raison ont appellé les chauues, petites lunes. En quoy iacoit qu'ils les esgalent à vn corps celeste, si leur font ils encore beaucoup de tort, ce me semble. Si ce n'est qu'ils appellēt ainsi ceux qui n'ont encor ataint la perfection de ce noble defect, lesquels à la verité se doiuent contenter de ce titre, durant qu'ils sont ceste heureuse perte: parce qu'ils expri-

ment en ce changement quise fait en leurs testes les alternations qui arriuent à la Lune, qu'on void croistre peu à peu de lumiere, iusqu'à ce qu'elle soit en son plein. Mais quand les testes sont au plein de leur chauueté, & par consequent au plein de leur lumiere, alors sont elles comparables, non plus à la Lune, comme celles qui ne sont plus subjectes à ces successiues mutations comme elle: trop mieux se peuuēt elles appeller des Soleils qui luisent à plein rond, non par emprunt, comme la Lune, mais de leur propre lumiere. C'est de ceste diuine lumiere qu'on voyoit esclatter la teste du fameux Vlisse, lors que les courtisans de Penelope le brocardoyent sans le cognoistre: petis galans affectez, qui deuoyent quoy que plus de cent, tous perruqués, estre mis à mort par vn seul chauue. Ces fayneans le voyans occupé à rallumer son flambeau, luy remonstroyent en le raillant qu'il nauoit à faire de prendre ceste peine, puis que sa teste estoit seule capable d'esclairer la maison entiere. Voila la seule prise que leur impudente

raillerie pouuoit assoir sur vne telle teste, c'est de luy reprocher ses perfectiōs & ce qu'elle monstroït de diuin par le dehors : comme qui reprocheroit au Soleil qu'il auroit tort d'allumer vne bougie pour esclairer vn petit coin de sale : puis qu'il suffit de sa lumiere à donner iour à tout le monde. Augustes'obligeoit fort, ce dit-on, si en parlant à luy on baïssoit coup à coup le regard contre terre, comme si l'esclat de ses yeux eust esblouy ceux qui le regardoyent. Mais s'il eust esté chaue, combien plus se fust-il contenté de voir que les flammes de sa teste eussent cōtraint cēux qui l'abordoyent de faire ce que la flaterie leur faisoit pratiquer. Que si les flammes qui parurent iadis sur la teste d'vn ieune garçon à Rome, & la lecherent seulement en passant, ainsi qu'vn esclair, luy promirēt le sceptre de ceste grande Ville vn iour emperiere du monde, & luy tindrent fidellement vne si riche promesse: ces flammes qui iallisent perpetuellement des testes chauues, que leur scauroyent elles promettre, si ce n'est la diuinité & les couron-

nes immortelles? Mais si quelcun vou-  
loit dire, qu'il y a des estoiles cheuelues,  
qui sont les comettes, auxquelles les  
cheuelues se peuuent accompagner, il  
s'abuseroit lourdement. I'auoüe qu'au-  
trefois il s'est trouué de si mousses  
espris, qu'ils se sont figuré de ces fumées  
ardantes que c'estoyent des estoiles qui  
luisoyent dans le ciel: mais vne erreur si  
lourd ne sceust iamais entrer dans vn  
esprit de mise; erreur digne qu'on le  
baffoüe & non qu'on le conteste. *Le Synese.*  
vous prie; vne exhalaison allumée  
qu'on verra ce iourd'huy mesurer de sa  
grandeur celle du Zodiaque, trois iours  
apres deuenir d'un tiers plus petite, puis  
peu à peu se perdre, se dissiper & tout à  
fait s'esvanoïir en l'air: quelle resuerie  
de se persuader que ce soit vne estoile?  
C'est offencer le ciel de l'appeller seule-  
ment de ce nom. Et quand elle le se-  
roit, qu'apprendrions nous de là si ce  
n'est que les cheueux sont si pernicious,  
qu'ils peuuent mesme faire passer la  
mort, la destruction & la ruine iusques  
dans les corps des estoiles: corps sans  
cela bien-heureux, imperissables & inv-

mortels. Que les cheuelus donc ne s'ac-  
comparent aux astres, ce seroit apparier  
au iour la nuict & les tenebres. Car  
qu'est-ce que de l'ombre si ce n'est des  
tenebres ? & que font les cheueux sur la  
teste, sinon la couvrir d'ombre, de  
nuict, & d'obscurité. & de fait lisez moy  
tous les Poëtes quelque langage qu'ils  
parlent, & de quelque siecle que vous  
les voudrez prendre, quel plus com-  
mun office assignent ils aux cheueux  
si ce n'est d'ombrager ? Mais nonob-  
stant ces ombres, & l'horreur de ces te-  
nebres, que les cheuelus s'accompagnent  
hardimēt aux cometes: Il ne se trouuera  
que trop de conuenance entre eux: n'e-  
stant la lumiere peu durable des vns,  
presagieuse de plus de malheurs, que  
l'ombre & les tenebres des autres. Les  
cometes del'air presagent d'ordinaire  
la guerre, la peste, & la famine: la mort  
des Roys & des Monarques, la subuer-  
sion des estats & empires, & mille cala-  
mitez publiques: les cometes de la terre  
presagent & la guerre & la peste, & la  
mort & la ruine, à la chasteté des da-  
mes, & mille desordres tant priuez que

publiques. Il y a sans plus ceste differēce, que les cometes de l'air bien souuent ne font que presager les mal-heurs qu'ō void succeder à leurs flammes funestes, & n'en font que les signes tous simples: Mais ces cometes de la terre, ces cometes malencontreux sont tousiours & le signe & la cause de leurs tragiques esclandres, & les defastreux accidens quilz presagent ce sont eux mesmes qui les enfantent & qui les font esclorre. De ces cometes prodigieux fut ce ieune berger, dont les feux lubriques ne firent qu'un bucher d'Ilion, & couvrirent de cendre le venerable orgueil des Pergames. C'est ce sanglant comete à qui son frere Hector reproche & si souuent & si aigrement dans Homere, le des-hōneur de sa perruque effeminée. Cependant si ie fay ces cometes si dangereux, & leurs perruques si fatales à la pudicité des dames: que quelqu'un pourtant n' imagine, que ie donne ce credit à l'auantage de leur beauté, & de leur bonne grace: puis que bien loing de là, ie vien de faire voir que quant à ce respect, ils s'esloignent autant de la per-

fection des chauues, que les ombres de la nuict s'esloignent du Soleil & de sa viue lumiere. Mais cela procede, en partie de leur humeur desbordée & de leur lache inclination; qui les portant continuellement à combattre l'honneur des dames, il ne faut s'estonner si la foiblesse des ennemis que si opiniastrément ils attaquent, fait souuent rencontrer à leurs imperfections mesmes, & à leurs deffauts, des palmes & des victoires, des trophées & des couronnes: en partie il faut l'attribuer aux monstrueux appetis de ce sexe bisarre: car ce desreiglement estrange qui leur a donné quelquefois vn degoust des plus merables hommes, & qui les leur a fait quitter, pour courtirer & embrasser des animaux couuers de poil, des bœufs & des cheuaux: c'est celuy mesme encore qui leur peut faire quitter les chauues pour s'abandonner à l'amour des testes cheuelues.

Or c'est tantost assez disputé sur la beauré que les cheueux nous donnent. Il resteroit à sçauoir s'ils sont plantez sur la teste pour luy seruir de deffence,

qui est le dernier point que nous nous sommes obligez à examiner. Mais il me ressouient qu'entre ceux qui ont recommandé le soing de nourrir les cheveux, l'autorité de Lycurge s'en est autant faicte à croire que toute autre: & à ceste cause, puis que de deux vtilitez qu'il leur attribue: l'une de faire les hommes plus beaux: l'autre de les faire trouver plus espouuantables aux ennemis, nous n'auons examiné que la premiere: surceons la controuerse qui regarde la deffence & remparement de la teste, & vuidons ce second membre. Mais par où commēceray- ie, & de quelle façon, si ce n'est en vous demandant, si quand vous oyez Lycurgue qui commande à ses soldats de porter de longs cheveux afin d'en paroistre plus terribles à la guerre, il ne vous semble pas qu'il est en humeur de dresser quelque partie à vne troupe de petits garçons, & leur haler vn scadron de masques ou de barbouillez pour leur faire quitter en desordre la toupie où le sabot. Vrayement si Hannibal ne se fut monstré plus subtil en stratagemes, alors qu'il coeiffa ses

bœufs de flâbeaux alumez, que cestuy-  
cy coeffant ses soldats d'une loque per-  
ruque, il n'eust eu garde de donner les-  
pouente au camp de Fabius, ny de luy  
faire chercher vn autre logement. Il est  
bien certain que le port, la mine, & le  
geste des soldats n'est pas de peu d'effet  
en guerre. Ce grand Capitaine Marius  
le cognoissoit assez, qui faisoit monter  
les siens sur les remparts du camp, pour  
voir passer l'armée des Cimbres, &  
Ambrons: afin de leur faire appriuoiser  
l'horreur de leur visage, & la fierté de  
leur contenance. Ces Barbares eux  
mesmes ne l'ignoroient pas, qui atta-  
choyent à leurs salades & habillemens  
de teste de grandes aisles estendues, &  
les rehaussoyent de rymbres represen-  
tans le meuble des bestes plus estranges  
pour en paroistre plus espouventables.  
C'est pour la mesme fin que le vieux  
Caton vouloit que les siens allans au  
choc, rompissent la terre & l'air de grâs  
cris & huées, & fissent descendre par  
les oreilles quant & ce tintamarre, l'e-  
stonnement & l'effroy au cœur des en-  
nemis. Mais d'employer à c'est vsage les  
outils

de la delicateſſe & les propres atours de la molleſſe effeminée qui iamais s'eſt aduiſé de le faire que Lycurgue ? n'eſtoit-ce pas vn beau moyen & bien ingenieux pour eſbranſler l'aſſurance des ennemis, d'offrir à leurs yeux vn bataillon de femmes armées: & d'attacher à chaque teſte de guerrier la banderolle de la puſillanimité meſme, & de la foibleſſe feminine. Car quel viſage pouoit auoir vne armée équipée de la ſorte, ſinon d'vn troupeau de garces deſguiſées. Deuoit il pas encore pour les acheuer de peindre, leur faire porter aux batailles, de belles robes longues, routes decoupées & chamarrées: & puis quils auoyent le peigne, leur pendre des miroirs delicats à la ceinture, & leur mettre à la main vn eſuentail ou vne quenouïlle, comme fit Cyrus aux Lydiens, & Ariſtodeme à la ieuneſſe de Cumes. La mommerie en euſt eſté plus belle, & plus plaiſante à voir, & à quoy faire les armer de l'airain de Mars, ſi l'airain des vieux chaſtrez de Cybele, leur conuenoit trop mieux. L'armée des Parthes que commandoit Surena con-

tre Craffus , reffembloit , à ce que dit Plutarque , aux Musaraignes & autres telles beſtes qui portent le venin & tout ce qu'elles ont de dangereux à la teſte, & n'ont rien à la queüe qui puiſſe faire peur. Car elle auoit bien le front terrible & redoutable, ce n'eſtoit que lances & piques , que harnois fourbis & ſalades reluiſantes. Ce n'eſtoit que cheuaux bardez , que fifres & trompetes: mais la queüe ſe terminoit en vne trainée de chariots, non armez de faux trāſchantes : mais chargez de menestriers, bouffons, farceurs & femmes de ioye. Il en eſtoit biē piſde l'armée de noſtre Capitaine, quant à la monſtre & l'apparence. Elle eſtoit effeminée & de teſte & de ventre, & de flancs & de queüe. En ſomme c'eſtoit vn beau balet de damoiſelles armées. Auſſi n'auoit il pas oublié à leur fournir des menestriers auſſi bien que Surena. Car au lieu des fifres, des trompetes & des cors dont les autres s'animent aux batailles , ceſtui-cy faiſoit marcher ſes gens en belle ordonnance , au ſon des fluſtes & hautbois & encore des violes: comme ſi

c'eust esté la pompe d'un sacrifice, ou le ioyeux conuoy de quelque nopce. Que manquoit il à la perfectiõ de l'appareil, si ce n'est pour faire aller la caualerie de mesme air que les pietons, d'emprunter les cheuaux des Sybarithes, qui scauoient porter leurs maistres à la guerre, en dançant des branles gays, des passepieds & des pauanes. Et qui ne prendroit desia la fuite, à ouyr seulement descrire vn si effroyable equipage d'armes? Si M. Antoine eust voulu rēdre la pareille à Cleopatre & l'aller trouuer par terre en mesme appareil qu'elle le fut trouuer par eau, qu'elle escorte eust il sceu desirer pl<sup>us</sup> propre que l'armée de Sparte? Mais que vouloit dire ce beau legislateur, & où auoit il le iugement? Au milieu de la paix il trouuoit bon que ses gēs fussent sales, malpropres & vilains. Au bal & dans les gentilleses il agreoyt qu'ils accostassent des dames, oincts de crasse & d'ordure, le poil affreux & mal peigné. Et s'il estoit question d'aller faire peur aux ennemis, relachant la corde de ses austeres regles, il les dispensoit à se peigner curieuse-

ment & à se testonner. S'il l'eust fait seulement ( comme quelques vns veulent dire ) pour les degouster de la paix, & faire qu'ils se portassent à la guerre, ainsi qu'en vn beau pré, où ils deuoyent cueillir les agreables fleurs de leur plaisir, arroufées du sang de leurs ennemis & teintes de leur honte: si la raison n'estoit pertinēte elle auroit pour le moins quelque apparence: mais d'effeminer la mine de ces cōbatans pour estonner les autres, quel Demosthene excuseroit assez habilement sa sottise? Ceste phantasie n'est pas la seule honte de ses loix. Ceste bisarrerie n'est ny l'vnique ny le plus graue reproche de son iugement, toutes ses ordonances, toutes ses coutumes, que sont elles presque autre chose, qu'extrauagances, effronteries, iniustices ou inhumanitez, coëffée de specieux pretextes? tesmoins les rapt de ses mariages, les ennyuremens & les meurtrissemens de ses ilotes, les larcins de ses ieunes garçons, le prest des femmes ( & qui surpasse les barbaries plus barbares ) ceste horrible & Plutonique loy, de precipiter dans vne fon-

driere les enfans venans de naistre si quelque foiblesse où mutilation de membre, les accusoit tant soit peu d'estre impropres à la guerre, à l'effusion du sang, au meurre & au carnage. Cruelle & bestiale loy, où comme en vn tableau l'on voyoit peinte au naturel l'humeur de ce felon animal, qui exerce ses brigandages sur les riués du Nil, lequel tue sans pitié tous ceux de ses enfans, qui soudain quilz sont sortis de leur coque, ne se font voir digne engeance d'un si meschant pere, & en happant de leur gueule, qui vn ver, qui vne herbe, qui vn festu, & quelque autre telle chose, ne tesmoignent leur naturelle inclination à la rapine, à l'iniustice & à la violence. Sages donc & bien aduisez les Phtasiens lesquels quoy que ses voisins, ses alliez, & ses compaignons d'armes, reietterent les loix de ce refuseur, & n'en voulurent ouir parler: loix qu'aussi les Lacedemoniens mesmes de son viuant corrigerent: ce qui luy estant rapporté, il fut si sottement orgueilleux qu'il s'en laissa mourir aux champs de rage & de regret. Mais apres, tout, me

dira-on, ces Lacedemoniens firent des belles choses portant les cheueux lōgs. Ils en eussent fait de plus belles encore, & en firent depuis de plus belles portant la teste rase. Ce fut du temps des testes rases qu'ils enuoyerent Agesilaus en Asie, pour deliurer de seruitude les Grecs y habitans. Il l'auroit mis à chef, & en donna de belles preuues, sans les harēgues des Grecs, qui rappellerent ce braue Roy en son pays : & luy rauirent des mains la gloire toute acquise de tāt de beaux trophées. Ce fut lors qu'ils portoyent les testes rases qu'ils despecherent Gilippus en Sicile, où il vainquit les Atheniens, ausquels peu de temps apres ils osterent l'empire de la Grece & la liberté mesme. Ce fut lors de leurs testes rases que leur Xantippus defit Attilius Regulus en Afrique, & bref ce fut du temps des mesmes testes rases, qu'ils acheuerent mille autres glorieuses entreprises. Mais lors de leurs longues perruques qu'executerent ils qui soit tant remarquable? la plus heroïque preuue de leur vertu guerriere, & de laquelle leur ambition se flatoit le plus,

n'est-ce pas la resolution des trois cens, qui voüans leurs testes au salut de la Grece, se firent avec leur Roy Leonidas hacher en pieces au destroit des Thermopyles, pour empescher le passage des Perles ? Or auoyent ces trois cens de belles & longues tresses lesquelles, dit l'histoire, ils pegnoyent & rengeoyent delicatement, pendant qu'ils attendoient l'assaut des Perles. Car outre que leur legislateur estoit d'aduis qu'à la guerre l'on en vst ainsi : ceux-cy particulièrement en auoyent encore plus de subject, de peur que s'ils les eussent portées en bandoliers, affreusement auallées sur la face, estans trouuez en c'est estat au pas de ces hautes montaignes, on ne les eust pris, pour de tels brigans que ces pastres du Nil, dont parle Heliodore, qui les portoyent de mesme : non pour des guerriers resolués à combattre. Tant y a que leur dessein loüable, magnanime & genereux, l'enueie mesme ne l'oseroit nier : mais l'issue en fust si sanglante & si triste, n'en estant eschappé vn seul de tous tant qu'ils estoient, que ie m'esmerueille

quils facent tant de fefte d'un combat si funefte. Eux mefmemment qui auoyēt des Roys, lefquels à ce qu'on trouue, ne faifoient pas grand conte des coqs qui mouroyent pour là victoire mefme, & n'agreoyent qu'on leur fift prefent que de ceux qui faifoient mourir les autres en combatant. Car ne fut-ce pas Cleomenes fils de Cleombrotus, qui fit cefterefponce à celuy qui luy en prefentoit. Auffi leur fut alors ceft adjanacement de cheueux d'un si mauuais augure que depuis ( ainfi que i' imagine ) ils n'eurēt pas grande enuie n'y de peigne n'y de poil. Apres tout Lycurgue deuoit bien confiderer, ce me femble, que quand bien ces longs cheueux euſſent preſté quelque air de ferocité à la mine d'aucuns des fiens : c'eſtoit moins que rien du fruiēt qu'il en pouuoit attendre, au pris du hazard qu'il leur faisoit courir & à beaux & à laids : donnant vne si belle priſe ſur eux aux ennemis, qu'ils pouuoient happer le plus commodement du monde par ces houpes pandātes. Si c'eſtoit choſe faiſable, ceux-là le ſçauent, qui ſçauent le danger où ſe

trouua l'armée d'Alexandre en la iournée d'Arbeles, & les termes douteux où elle fut iettée pour mesme occasion. C'est Ptolomée fils de Lage qui en a escrit l'histoire, & c'est nostre Synese qui nous en a fait part, nous disant qu'un Macedonien qui portoit de fort grands cheueux & la barbe de mesme, ayant attaqué un autre soldat Perse, ce fuy-ci quoy qu'il se vist en grand danger recueillant neantmoins toutes ces forces & ce que son courage auoit de vigueur, apres auoir ietté bas sa pique & son escu, armes qu'il ne iugeoit guere propres pour le combat qu'il alloit demeller, s'en va droit à son ennemi, se ruë sur luy sans marchander, l'empoigne d'abord par les cheueux & la barbe, & le secoue de sorte que le tirât aisement du costé qu'il vouloit, il le porte par terre & l'esgorge sur le cháp. Un autre Perse void ce coup, puis un autre & un autre encore, lesquels ayans pratiqué le mesme tour avec pareil succez, tous les Perses à leur exemple iettent là leurs boucliers, & se prennent à chasser par la campagne ces cometes de guerre.

Car de leur costé cest aduis auoit desia passé de bouche en bouche, que qui voudroit sās peine cheuir des ennemis, & en auoir bõ marché, il n'auoit qu'à les saisir au crin. Ils auoyent desia paué les plaines d'Arbeles de corps Macedoniens ainsi honteusement terrassez, sans qu'il y eust autres que les chauues, comme il est vray semblable, qui fissent ferme, & montraissent le front du costé que l'honneur vouloit. Cepẽdant Alexandre voyant la bataille en ses termes, se trouuoit en des grandes trances: il se passionnoit, il forcenoit & brusloit de cholere, qu'il fut contraint de fuir deuant des ennemis tous nuds & desarmez qui naguere tous armez n'osoyent luy faire teste. Mais quelque feu de courroux qui s'esprist dans son ame, si n'eust-il meilleur expedient que de faire promptement sonner la retraicte à ses gens, pour se donner le loisir d'appeller de tous costez des barbiers en son camp, & faire raser publiquement toutes les testes de son armée, quoy fait, il retourne soudain au cõbat, où les affaires ne succederent pas aux Perses de

mesme qu'au parauant : Car ne trouuans plus ces longs crins qui auoyent esté comme les anes de leur aduantage, ils quitterent bien tost aux Macedoniens & le champ & la victoire. Iugez par cest exemple, s'il fait bon à la guerre pour ceux qui portent des cheueux : lors mesmement qu'ils ont à faire à des ennemis habiles, & qui sçauent bien prendre leur temps. Aussi ce sage Roy de là en auant se garda bien de permettre à ses soldats de nourrir la cheuelure, ayant trop bien fait son profit de ceste experience. Je dis-bien plus, il n'est pas seulement dangereux de porter de longs cheueux à la guerre : mais encore il est honteux à vn homme de guerre d'auoir mesme des cheueux. Car ie soustiens qu'autant qu'il en paroist sur la teste d'un soldat, du moins en la part où les chauues en manquent, ce sont autant de tesmoins de sa lascheté, & du peu de deuoir qu'il a fait de porter sa teste où se donnent les coups. En voicy la raison. Le cuir de l'homme est du rang des parties que les medecins appellent spermatiques, c'est à dire

qui ont esté faictes & produictes de la propre semence du pere & de la mere, & non du sang maternel comme celles qu'on appelle sanguines. Ces parties sont de telle nature que souffrans solution de continuité, où (pour parler plus familièrement) estās des-unies de-jointes & separées, cōme il se fait souuent par vne cause violente, elles ne peuvent se reprendre & reunir, n'y leur substance estre réparée selon la premiere intention de nature (comme ils parlēt) mais seulement selon la seconde, par le moyen d'une autre substance qui est engendrée par la vertu de la chaleur naturelle. C'est ainsi que l'os estant rompu, il se fait vn cal qui remplace le dechet des parties perduës, & sert deliē pour rejoindre les autres. Le cuir humain estant donc de ceste condition: quand par quelque coup il vient à estre diuisé; pour le remettre au premier estat; nature engendre vne autre substance differente de la premiere, qui soude les deux bouts des parties coupées: & n'est ceste substance autre chose que ce qu'on appelle cicatrice: la.

quelle parce qu'elle est plus espaisse que l'eau, & n'est percée de pores cōme elle: la partie cicatrisée ne se repeuple iamais plus de poil, ne trouuant la matiere de quoy il se fait, les conduits du passage. Celuy donques qui piqué des aiguillons de l'honneur, aura veu sa teste battue des orages de Mars, & qui l'aura exposée aux gresles de Bellonne, il le fera paroistre en la monstrent autant couuerte de cicatrices que descouuerte de cheueux. Vn tel n'aura que faire d'imiter ces ambitieux Romains, qui brigans chaudement les charges de leur Republique, ouuroient leur estomach, & presentoyent aux yeux du peuple les cicatrices des playes qu'ils auoyent receuës en combatant pour la patrie. Il n'aura que faire de se mettre en ceste peine soit pour descourir sa vaillance, soit pour en receuoir le guerdon. Car ces belles & agreables cicatrices qu'il porte sur le front, ce sont les glorieuses fleurs dont l'honneur a desia tissū la guirlande & le chapeau de triomphe, qui recompense & marque tout ensemble sa valeur. Apres la route de

Pharfale & la deffaite de Pompée , vn certain Nonius voulant conſoler ceux de ſon parti & leur remettre le cœur au ventre leur repreſentoit qu'ils auoyent encore ſept aigles entieres , entendant ſept legions : d'autant qu'elles auoyent l'aigle pour enſeigne. Ciceron ſe rencōtrant là autour : Ton aduis ſeroit de miſe, luy dit-il, ſi nous auions à combattre contre des pies ou des geays. Diſons ſemblablement à ceſtuy-cy qui veut avec ſes longs cheueux eſpouuanter les armées : Ton conſeil ſeroit receuable, Lycurgue, ſ'il falloir eſcarter vn camp de moineaux allans faire le degaſt dans quelque cheneuiere, où dans vn champ non encore moisſonné : tes eſpouuentails n'y ſeroient inutiles. Mais ſ'il eſt queſtion de rendre à bon eſcient terrible la mine d'un guerrier que luy ſçauroit on deſirer ſinon la teſte chauue ? Car comme le chauue eſt dans le bal vn Soleil , qui paroift couronné des rayons d'une aimable lumiere : Il eſt dans les ſāglās deſtours ceſte eſtoile de Mars qui rougit tout le ciel de ſes flammes redoutées. Et quant eſt.çe , ie vous prie,

qu'un soldat paroist plus redoutable? quand est ce qu'il est plus redouté que lors qu'il a le pot en teste? & lors qu'il a le pot en teste, que represente il que le chauue? à qui ressemble-t'il qu'au chauue? du moins la salade ou casque des Anciens ressembloit si parfaictement à vne teste chauue: que les Grecs ont appellé l'un & l'autre d'un mesme nom: voulans par là denoter que la salade n'estoit qu'une teste chauue d'airain, ou la teste chauue vne salade d'os: tant la rondeur & luisante polissure de tous les deux leur entredonnoit du rapport, vray est qu'ils paroyent & embellissoient ces salades de poil de cheual, qu'ils y attachoyent: mais c'estoit afin que les rendans encore plus semblables aux testes chauues: ils les rendissent quand & quand plus terribles. Ce que nous aduoüeront facilement ceux qui sçauent de quelle façon y estoient attachés ces poils cheualins. C'est que laissant le deuant & le sommet tout vuide, ils pendoyent seulement tout autour sur les costez & le derriere du pot. Ceste disposition de poil, faisoit

*synese.*

quela salade estoit vn naif pourtraiët d'vne teste chauue. Et toute fois ce n'estoyent pas ces crins pendans qui donnoient principalement la terreur. C'estoit ce qu'il y auoit de luisant, de d'escouuert, & de chauue. Qui fait que dās Homere Achille voyant les Troyens malmener plus que de coustume les Grecs, & se ruer sur eux avec plus de courage pource qu'ils sçauoyent bien qu'il n'estoit pas en la meslée : il se prend à dire, que leur audace vient de ce qu'ils ne voyent pas flamboyer de près le front de sa salade, sans faire mention de sa queue de cheual : moins encore de sa belle perruque, que Claudian en son Epithalame d'Honorius luy fait peigner si delicatement : voire comme s'il estoit mieux informé qu'Homere qui luy auoit appris tout ce qu'il en sçauoit : il veut faire croire que c'estoit ceste perruque qui faisoit trembler Ida & les hautes murailles de Troye, combien que i'estime qu'en cela il a d'autre costé voulu imiter le mesme Homere, & les autres Anciens Poëtes, qui s'accommodans à l'humeur du vulgaire, attachent

chent des cheueux au front de Iupiter  
mesme , faifans qu'en les secoüant il  
esbranfle tout l'Olympe & les puiots  
du ciel. Eux qui n'osoyēt parler à demi  
bouche de la nature de leurs Dieux: ny  
les deuestir de muscles & de nerfs , de  
tendons & d'arteres , de peur de la ci-  
guë, cōme il en print à Socrate, estoyēt  
contrains de leur prester encore des  
cheueux ; comme il leur auoyt pre-  
sté de l'amour, de la haine , de la ialou-  
sie, de la cholere & autres passions hu-  
maines qui leur font des-honneur. Et  
toutefois pour le regard d'Achille, en-  
core semble-t'il qu'Homere le vueille  
faire chauue. Il ne dit pas clair & net  
qu'il le fût: parauanture la considera-  
tion de sa grande ieunesse l'empesche-  
t'elle de frāchir le mot: tāt y a que cou-  
uertement il nous le fait assez enten-  
dre quand il nous represente que c'est  
heros emporté des vagues de son ire  
à la vengeance qu'il alloit prēdre d'A-  
gamenon pour le rauissement de  
Briseis: sur le poinct que le fer luisant  
dans la main , il se vouloit ietter sur ce  
tyran : voyci Pallas, qui descenduë ha-

stiement du ciel, vous l'empoigne par les cheueux du derriere. Il fait que c'est par le derriere pour nous faire penser que le deuât en estoit desgarni, & qu'il n'en auoit qu'en la partie de la teste où il n'en manque point aux plus chauues. Que s'il y a des endroits où il semble luy donner vne perruque entiere & bien fournie : c'est vn traict de son habilité, par lequel sous la faueur d'une accorte & iudicieuse inconstance : il euite d'un costé la censure des plus delicats, qui le voudroyent reprêdre d'auoir fait chauue vn si ieune adolefcêt : & de l'autre le blasme trop plus raisonnable que luy donneroyent les plus sages, pour auoir fait ce tort à vn si galâd homme de luy couvrir la teste de cheueux. Mais pourquoy ne se pouuoit permettre la diuinité de son art, de faire tomber les excrements d'une si belle fleur au milieu de son printemps, puisque au milieu du printemps la nature permet bien de faire tomber la fleur de certaines plantes. Quant à Hector, qui fut & l'espée & le bouclier des Troyens, ie ne sçay si le Poëte entend qu'on le prenne pour chauue,

cecy sçay-ie, qu'aux fortes reprimen-  
des qu'il luy fait faire contre la perru-  
que de son lache frere: il nous fait assez  
comprendre, que s'il n'estoit chauue, il  
n'estoit guere contēt d'auoir des che-  
ueux, au regard du grand Alexandre  
de qui nous parlions tātost, ie ne main-  
tiendray non plus qu'il le fût. On sçait  
qu'il mourut en la fleur de ses ans. Mais  
quel iugement il faisoit du poil des te-  
stes guerrieres: il en dōna des preuues,  
lors que pour vaincre ses ennemis, il  
fit, (comme nous auons veu) passer  
tous les cheueux de son armée par le  
fil du rasoir. Que si ceux-là ne furent  
chauues, que dirons nous de ce mira-  
cle des guerriers, de ce capitaine des  
capitaines nostre inuincible Cesar?  
comme nous ne sommes en peine de  
prouuer qu'il fut insignement chauue:  
aussi ne le sommes nous pas de mon-  
strer qu'il fut le Soleil des vaillans, &  
le vainqueur des vainqueurs: lequel  
seul fit plus de conquestes que n'en fi-  
rent tous les conquerans ensemble.  
Qui est celuy qui emporta huiēt cens  
villes d'affaut? c'est Cesar le chauue,

qui fit mourir vn million d'hommes & en prit tout autant ? cest Cesar le chauue ; qui en aspreté de pays qu'il conquist, en ferocité de nations qu'il vainquit , en multitude de peuples qu'il soumit , surpassa tous ceux qui auoyent esté & qui furent depuis, & par tous ces actes d'incomparable vail-  
lance,abbatit la gloire & flestrit le renom de tous les autres ? c'est encore luy mesme,c'est Cesar le chauue. Antigonus oyant vn de ses soldats qui disoit avec quelque demonstration de deffiance & d'estonnement , que les ennemis estoient en fort grand nombre : & pour combien me contes-tu ? luy dit-il : Mais si, comme desia nous auons fait voir le mauuais goust de Lycurgue de vouloir des soldats cheue-  
lus , il nous prenoit maintenant enuie de faire vn catalogue des chauues qui se sont illustrés par leurs faicts d'armes, & monstrent quel en est le nombre : à combien plus iuste raison pourroit dire Cesar,s'il estoit & viuant & present, pour cōbien me conterat'on ? Et pour combien le pourrions nous conter, si

ce ne'ft pour le moins , pour autant d'hommes qu'il a pris ou tué d'ennemis, pour vn million & pour vn million encore. Quel honneur & quelle gloire pour les chauues, qu'entre vn million de chauues infignes en sagesse & en science vn Socrate le demon de la sagesse & de la science ait eu la teste chauue! Quel honneur & quelle gloire pour les chauues, qu'entre vn million de chauues remarquez par l'espée renommes par les armes , vn Cesar l'honneur de l'espée & la gloire des armes, ait esté des plus chauues. Mais quel hõneur encore plus grand: quelle gloire encore plus grande pour les chauues, que non seulement vn Socrate ait esté, mais mesme se soit honoré d'estre chauue. Que si de mesme que de Socrate, on pouuoit dire de Cesar que non seulement il fut, mais mesme il s'hõnora d'estre chauue: quel honneur & quelle gloire se pourroit egalier à l'honneur & à la gloire des chauues? Mais qui no<sup>9</sup> empeschera de dire & de croire de Cesar, ce qui se dit & se croit de Socrate? Les escriuains

dira-on, qui ont fait son histoire, & qui au lieu de nous appréndre qu'il tint à honneur d'estre chauue, nous disent qu'il portoit fort impatiennmēt ce defaut: voire si impatiennment que pour le plaisir de le pouuoir couvrir, il accepta avec plus d'allegresse qu'il ne fit tous les autres honneurs, que le Senat & le peuple Romain luy decernerent, le priuilege de porter perpetuellement la couronne de Laurier. Je sçay que quelques vns l'ōt ainsi escrit, & ainsi l'ont ils creu, abusez de ce que luy mesme conseille par sa genereuse ambition l'a quelquefois ainsi voulu faire croire. Mais vous semble-t-il qu'il y ait de l'apparence, vne teste si bien faicte que la sienne pouuoit-elle se glorifier pour se voir ombragée d'une ramée emperlée de lentes? d'un rebut de nature? vne teste derechef si bien faicte que la sienne pouuoit-elle se raualler pour se voir nette d'un clappier de vermine, & puis, si ce prodige de vaillance eust esté si mal content de manquer de cheueux, qui luy eust defendu l'usage d'une perruque emprun-

tée? volōtiers il craignoit la note des censeurs, il craignoit qu'on le degradaſt du Senat: ou qu'es ſpectacles publics on le rangeaſt avec les tourbes & la lie du peuple. Ou ſi ce n'eſt cela, parauenture que l'inuention ne luy en eſtoit paſcogēuë, & qui ne ſçait qu'en ce temps, la Germanie & autres peuples du Nord furniſſoyent des perruques aux dames Romaines! ſoit que la vanité de paroître blondes les leur fit acheter: ſoit que le trop de ſoing d'embellir leurs cheueux naturels les leur eût gaſtez ou du tout mis à bas, comme à l'amie d'Ouide que ce Poète conſole pour vne telle perte dont elle eſtoit affligée, & la renuoye aux perruques de ces blondes nations. Qui ne ſçait qu'il y eut des Empereurs Romains, qui ſimplement pour obliger les Germains, & s'affermir en leur bien-veuillance s'accommoderent de cheueux empruntez: afin de s'emperuquer à leur mode? & qui ne ſçait encore que les Medois, que Rome deſia ne cognoiſſoit que trop, ne ſe ſeruoÿēt de meſme que de perruques at-

tachées? & quand bien l'vſage de tels cheueux eût eſté nouueau pour les hommes maſles de cet âge.là qui doute que ſi Ceſar eût le premier rōpu la glace, que ſon exemple ne luy eût en vn rien fait naiſtre des imitateurs à milliers, qui ſe fuſſent cōeffez avec luy pour luy faire plaiſir:cōme on tor doit le col avec Alexādre, ou cōme on faiſoit le borgne avec le dominateur de Sicile? combien penſez vous encore qu'il y eut de <sup>eu</sup>teſtes, non ſeulement Romaines ou Italiennes, mais Gauloiſes, Germaines, Eſpaignoles, Aſiatiques & Africaines, qui ſe fuſſent à deſſein defrichées de ces haliers de leur poil, ſi on eût creu que Ceſar eût veritablement deſiré, ou eu iuſte ſujet de deſirer des cōpaignons en vne ſi chetive perte vn Barbare Mithridates qui ne fut de ſa vie aimé que de ſa garçe: pource qu'il affectoit le bruit d'eſtre vn habile chirurgien, trouuoit à toutes heures des gens, qui par vne laſche & ſote flatērie luy abandonnoyent & bras & iambes à decouper & à cauteriſer:& Ceſar pour qui tant de genereux courages

perdoient si librement & le sang & la vie, n'eust volontiers pas trouué des hommes qui pour l'amour deluy eussent voulu perdre du poil. Arriere dōc ces impertinens qui veulent rendre suspect de sotise le plus beau iugemēt que les siecles ayent veu naistre. Cesar c'este grande ame regretter des cheueux ! & comment les eût il regrettez, luy qui sçauoit bien que la gloire qui brusloit de son amour, auoit voulu de ses mains propres les luy arracher, cōme indignes de loger sur vne teste si rare, qu'elle ne descouuroit tout expres, qu'afin de la couvrir de Lauriers & de Palmes ? Nō non, le desir de couvrir le defaut des cheueux, ne luy fist iamais desirer les diademes ny les couronnes : mais bien couuroit-il lexcez de ceste hautaine passion, qui luy faisoit si ardemment desirer & les diademes & les couronnes, en feignant de ne les desirer que pour couvrir le defaut des cheueux. Ouy, mais ce defaut l'exposoit à tous coups aux railles : & fournissoit à qui le vouloit pincer, de quoy lascher quelque bon mot

contre luy. Quelles railleries & quels bons mots me va-on maintenant alleguer? qui ne scait qu'il y a des brocards & des attaintes de diuerſes ſortes, & bien differens les vns des autres? qui ne ſcait qu'il y en a entre autres, qui ſont comme des morſures d'une beſte edentée? qui ne faſchēt ny ne bleſſent; qui n'irritent ny n'offencent, qui n'aigrifſent ny ne piquēt, ne faiſans qu'efgayer non ſeulement celuy qui les donne, mais plus encore celuy qui les reçoit? Conſultez les auteurs anciens là deſſus: Vo<sup>9</sup> trouuerez qu'exprefſemēt et diſertement ils metent en ce rang les bons mots qui battēt ſur les chauues, choiſiſſans entre vn million d'exemples qu'ils euſſent peu fournir des railleries de ce genre, celuy des chauues preſque ſeul: comme d'une choſe ſi cogneuë & manifeſte en leur temps qu'on ne la pouuoit mettre en diſpute. Ce qui nous apprend qu'anciennement on eût tenu pour bien impertinent vn chauue, s'il eût fait le moindre ſemblant de ſe piquer à telles railleres: d'où ils'enſuit qu'elles n'eſtoient

aucunemēt fascheuses, ny tāt soit peu à leur defauantage. Ce n'estoyent donc pas de ces brocards trenchans & affilez : soit de ceux qui pensent à decouuert soit de ceux qui mordēt couuertement, que les anciens ont appelé morsures figurées, autant poignans par dessus les autres, que le sont sur les aiguillons simples & estendus, les hameçons crochus, ou les dards barbillonnez qui deschirent & emportent la piece. Tant s'en faut qu'ils fussent de ceux-là : que passant outre le rang que leur donnent les auteurs que ie viens de nommer : i'estime qu'ils estoyent mesme de ceux de cest autre tiers genre, qui au lieu de blesser & faire cuire, tout au rebours chatoüillent, & contentent, enueloppans sous vn habit de raillerie, les louanges ou les flateries de ceux contre lesquels ils sont iettez. Car pour ce que les chauues d'ordinaire & peu s'en faut tousiours, sont de ceux qui pour leur merite & loüables qualitez, se font priser & rechercher : ceux qui vouloyent les obliger par des loüanges assaisonnées, & qui

pour sentir trop ouuertement la flaterie, n'égēdraſſent point vn degouſt: ils habilloyēt leurs traict en telle ſorte que d'abord ils repréſentoient l'air de la censure ou du reproche: mais cet habillement eſtoit ſi delicat, qu'on voyoit la loüange ou la flaterie à trauers, auſſi aiſement qu'on voyoit en l'Iſle de Los les membres des dames à trauers la delicateſſe de leurs robes. Ils leur reprochoient volōtiers, que leurs teſtes les couuroient tous de tenebres & que s'ils ne deſlogeoyent à bonne heure, les aſſiſtans n'iroient qu'à taſtons, & parauenture ſe romproient ils le col. Ou bien ils les prioient de ſe reculer d'eux, comme de ceux qui craignoient de heurter à quelque angle de leur teſte: voulans par le premier traict leur ſignifier gratieufemēt qu'ils reluiſoyēt cōme des Soleils: tout ainſi que par le ſecond ils honnoroyēt leur teſte des loüanges empruntées de la perfection de ſa figure ſpherique & ceſte. De telle ou pareille eſtoient leurs railleries: comme nous en fait foy le trait des courtiſans de Pene-

lope laché contre Vlisse : combien que tels goinfres qui ne scauoyent ny bien ny honneur, ny faire autre chose que manger en faineants le bien d'autrui, luy dissent par moquerie, ce que des honnestes gens luy eussent dit par gentillesse & par ciuilité. Je scay bien que sur la fin des banquets, la coustume & le vin aiguisoient assez librement la langue des anciens contre les chauues, & qu'alors ils cherchoient à rire à leurs despens: comme fait dans Petrone : cet yurogne d'Eumolpe. Mais qui s'estonnera si à des gens qui auront tout le cerueau offusqué de fumées, & la raison entraînée des indiscrets esclâs de l'yuresse, comme Hippolyte le fut de ses cheuaux, qui s'estonnera, dis-ie, si telles gens n'espargnoient point les chauues: & qui aura si peu de discretiõ que d'en attēdre d'eux? Que les chauues ne pardonnent point à l'insolence des yures, si les plus braues Roys du monde, tesmoin le braue Pyrrhus, ne luy ont point pardonné: que les chauues n'endurent point d'estre moqués des yures, si les Dieux mesme, tesmoin

le trait d'Alcibiade, contrefaisant yure les mysteres d'Eleufis, & mutilant les Hermes ne l'ont point enduré.

Reuenant à Cefar, ie dy que fi nous prenons bien garde aux bons mots, à qui fa teste chauue fournilloit la matiere, nous trouuerons qu'ils estoyent de ces rencontres obligeans dont ie parloy naguere. Vn des plus communs & qui est en la bouche de tous, n'est ce pas celuy des soldats qui fuiuoient la pompe de son triomphe des Gaules, & qui crioyent apres luy, gardez bien vos femmes, ô citoyës, nous vo<sup>9</sup> amonons le chauue adultere. Mais ceux qui croyans que ce trait luy face deshonneur, & qu'il en soit pincé sans rire, le veulēt alleguer contre nous : que font ils si ce n'est, comme dit le vieux prouerbe des Grecs, imiter les Carpathiens, qui porterent dans leur isle, les lieures qui les enchasserent tantost apres ? n'apportent-ils pas vn exemple qui fait contreux mesme & qui les ruine tout à fait ? Qu'estoit ç'a dire d'auertir les citoyens de garder bien leurs femmes du chauue ? cela monstre-t-il

qu'ils l'estimassent incapable de gagner les bonnes graces des dames, & de venir à bout de ses pratiques amoureuses? vouloyent-ils dire, voicy le bossu, le camus, le piébot, le contrefait & le disgracié, gardez bien vos femmes. qui n'eust ry d'un tel aduis, si ce n'est qu'ils l'eussent entendu à contre-sens & par forme de moquerie? Ils l'appellēt adultere & chauue tout ensemble pour mettre tant plus les maris en fureur & leur marquer par le premier epithete le vouloir, tout ainsi que par le second le pouuoir qu'il auoit de rendre amoureuses leurs femmes, & d'en estre le maistre. Ie ne l'excuse pas d'auoir d'esbauché les femmes d'autrui: ie tache seulement à faire voir, que ce que les soldats du triomphe crioyent tout haut apres luy, prouue tout le contraire de cè que pretendent ceux qui me voudroyent contredire. I'adiousteray encore ce mot, pour acheuer de plaider sa cause, laquelle, pour ne dissimuler ce qui en est, j'embrasse avec passion, puis que c'est la cause d'un chauue qui fut l'honneur &

la gloire des chauues, c'est que si ces parties d'amour se conduisoient tousiours à son aduantage, c'estoit vn effet de son merite, plustost que du soing ou du temps qu'il y despendoit:& que tout ce que de son temps il y eut de femelle, fut humain, fut diuin, restant captif de ses bonnes graces: la fortune estant de ceste qualité, se trouuoit si amoureuse de luy, & si desireuse de luy complaire, qu'elle luy rēdoit mesme en ces affaires, quoy que sa ialousie en grondast, les mesmes offices qu'elle rendoit autrefois au Capitaine Timothée en celles de la guerre: luy portant tandis qu'il dormoit & ne pensoit à rien moins, les plus belles dames enuelpées dans les filez de son amour, iusqu'au cheuet de son liēt: comme à l'autre les Citez & les Villes. Cest ainsi qu'elle luy porta ceste fameuse Royne d'Egypte & des beautez Cleopatre, laquelle à trauers mille perils, à la merci de mille & mil ennemis, se rēdit entre les bras de Cesar: non tant pour receuoir de luy l'Empire de l'Egypte, comme pour luy donner l'Empire absolu

absolu de son cœur. Or estoit bien autre chose Cleopatre idolatre de Cæsar que ne fut depuis Cleopatre idolatre d'Antoine. Elle entroit quād l'amour de Cæsar la vainquit dans la plus fleurie carrière de la vie: quand son amour vainquit Antoine, elle n'estoit pas tant loing d'en sortir. Cæsar cueillit les boutōs & les fleurs de son plus agreable printemps : Antoine ne faucha presque que le regain, & le foin de son arriere saison. Et toutefois Antoine laissa roüiller son âge & sa valeur miserablement aupres d'elle, se perdant enfin & faisant naufrage en la mer orageuse de ses amours. Cæsar ne perdit pas vne minute de temps qui l'appellast aux fonctions de la guerre, ny ne trahit par sa nonchalance la moindre occasion de raffraischir ses Lauriers & renouveler ses victoires. Le feu de son amour (s'il eust de l'amour pour elle) fut semblable au Soleil qu'imaginait Heraclite s'il s'alluma le matin, il s'estaignit le soir. Ce ne fut qu'un petit feu de paille: & ny les aimables rayons de ses yeux, ny les phil-

tresempoisonneurs de ses attraits, ny les charmeuses Syrenes de ceste enchanteresse voix: ceste voix qui non seulement par son chant, mais toute simple & toute naïfue se faisoit comparer à vn instrument à plusieurs marches & registres, avec tant de douceur elle sçauoit diuersifier ses douceurs: ny les merueilles de c'est esprit diuin, capable de la cognoissance de tant de choses: ny ceste lāgue riche du don de tant de langues: tous ces hameçons, tous ces cordages, tous ces pieges ny tous ces lacs, ne les sceurent retenir que presque aussi-tost deslacé qu'attaché, il ne courut comme vn trait de tonnerre d'un bout du monde à l'autre qu'il ne se fit voir en moins de rien en Pōt, en Italie, en Espagne: qu'il ne parut cōme porté sur les aïles d'un esclair, tātost sur l'Euphrate tātost sur le Nil, tantost sur le Tybre & tantost sur le Tage: tousiours vainqueur, tousiours triomphant, & tousiours esleuant des nouueaux trophées à sa renommee. Quel moyen, ou quel loisir de faire l'amour, quand il eut esté de la com:

plexion la plus amoureuse. Mais celles  
mesmes qui ne le virent iamais, rauies  
des beautez de son nom qui vagoit  
partous les climats de la terre, imitās  
ceste Reyne des Amazones qui fut  
rechercher les embrassemens d'Ale-  
xandre, accouroient de tous costez à  
luy, qui n'eut d'aigné aussi bien, ou du  
moins n'eut peu se mettre en souci  
d'elles. Et ne sçait-on pas bien la pres-  
se qu'on luy faisoit desia, du temps  
qu'il demeuroit comme les bras croi-  
sez, en comparaison de l'actiue & mu-  
ltiueuse vie qu'on luy vit men-  
der puis: & comme quoy les dames impa-  
tientes faisoient trotter vers luy ius-  
ques dans le Senat, lors mesme qu'il  
estoit empesché à desnoier les plus  
importantes affaires, les poulets & les  
ambassades d'amour, tesmoin la sœur  
de Caton lors qu'on traictoit du fait  
de Catilina. On dit du Roy Deme-  
trius qu'aimant à faire nopces assez  
souuent, & ayant grand nombre de  
femmes toutes estoient amoureu-  
ses d'un si beau prince, luy seulement  
amoureux de Lamia, quoy que desia

vieille & sur année, tant elle estoit accorte & sçauante en l'art d'amour. Cesar estoit bien le tison & la torche des beautez plus glacées: mais de se laisser prendre à rien qui fut humain, il auoit le courage trop haut pour le permettre: tant s'en faut que comme l'autre, il s'esprit d'un visage ridé, & se fit, comme luy, l'Atis & le mignon d'une Cybele. Et quand il auroit attaché ses desirs à la poursuite d'une beauté mortelle, qu'elle peine eut-il eu d'en venir soudainement à bout? qui l'eut empêché de pouuoir dire en ceste guerre, ie suis venu, i'ay veu, i'ay vaincu: aussi veritablement qu'il le dit en la guerre de Pharnaces? qui eut esté la dedaigneuse qui l'eut fait languir? ou le riuail si temeraire qui luy eut trauersé le chemin? y auoit il cœur si audacieux qui se trouuant dans une mesme prison avec le cœur de Cesar, ne se fut aussi tost laissé mourir de peur comme fait la langouste de mer se trouuât prisonniere avec le Poulpe dans une mesme nace. Mais son cœur ne se vit jamais espris que des immortelles

beautez de la gloire. Ce fut à ces diuins  
attraits que seulement il se laissa char-  
mer. Ce fut l'vnique passion dont son  
ame se trouua susceptible. Et s'il ai-  
moit ardemment vne déesse si belle, il  
ne fut moins ardemment aimé d'elle,  
qui fit trop plus pour luy que Caly-  
pson ne promettoit de faire pour Vlyss-  
se, luy faisant immortel non le corps  
brute & materiel, mais son los & son  
renom, qui braue & qui brauera les  
siecles & leurs reuolutions sans que la  
faux du temps luy puisse iamais faire  
iniure. Mais en quel vaste Ocean qui  
n'a ny riue ny fond me vay-ie sans y  
penser engager, me laissant emporter  
au vent de mon affection dans les  
gouffres espouuantables de tes louan-  
ges, ô chauue & inuincible Cesar! que  
ie relache de bonne heure, & gaigne  
sagement le port auant que ma bar-  
que courant plus auant sur vne mer  
enflée de tant de merites, laisse les on-  
des couuertes du bris de mon naufra-  
ge, & mon nom de honte & des-ho-  
neur. Qu'il me suffise d'auoir fait pa-  
roistre de mauuais iugement ceux qui

preschoyent que les cheueux font redouter les hommes à la guerre: qu'il me fust d'auoir fait voir, que pour faire trembler les plus mauuais, & par la mine & par les effects, il n'est que d'estre chauue: & que s'il estoit question de dresser vn bataillon inuincible on n'auroit qu'à le composer, non d'hommes amoureux les vns des autres, comme iadis c'este bande sacrée des Thebiens: (cela est honteux & de trop mauuaise odeur, de quelque honeste manteau qu'on le vueille couvrir:.) il faudroit seulement le composer de chauues. Et il ny a point de doute qu'une telle phalange ne fit bien tost trouuer ou la fuite ou la mort aux plus affamez de sang & de renommée, non non, rien ne dureroit deuant la braue fureur de ces guerriers: & comme parle Achille dans *Homere*, il ny auroit que les fils des mal-heureux qui attendissent leur lāce, laquelle leur feroit mordre la poudre enyurée de leur sang, quand ils auroient le corps de fer & les mains de feu: comme parle *Hector* dans le mesme poëte. Bref le

moindre des chauues auroit bien la force & le courage de faire, ce qu'autrefois vn braue chauue eut l'esprit & l'adresse de dire. Cefut Carinus sage & vaillant capitaine, vers lequel, cependant qu'il disnoit assis par terre pauurement & à simple appareil, les ambassadeurs Perses estans arriuez, & ayans parlé plus fierement qu'il ne trouuoit bon: il descouure la teste toute chauue: & la leur monstrant leur dit haut & clair, que s'ils ne prenoient meilleur aduis, il leur rendroit leurs Villes & leurs champs aussi ras que la teste qu'il leur presentoit. Mais il est tantost heure de payer nostre debte, & puis que nous l'auons promis, parlerà ceux qui disent que les cheueux sont la defence & le rempart de la teste: & qui de là veulent emprunter de l'estoffe pour les parer de loüanges. Je leur respons donques, qu'auât leur respondre ie voudroy biẽ sçauoir d'eux, si posé que c'este bourre les rende moins subjects aux offences del'air: ils croient par là releuer de beaucoup leur merite par dcssus celuy des chau-

ues, & si c'est pour ce respect que leurs testes sont si glorieuses de leur belle toison. S'il est ainsi, outre l'honneur que (comme nous auons touché des le commencement) vne si sottre vanité laisse emporter par dessus les hommes aux sangliers & aux ours, ô les honestes gens que seront à ce conte les hommes plus agrestes, les hommes plus brutaux & qui ne semblent tenir del'homme que la figure externe, la parole & le nom. Car puis qu'à leur aduis, c'est estre bien meritant qu'estre bien couuert des choleres del'air, qui doute que le travail, l'exercice & toute la forme de viure des bouuiers, laboureurs, crocheteurs & semblables, ne leur acere la peau: & ne la leur rende contre le froid & le chaud, le serain & le vent, la pluye & les orages, de mesme trempe presque que la rendirent contre les coups de pique les ondes de Phlegeton au preux Achille. Quel que soit toutefois c'est aduantage qu'ils pretendent, & quelle la gloire qu'il apporte, essayons vn petit s'il nous reste encore quelque moyen de

leur disputer. Or donques ne diriez vous pas à leur ouyr vanter ceste couuerture de leur teste, que cest des armets d'Argail qu'ils vous parlent, ou de ceux de Mambrin & d'Almont, capables de faire rebondir les Durandals & les flamberges, ou de souffrir sans en estre offencez la cheute des enclumes: Et toutefoiz c'est des morrions de leur chetive peluche qui ne sont pas seulement à preuue de vesardes qu'ils brauent & qu'ils piaffent tant.

Ce sont les testes chauues, les testes descouuertes, les testes exposées aux iniures de l'air, qui sont à l'espreuue des iniures de l'air: ce sont elles qui se moquent des coups du serain, qui mesprisent le courroux de la bise & les brulantes haleines de la Canicule. Car telles testes accoustumées au vent & au Soleil se durcissent de forte, & s'acquierent vne telle fermeté, que degenerans de la nature de l'os, elles prennent à peupres la trempe de l'airain ou du metal plus solide. Il en est des testes comme du coral: lequel est mol & tendre tandis qu'il demeure couuert sous

les ondes de la mer : mais estant mis à l'air il esgale en dureré les cailloux & les roches. Il en est des testes ainsi que de l'ebene : son bois pareillement est mol, il est tendre & peu ferme, comme seroit quelque autre bois, durant qu'il est caché sous l'escorce: mais apresqu'il en est despouillé: il ny a pierre qui se monstre plus dure. l'accomparerois encore ces testes descouuertes aux vases de Megare qu'on pouuoit heurter si rudement, & casser si difficillement si ie ne les auoy desia trop mieux accomparées à l'erain & au fer. Mais s'il ne se trouue point d'argile assez dure, pour estre accomparée aux testes chauues: il ne s'ẽ trouue point de trop molle, pour estre accomparée aux testes cheuelües: & comme les vases Megariens quoy que forts sur tous autres, eussent esté plus fresles que les premieres : ainsi les Samiens ou les Tenediens, quoy que fresles tout outre, eussent esté plus forts que les secõdes. Non sans cause donc si dans Lucian, Thersite se vantant la bas dans les enfers d'estre aussi beau que Niree, & ne luy plus rien deuoir

pour ce respect : il se glorifie par dessus d'auoir la teste bien robuste & ferme : non comme luy, debile & floüet. Or scauõs nous qu'Homere décrit Ther-  
sire comme n'ayant que fort peu de cheueux : au lieu que l'autre estoit le mieux peigné de tous les Grecs.

C'est pour ceste raison que les Egy-  
ptiens representoient toutes les images  
d'Æsculape, non seulement la teste  
plus chauue qu'un pilõ, ou pour mieux  
dire, qu'une estoille : mais encore nuë  
& descouuerte qui estoit vn enseigne-  
ment de ce grand Genie de la medeci-  
ne, que qui desire auoir ceste partie for-  
te & bien robuste, il doit aller de mes-  
me : enseignement qu'en Italie on n'a  
pas du tout bien oublié : ou en plusieurs  
endroits ceste consideration faict aller  
l'enfance descouuerte : Aussi est-ce vn  
peuple heritier & du pays & du nom  
de ces fameux guerriers, qui pour se  
rendre capables d'assujettir le monde,  
autant que toute autre nation se tes-  
moignoient soigneux de pratiquer ce  
remede. Car combien rarement les  
voyoit on couuerts ? Les flamines en sa-

crifiant, & vaquant au seruice de leurs Dieux auoyent par religiō la teste couverte és iours des Saturnales, les plus libres iours de la vie, ils portoyent le signe de la liberté, qui estoit le bonnet. És voyages, les plus doüilletz se seruoient de grands chapeaux, qui les couuroyēt du hasle, du vent & de la pluye, quand les serfs estoient appelez à la liberté, on leur mettoit le bonnet sur la teste. Il estoit permis aux vieillards d'en porter: comme encore aux malades: à raison dequoy Ouide dressant son amoureux à faire dextrement le malade; l'instruit entre plusieurs autres points à porter le bonnet. Finalement à la guerre, comme veulent quelques vns, les soldats portoient certains bonnets faiçts de peaux qu'ils nommoient Pannoniques: & que, comme ie pense estoient plustost destinez à soustenir les coups d'espee, que les coups du vent & du Soleil, hors de la on ne voyoit que testes nûes: d'où vient qu'és vieilles statües des Romains, ny es medailles de leurs Empereurs on ne trouue point de testes qui ne soient descouuertes, quelquefois

ils iettoient sur ceste partie vne piece de drap, cousüe au deuant de leur robe, encore dict Varron que la coustume de l'oster & de se defeuler voyant passer vn Magistrat, auoit esté introduite plus pour la santé des vns, que pour l'honneur des autres: c'est à sçauoir, afin qu'en les obligeant à decourir à tous les coups leur teste, elle en deuint de plus dure trempe.

Et si quelque delicat osoit sortir en public le chef couuert de son manteau, cōme il s'en trouuoit aucunes fois d'assez tendrelets: il estoit mōstré au doigt, & peu s'en faut, sifflé d'vn chacun.

Tel estoit vn Mæcenás, qui ne se produisoit presque iamais qu'en cest equipage, fut-ce aux Rostres, fut-ce au theatre ou en tel autre lieu public.

Aussi le sage Senecque disant la dessus assez librement son aduis de luy, ne trouue à qui l'accomparrer qu'aux mimes & aux farceurs.

Mais nostre chauue Mars, de qui nous parlions n'aguere, nostre inuincible Cesar n'estoit pas de ce nombre, lequel (cōme atteste l'Historiē des douze pre-

miers Empereurs) tandis qu'il estoit au camp, quelque temps qu'il fist, ou de pluye ou de Soleil, n'alloit iamais que le chef descouuert: le semblable faisoit âgé de quatre vingts ans ce braue Roy Numide Massinissa. Que dirons nous del'Empereur Seuere, qui marchoit au front de son armee, à pied, la teste nuë, non vne ou deux iournees: mais du leuant au couchant, d'Asie iusqu'à Rome, trauersant au cœur d'hyuer en cest estat & le Taure & les Alpes, c'est à dire les plus hautes montaignes de la terre, pauees de glaçons & de neiges. Disons encor cecy, c'est que dans Homere, si vous exceptez seulement le chapeau de Meritonee, il ne se parle nulle part ny de bonnet ny de chapeau ny d'autre habillement de teste, que de celuy qui la pouuoit couvrir non de froid de la pluie, & du serain: mais du fer des lames, des piques & des iauelots. Qui fait non sans subiect coniecturer à quelques vns, que c'est de l'ancienne Grece que les Romains tirerēt la coustume d'aller la teste nuë: estans trop habilles gens pour ne cognoistre pas, que ce n'est pas en la

courant, mais bien en la descourant qu'il faut la rendre forte. Que si quelques opiniaftres ne se contentent de ce que i'ay dit, & demandent des preuues plus palpables: encore trouuerons nous de quoy payer, renuoyans ces incredules à ce qu'en raconte le Pere de l'histoire Herodote ( ainsi que la remarqué nostre Synese) & à l'experience qu'il dict en auoir faicte luy mesme; s'estant transporté tout expres vers les confins d'Arabie, sur le propre lieu où il s'estoit, longues annees au parauant, donné vne grosse & memorable bataille, entre Cambyfes Roy de Perse & Psammetichus Roy d'Egypte. Ces deux grands Princes faisans leur conte que ce combat seroit la crise de toute la guerre & de leur entiere fortune, & qu'il donneroit à l'un d'eux de quoy faire la part à son compaignon: ils s'acharnerent l'un cōtre l'autre si furieusement & avec tant d'opiniaftreté, qu'à toute peine en fin se peurent ils separer. Or le carnage & la tuerie ayant esté fort grande tant d'une part que d'autre: ceux qui resterent en vie, voyans

qu'il leur seroit impossible d'enleuer les morts & les enseuelir à leur mode, veu le grand nombre de ceux qui estoient tombez en la meslee: ils se contentèrent sans leur rēdre autre deuoir, de trier simplement les Egyptiens d'avec les Medois, & les laisser en c'est estat separez en deux tas: de sorte que du temps du susdict historie, on y voyoit encore deux grands monceaux d'ossements, là des Medes, icy des Egyptiens. Il afferme les auoir veus luy même, & dit de plus, qu'il y fist vne espreuue, qui luy sembla bien digne de remarque. C'est que les testes ou cranes des Medes estoient si foibles & si tendres qu'on les cassoit & perçoit on facilement d'une petite pierre. Au lieu que ceux des Egyptiens estoient si fermes & solides, qu'à peine pouuoit on venir à bout de les rompre à grands coups de massue. Ce qui ne procedoit, à ce qu'il dit, & comme on luy assura: si ce n'est de ce que les Medois auoyent en coustume d'aller la teste couuerte des cheueux & de chapeau: au lieu que les Egyptiens non seulement la portoyent toute rase:

mais

mais aussi descouverte & exposée au Soleil. Quoy plus? ne lisons nous pas d'un certain qui auoit accoustumé de raser la sienne tous les premiers iours de chascque mois, & se faire chaue par art, puis qu'il ne l'estoit de nature: afin de se rendre ceste partie ferme & extraordinairement dure. Cestuy-cy se produisoit d'ordinaire en plein theatre, pour monstrier au peuple quelle estoit la dreté de sa teste. Car il gaignoit ainsi de quoy viure par les essais estranges & merueilleux qu'il en faisoit voir, n'ayant autre mestier ny vacation que celle-la. Il dançoit, il marchoit, il couroit de sa teste, & l'abandonnoit à des sauts incroyables: ce qu'à peine eut osé faire vn autre de ses pieds bien chauffez. Il auoit vn belier dressé de longue main à choquer front à front contre luy: & s'alloient rencontrer l'un l'autre de grand roideur: partant la beste luy secotiant sa teste & son crain de bonne grace. Il n'attaquoit pas seulement le belier: mais encore ces vases de Megare durs au possible, lesquels il mettoit en pieces à coups de teste.

Que diray- ie plus? ceste indomptable  
teste artificiellement chauue deffioit la  
poix boüillante, & souffroit qu'on la  
luy versast dessus. Considérez mainte-  
nant si ceux-là sont bien fondez qui  
nous veulent faire feste de leurs testes  
empeluchees & de leurs beaux cabas-  
sets de duvet: Et iugez encore par ce  
que nous venons de dire, si ce qu'on ra-  
conte du chauue poëte *Æschyle* & du  
genre de sa mort, tient tant soit peu du  
vray semblable. Il auoit esté, disent- ilz,  
aduerty par quelque oracle ou ie ne  
sçay quel deuin, qu'il seroit tué d'un  
coup qui luy viendrait d'en haut. Pour  
rompre ce coup qui luy deuoit rompre  
la teste, il se tenoit d'ordinaire à l'air,  
loing des toits & de tous bastimens.  
Mais le destin, qui ne se peut tromper,  
voulant executer son arrest, se sert à  
c'est effect du miniftère d'un aigle qui  
d'auanture auoit empieté vne tortue:  
sur laquelle se voulant paistre & n'en  
pouuant casser la coque, il s'esleue bien  
haut en l'air, pour la briser en la iettant  
contre terre. Adonc apperceuant au  
dessus ce poëte qui par mal-heur se

chauffoit au Soleil, & croyant que ce fust quelque caillou tout blanc que de sa teste il luy laisse choir sa proye & l'assomme du coup. Que de façon & d'artifice pour faire manger à l'aigle vne pauvre tortuë & faire assoinmer à la tortue vn pauvre chauue. De moy ie ne croiray iamais quel'aigle ayteu l'honneur d'estre employé aux amoureux mysteres de Iupiter, ny que ce fust à luy qu'il donna la commission d'enleuer Ganymede: puis qu'il est mal à droict de ne sçauoir pas iouyr du noyan d'vn tel fruit sans en casser la coque. Mais commēt est il possible que cestuy-cy si grossier, qui cependant eust bien l'adresse de si bien ainstler son coup, & trouuer de si haut ceste petite teste malheureuse: que ie ne sçay si Diane mesme & son frere Apollon, qui sont si bons archers ne s'y fussent point mescontez. Mais certes l'aduifement de c'est oiseau s'estend bien plus auant que cela: & ceux qui luy font iouir ce rôle ne sçauent pas bien l'histoire: ou s'ils le sçauent malicieusement & en haine des chauues ils tachent de la déguiser.

Ce ne fut rien moins qu'une tortue  
quel'aigle lascha sur la teste venerable  
du vieillard. Trop mieux ce genereux  
Roy des oiseaux, escuyer du Tonnant,  
portant vn iour la foudre à son maistre  
comme à tire d'aisle s'esleuoit au  
Ciel: voulant ietter vn coup d'œil vers  
la terre, il rencōtre l'esclat de ceste te-  
ste reluisāte, qui luy esblouyt les yeux  
de telle sorte (ces yeux qui neantmoins  
sans siller soustenoyent les brillantes  
lumieres du soleil) que tout esperdu, il  
laisse choir la foudre, laquelle par ha-  
zard rencontre & fracasse tout ensem-  
ble la cause de ce desordre: voulant vn  
destin fauorable à l'honneur de ce  
fameux & chauue Poëte, que puis que  
son aage luy faisoit aussi bien toucher  
les bords du tombeau: tout vieux &  
cassé d'années il eut encore ceste gloi-  
re de voir sa teste rompuë du mesme  
trait, qui ne daigne guere descendre  
que pour la rōpre au superbe Cauca-  
se & aux orgueilleux monts d'Epire.  
Si donc le corps est si peu redeuable  
aux cheueux, sera-cel'esprit qui leur  
deura quelque chose, & s'ils ne seruēt

ny d'ornement de remparement à ce-  
luy-là: fourniront ils ou l'un ou l'au-  
tre, ou tous les deux ensemble à ce-  
luy-ci. Certes c'est de vertus non de  
cheueux que l'esprit s'embellit & se  
pare. C'est de vertus encore non de  
cheueux qu'il se rempare & se munit,  
& de demãder si les cheueux sont des  
vertus, seroit vne question autant pro-  
pre à faire rire comme de soustenir  
qu'ils peuuent du moins en estre des  
signes & des marques, seroit vn signe  
& vne marque expresse d'un qui au-  
roit enuie de mōstrer, non pas les ver-  
tus par les cheueux de sa teste, mais la  
folie de sa teste par l'opinion qu'il au-  
roit des cheueux. Mais de quelles ver-  
tus seroyent ils bien la marque? le se-  
royent-ils de la sagesse, du bon sens, &  
de la prudence? & comment le seroyēt  
ils, puis que l'experience nous fait voir  
tous les iours, que le sēs nous arriue au  
mesme tēps que les cheueux s'en vōt.  
Que pensez vous aussi que ç'ayt esté  
d'un Ianus à double front, de la sages-  
se duquel les anciens nous font tant  
d'estime? c'estoit vn persōnage singu-

lieremēt chauue, & de qui la teste n'estoit que de front au dehors, & prudēce au dedans. Auquel propos il me semble encore auoir leu quelque part, que les sages prestres d'Egypte auoiēt fort habilement choisi le Cormoran oiseau à la teste rase, pour le hieroglyphe de la sagesse : que si d'adventure ma memoire me trompe en disant qu'ils le firent, ie m'asseure que mon iugement ne me trompe pas, en soutenant qu'ils le deuoyent faire, conclusion quant à ce point. Tant s'en faut que les cheueux nous marquent la sagesse: qu'au contraire ie maintiens, que si Horace auoit raison d'appeller la barbe sage, à cause des Philosophes professans la sagesse qui de son temps la nourrissoient: nous en auons encore d'aduantage d'appeller la cheuelure folle, à raison des folles mœurs de ceux qui maintenant la nourrissent, & peut-on dire avec toute assurance, que si, (comme les Naturalistes remarquēt), les aueugles des yeux du corps, du moins aueugles de naissance, ne deuiennent iamais chauues: tout au

contraire , les clairuoyans des yeux  
del'esprit , le sont presque tousiours.  
S'ils ne sont marquès de la sagesse ny  
de la prudēce, le seront-ils de la conti-  
nēce, nous auons vuidé ce point il y a  
long tēps: & quoy qu'en passant, fait  
voir assez clairemēt qu'il ny a pire pe-  
ste pour l'honneur des dames que les  
mœurs & les desseings des cheuelus  
muguets: & donc quoy? seront ils vn  
signal de vaillance? nous auons aussi  
prouué le contraire & qu'il ny a rien  
qui moins conuienne à la teste d'un  
guerrier que le poil. Nous nous som-  
mes assez estendus pour faire voir que  
les plus grands Capitaines & les plus  
braues guerriers ont esté chauues ou  
l'eussent voulu estre: que les plus vail-  
lant de tous, l'honneur & la gloire de  
tous, le fut & le voulut estre: & que Ly-  
corgue refusoit qui au lieu, de faire ou  
de desirer des soldats chauues, obli-  
geoit les siens à porter des cheueux.  
Or bien qu'il soit ainsi, si ne veux-je  
pourtant trop opiniaistrement debat-  
tre, que le poil ne designe iamais vne  
ame courageuse. I'auoieray qu'il le

peut & le fait quelquefois. Mais ce n'est pas ce iouët du vent, ce plumail de vanité, dont les testes effeminées communement s'empanachent. C'est celuy seulement qui prouient en l'offec & en la sentine du corps par où les plus sales excrements se deschargent. S'il faut consulter les poils: s'il faut apprendre d'eux quels sont les vaillants & les braues: quels les poltrons & les lasches: cest par ce trou & à ceux de se trou qu'il en faut aller demander des nouuelles. Cest là le temple & le siege de leur oracle, & il ny a poil en ces obscures forests que si vous l'escoutez des yeux, inspiré du vent qui l'agite il ne vous parle aussi clair que le faisoient au temps passé les chesnes de Dodone ou les roseaux de Lydie. Car en quiconque vous trouuerez cette grotte bien ombragée de ce branchage: concluez aussi-tost (si non necessairement du moins probablement) que la personne a du cœur pour sa prouision, & qu'il seroit grandement perilleux de luy tirer la moustache: tout ainsi que du rebours vous pouuez inferer le re-

bours, & la raison de ce secret n'est pas trop difficile à trouuer: car pour ce que le poil de la teste est la parure de la mollesse: tout autant que nature le plus qu'elle peut se haste d'en desgar- nir les fronts des hommes genereux, autant de soing prend elle de leur en peupler ceste sale partie: pour donner cognoissance combien l'eneruée lacheté est par eux mesprisée, puis que si honteusement ils logent sa liurée: tes- moignans parlà quils aimēt à traicter vne dame si laide, ne plus ne moins qu'un dedaigneux amant traicteroit sa maistresse: quand pour luy faire un sanglant affront & rompre pour un bon coup avec elle il attacheroit au fouler la faueur dont elle luy auroit esté liberale. Et comme ils semblent imiter cest amant: ainsi nature semble elle imiter en eux un peintre iudicieux qui nous representant un guerrier in- uincible, dont le braue courage ne mesprise pas moins les charmes de la volupté & les appas des delices, qu'il cherit les hazards guerriers & l'hor- reur des combats: ne se contente pas

de luy mettre les palmes sur la teste, mais il luy met encore les myrthes sous les pieds. I'ay bien dit autre part que la mesme nature a mis le poil sous les pieds de quelques bestes les plus timides: mais ayāt aussi dit quel en est le deffaing: ie ne dois aduoüer ny son humeur ny mon discours coupables d'incōstance: or quelque raisō qui me fauorise, il se trouuera quelqu'un qui fera le retif à croire à ceste marque: & soudain qu'il cognoistra quelque cœur vigoureux la curiosité pour esprouuer mon dire, tachera que ses propres yeux s'en rendēt les tesmoins. Mais qu'il mette hardiment le nez par tout, d'ores & desja iel'y conue. Il me suffira quant à moy de fortifier mon dire par vn exemple bien remarquable, qui sera celuy d'Hercule. Ne sçauons nous pas comme on escrit de luy, qu'il auoit ceste partie si peuplée de gros poil rude & noir qu'il en fut des Poëtes Grecs surnommé Melampygos, c'est à dire pour parler bon François, le cul noir. Le conte des Cercopes est bien commun mais ceste place

le demande. Cestoyēt trois meschans  
garnemens de freres, qui faisoient d'or-  
dinaire mille maux aux passans : tous-  
jours de bon accord entre eux pour  
leur iouir quelque bon tour. Or il ad-  
uint vn iour qu'Hercule passant par là,  
trauailé du chaud & rëcreu du che-  
min, eut enuie de reposer sous vn ar-  
bre, à l'ombre duquel il s'endort, ayant  
pour cheuet la massue terreur des  
monstres & malfaiçteurs de la terre.  
Ces galans l'apperceuant en cet  
estat, complottent aussi tost de se fai-  
sir de ceste arme glorieuse. Mais sur le  
point qu'ils se mettent en deuoir d'e-  
xecuter le complot; voi-cy que le dor-  
meur se resueille, laissant neantmoins  
dormir sa cholere qu'vne si basse  
proye ne meritoit pas d'esmouuoir. Il  
empoigne pourtant tous trois les pe-  
tits bandoliers, & les ayant à guise de  
lapereaux, attachés par les pieds, il  
vous les pend à la massue qu'ils auoient  
osé desirer : chargeant sa forte espaule  
de ce petit fardeau, en telle forte qu'à  
chaque pas que faisoit ce grand Co-  
losse Demidieu, ils luy battoient du

visage s<sup>o</sup> derriere: & trouuās & du nez & des yeux au milieu des deux grosses fesses, comme entre deux releuées montagnes, vne large & beante foudriere horrible de tenebres: vne soudaine peur leur glaçant le sang & les esprits, ils cuidoyent bien estre desja iusqu'aux oreilles dans c'est antre effroyable, ou la fabuleuse antiquité a dressé la couche du terrible geant Typhon, mesmemēt lors qu'ils auoyent les oreilles rompues des grondemens des tonneres, qui sortoient assez frequents du fond de cest abisme, & se multiplioyent en Echos espouuentables, dés quils venoyent à donner au trauers de ces forests velües, ne plus ne moins que du fond de l'antre on oyoit avec estonnement sortir le son esclattant des cimbales. Adonc se ressouuiennent ils des sages remonstrances de leur mere, qui remplie d'un esprit prophetique, voyant leurs mauuais deportemens, les admonestoit assez souuent qu'ils se donnassent garde de tomber entre les mains du Melampyge, prophetie dont ils esprouuoient

alors l'accomplissement bien sensible. Ainsi s'entredifans les vns aux autres tous tremblans & à baillè notte, que leur mere leur auoit bien sceu predire leur infortune, s'ils eussent esté aussi sages pour en faire leur profit, qu'elle leur auoit esté veritable, Hercule qui les entr'ouit s'en prit à rire si fort, que de grand plaisir il les laisse aller en liberté sans leur faire autremal.

Qu'auons nous à faire de rouler par les autres vertus? nous ne trouuerons si ce n'est qu'il en va de mesme que de celles que ie vien de dire, & que tant s'en faut que les cheveux en soyent des marques que tout au contraire ils ne font en couurant les testes, que decouurir les vices contraires à ces vertus. De sorte que nous pouons bien dire avec raison, que ne plus ne moins qu'entre les anciens Iuifs, le souuerain pontife pour cognoistre la lepre corporelle, & en distinguer les especes, estoit obligé à prendre garde exactement au poil: pour cognoistre mesme de la vanité, la folie l'incontinence, l'orgueil, la presumption, & tant

d'autres vices, qui sont la lepre del'a-  
me, trop plus dangereuse que n'est  
celle du corps, il ne faut que prendre  
garde aux cheueux & au soing delicat  
qui s'employe apres eux osant pro-  
mettre à quiconque mettra peine de  
s'exercer en ceste pratique, qu'il s'y  
rendra en peu de temps assez habile  
pour y piper & faire des merueilles, si  
bien qu'autant de cheueux luy seront  
autant de nets caracteres pour y lire  
les vices d'un chacun, leurs especes &  
leurs degrez, iusques là mesme, qu'il  
sera capable de bastir de toutes les ob-  
seruations vn corps de science solide  
fodée sur des axiomes & theoremes,  
millefois plus asseurez que ceux de la  
Metoposcopia ou de la Chiromance.  
Et pleut à Dieu que les cheueux ne  
fussent que des signes des vices sans  
en estre encore des causes, pour le  
moins en font ils bien l'aliment & la  
nourriture, & quoy que les Medecins  
afferment qu'en tout nostre corps il  
n'y a rien de si sec que les poils, que les  
os mesmes leur cedēt en cela, lesquels  
à ce que dit vn grand Philosophe, peu-

nent encore fournir quelque peu de nourriture, au lieu que les poils ne fauroient seulement pas estre alterez, ie ne sçay pourtant si ie dois croire qu'ils ayent si peu de suc qu'on dit puis que ie voy tous les iours la folie, la vanité, la superbe & l'orgueil en prendre vie, nourriture & accroissement. Mais moy qui mettois tantost au iour les cruantez de ces poils qui ne commettent le mal que dans le corps & sous la peau, comme s'ils auoyent encore quelque honte de leurs meschancetez, comment suis-ie si paresseux à dire du moins quelque mot en passât, des malefices, que ceux que i'ay pris formellement à parties, les odieux & detestables cheueux, exercent sans vergogne au dehors à descouuert? Ces poils qui naissent au dedans du corps sont à la verité d'une peruerse nature. Ils sont vrayment bien laches en leur cruauté, de n'attaquer que les petits enfans innocens & foibles. Mais comme ils ne s'en prennent qu'aux enfans, aussi ne sont leurs cruantez que ieux d'enfans, si on les accompare aux fu-

reurs de ces monstres qui des testes auant, comme d'un donjeon occupé de brigands se licentient de faire tant de rauages sur tout le corps humain. Si ie les calomnie en les faisant si grans maistres en l'art de bourreler, vous l'apprendrez maintenant par vn seul trait, car afin que ie taife à tant d'autres maladies qui sont nos peines & leurs crimes, il m'est assez d'entre tout le gros, d'en trier vne seule, mais vne si terrible, & si espouuentable, qu'il n'y a cheueu d'homme du monde, quoy que meschant, en fin quoy que cheueu, qui au seul recit ne se dresse incōtinent d'horreur. Ce fleau du ciel, par les Medecins modernes est d'un mot Latin appellé *Plica*, comme qui diroit entortillement, pour ce que lors que ces borreaux ont conclu le desseing de faire à nostre corps vn traitement si barbare, ils se crespent du commencement, puis tost apres s'estans dressés ils s'entortillent & entrelassent les vns dās les autres d'un nœud si embrouillé qu'il n'y a homme qui les sceût demesler. O nœud funeste, ô nœud trop execrable

execrable qui promet, non comme le nœud Herculien de iadis, vne fecondité d'enfans & d'heureuse lignée, mais vne fertile moisson de tourmens & de geines insupportables. Vous diriez à voir ces tortis repliez, que ce sont autāt de serpens hideux & ie pēse qu'il ny auroit pas grād mesconte à le croire, car mesme si vous les poignez d'une aiguille, il en sort du sang, voire du venin mille fois plus pestilent que ceste escume que le chien d'enfer iettoit de ses trois gueules, quand premier Hercule le traina voir. nostre iour. Ainsi ces miserables patiens se presentās à vous, comme de vifs portraits des Furies; ou cōme des Gorgones cheueluēs de coleures sanglantes: vous impriment en l'ame vne horreur de leur effroyable aspect au lieu de la pitié que leurs tourmens y deuroient imprimer. Inuētion plus que diabolique de ces vipereaux imitateurs du Tyran qui rostissoit dans vn Toreau d'airain les mal-heureux que sa cruauté luy demandoit, afin qu'au milieu de leurs peines plus sensibles,

ils iertaſſent des mugiffemens non des plaintes , tant ce tigre craignoit ce qu'il auoit ſi peu de ſujet de craindre, ceſt que leurs criſ pitoyables ne fiſſent naiſtre quelque tige de compaſſion dās vne ame qui en eſtoit ſi ſterile, bref ces entrelas ne ſont qu'autant de cōplots des cheueux , leſquels comme ſi chacun à part n'auoit pas aſſez de venin pour affliger le corps, peſſe meſle tout ce qu'ils en poſſedent de plus mortel , & en font vn extrait ou vne quinteſſence qu'ils ſoufflent & haleinent par tous les membres; & lors, outre les bataillons des poux qui forment continuellement ſur les teſtes, & qui ſe multiplient plus on met peine à les diminuer, il n'eſt oſtant ſoit il dur ou maſſif qui ne rompe, vertebre qui ne craque, ioincture qui ne lache, nerf, veine, ny tendō qui ne s'eſtonne, ſi vous entreprennez de combattre la violence du mal par les remedes que l'art peut fournir ou le ſoing de voſtre ſoulagement procurer, vous ne faites qu'empirer voſtre marché. L'ennemi plus cruel que magnanime , & plus

fort que genereux, n'a pas l'humeur si noble, qu'il aime à pardonner aux humbles, & se contente de dompter les rebelles. Si l'on cede à sa fureur, elle suit son aduantage, si on luy fait teste, elle s'aigrit & s'irrite, s'offençant que la foiblesse de l'art ose opposer des digues aux torrés de sa rage desbordée, & tel pour auoir comme vn Alexandre coupé ces noeuds fataux & s'estre rasé la teste, au lieu du relache qu'il cherchoit, a payé la brauade qu'il auoit faicte à son mal par la perte de sa veüe. Les membres veulēt fuir deuant vn fleau si terrible, mais ne pouuans rompre les liens qui les retiennent, ils fuyent les vns dans les autres, voire pour se sauuer ils se iettent dans eux mesmes. C'est pourquoy vous ne voyez que bosses, eslochemens, distortions, renuersemens & confusions en toutes les parties, qui se râtassent & recueillent pour aller, [ mais helas en vain ] chercher dans leur propre centre, quelque azyle sacré, que la douleur respecte, ou quelque noir cachot qu'elle ne sache trouuer.

Ceste peste n'afflige point encore que les seuls nourriçons de la Pologne. Mais croyez vous quelle plante de si estroites bornes à son ambitio<sup>n</sup> : ce qu'elle sçait faire monstre bien qu'elle a la force & le courage de s'en venir attaquer & nous & nos voisins. Elle n'a pas tant de chemin à faire que la galle de Ven<sup>9</sup>, qui toute molle, toute doüillette & effeminee, a bien eu le cœur de quitter le delicieux air de sa naissance, pour venir dompter nostre monde, & principalemēt les belliqueux & cheuelus François. Je la voyia, ce me semble, horrible & espouventable, qui comme vn autre Atē aux pieds de fer, marche sur tāt de testes bien peignees, le fertile sujet de ses conquestes glorieuses. O trois & quatre fois bien heurieuses alors les testes chauues que ceste Dire d'ēfer n'oseroit offenser, trois & quatre fois bien fortunées les testes lises à qui ceste Furie ne sçauroit faire mal, ce sera sur le sommet de ces mōts de franchise que se plantera le fortuné Genie des chauues pour contempler  
à son aise la vengeance que le ciel pre-

pare à l'orgueil des cheuelus : non autrement que du sommet du mont Ida, Iupiter contemploit la meslée des Troyens & des Grecs. Voire il en iroit ainsi, si le Genie des Chauues estoit vindicatif : & si la cruauté n'appartenoit trop mieux aux tigres aux Ours & autres animaux que l'abondance du poil des-honore : qu'à ceux en qui le defaut de cest excremēt descouure l'humanité.

Mais quel besoing est-il d'aller querir vers le Nord ces tourmens espouuentables, si ceux qui les font sont desja sur vos testes ? que s'ils vous ont iusqu'icy laissez en repos c'est quelque intelligence fauorable dont ils redoutent le pouuoir, qui vous a preseruez & qui tient en bride leur fureur. Comment sans vne telle assistance ces petits demons de malice vous esparagneroiēt ils, quand il ne leur suffit pas du mal qu'ils peuuent faire, s'ils ne desbauchēt encore la fidelité de leurs voisins ? Car si de tant de poils qui tiennent le dehors de nos corps, il n'y a que ceux de la teste & ceux des paupieres qui se

rendēt criminels, qui doute que ceux-cy n'attirent de la contagion du voisinage, la reuolte & l'infidelité. Ceux-cy, dis-je, qui n'ayans à ce qu'on dit, esté posez en c'est endroit si ce n'est pour estre les garde-corps des yeux, se lachent quelquefois à de si malicieux caprices, qu'au lieu de se tenir dans leur deuoir, se replians au dedans, tournent leurs pointes affilees contre ces freres jumeaux, & semblables à ces traistres *Argyraspides* qui liurerent leur Capitaine à son ennem y, ces desloyaux satellites liurent de mesme leurs Roys couronnez de rayons & de flammes à la discretion de la douleur. C'este Phalange de poils infidelles qui sont ensemble les piquiers & les piques, ne se contente pas d'estre toute seule coupable de ce crime de felonie: mais elle vient telle fois à doubler ses files, se ioignant à d'autres complices, qui sortent tout à coup du bord des paupieres, engendrez de ie ne sçay quelle humeur bastarde, meschante mere de si meschans enfans. Voila le traictement qu'ils font aux yeux. Il est vray que sans

cela, ceste noble parcelle estoit subje-  
ctée à trop peu de maux , puis que les  
Medecins ne content que cent treize  
maladies dont elle est attaquée. Mais  
possible respectent ils du moins les Da-  
mes & les doux charmes de leurs œilla-  
des. Le dois-je croire si j'ay veu les plus  
beaux yeux de la terre miserablement  
affligez par ceste race desloyalle , si ie  
leur ay veu tremper ces serpenteaux  
de larmes, qui eussent amolli le cœur  
d'un Scythe, & ces Barbares ne s'amol-  
lissoient pas. J'ay veu ce miserable spe-  
ctacle , & j'ay veu, qui plus est, amour  
dans ces beaux yeux où il auoit son  
throne, craindre pour sa majesté mes-  
me, & fremir tout ensemble de rage &  
de douleur, de ne pouuoir dōner quel-  
que remede à ce desordre, voyant à sa  
barbe ces Anges de rebellion entrer à  
pointe de lance dans le Paradis de sa  
gloire & forcer son Empire. Ceste in-  
dignité seule ne deuroit elle pas me  
rendre les Dames fauorables , & leur  
donner de la passion à prendre le parti  
des Chauues, non moins qu'à detester  
le poil, puis que c'est le poil qui atta-

que en elles , ces precieux magasins de regards amoureux, ces riches arsenaux ou se conseruent les inuincibles armes qui leur conqueſtent l'empire de tant d'ames releuées , & d'où ſortent les viues flammes qui bruſlent pour vi-ctimes de leurs autels , tant de cœurs genereux. Mais j'ay beau haranguer, ie voy bien que ie ne dois attendre d'elles ny grace , ny faueur , ny me promettre qu'avec moy elles ſe portent-au meſpris des cheueux. La peine qu'elles prennent à bien tenir les leurs, à les poudrer, parfumer & friſer, à les creſpillonner les tordre, treſſer & anneler, & bref à les geiner par trop d'amour qu'elles leur portent & à les contraindre en mille façons, tout cela monſtre aſſez combiẽ elles ſe plaiſent d'eſtre cheueluës, & combien encore elles aiment les cheuelus. Elles ont ſi peu de fineſſe qu'elles croyent à tout ce que leur babillent leurs charlatans amoureux, qui leur chantent que leurs blondes treſſes ſont les priſons & les fers des cœurs les plus rebelles, que leurs creſpes deliecs ſont les rez ou s'attappe la

liberté des ames le plus fines, que ce n'est que pour leurs cordōs retors que les Zephyrs souspirent, & que c'est dedans ces subtils nœuds de foye qu'Amour se trouue pris luy mesme. Elles auallēt plus doux que miel de leurs oreilles charmées le breuuage empoisonné de ces caiolleries, & s'enyurēt si bien de la bōne opiniō d'elles mesmes qu'elles cōmanderoyēt à leur vanité d'aller attacher dans le ciel leurs beaux cheueux dorez aupres de ceux de Berenice, si la mesme vanité ne leur auoit desja fait croire, que c'est biē plus de gloire à leurs cheueux de loger sur leur teste que dās le Ciel, ou bien possible elles pretendent que c'est aux astres de descendre vers leurs cheueux, que la iustice les y oblige, que la raison en a donné vn arrest, lequel (en attendant qu'ils s'execute tout de bō) elles executent cependant en effigie, mettans en la place de ses flambeaux celestes tant de riches brillans, imitateurs de leur immortelle lumiere. Ces brillans sont bien souuent l'amorce dont elles appastent beaucoup d'espris foibles, qui

se laissent esblouyr à leur esclat: ainsi la grenoüille de mer porte au bout de ie ne sçay quels poils que nature luy a mis à la teste, les appas avec quoy elle attire sa proye. Tant y a qu'elles sont bien loing de leur conte, & qu'il en va de leurs cheueux bien autrement qu'elles ne pensent. Je sçay que si elles escoutent Apulée, il leur dira qu'une femme de qui la teste seroit despoüillée de cheueux, quand ce seroit la mesme Venus ne faisant que de naistre de l'escume marine, accompagnée de tout le chœur des graces & des petits amours, ceinte de son ceston, toute respirante le cinamome & distillante le baume, elle ne sçauroit pas mesme agréer à son boiteux. Faut il trouuer estrange qu'un maistre sorcier metre à si haut pris des instrumens si remarquables de forcelerie? Mais si elles aiment mieux escouter les vrayz & les diuins Oracles, elles apprendront que tant s'en faut que ce beau meuble les doiue enfler d'orgueil, qu'au rebours il ne leur a esté donné que pour marquer la subjection & l'hommage qu'elles doiuent aux hom.

mes. Dequoy ce semble les payens mesmes ont eu quelques sentiments, puis qu'à l'affranchissement de leurs esclaves ils leur rasoient la te-ste, pour signifier qu'en leur ostât leurs cheueux, ils leurs rendoyent leur premiere liberté. Et peut estre est-ce la cause pourquoy nature n'ose contre ceste diuine loy se dispenser à mettre à bas és femmes ceste enseigne de submission, deffendant mesme aux ans & à la vieillesse d'y toucher : car raremēt, ou du tout point void on des femmes chauues, non plus que d'Eunuques; nature les traitant en cela de mesme les femmes, non pour les obliger, mais bien pour faire voir qu'elle ne les iuge plus dignes du rang des hommes masculles, à qui seuls d'entre les animaux elle concede en propre de deuenir chauues. Nous ne pretēdōs pas dōc qu'elles se coupent les cheueux, puis qu'ils ne leur ont esté dōnez que pour leur faire souuenir que c'est aux hommes que le vouloir du ciel a soumis leur sexe. Nous trouuons au contraire mauuais qu'elles se les couppent si librement,

nō pas, ainsi qu'autrefois les Dames de Carthage pour fournir des cordages à tendre les arcs & machines de guerre contre les ennemis assaillans leur ville; mais pour les donner à ceux mesmes qui tendent bien d'autres engins contre elles, pour emporter ce qu'elles font profession de tenir plus cher que leur pays ny leur propre vie. Encore le plus souuent prodiguent elles ces faueurs à ceux qui en font le moins dignes. Aussi leur en prend il de mesme qu'aux ieunes poutres, la magnanime fierté desquelles ne leur pouuant permettre de se soubmettre à l'Asne animal abject & leur inferieur, elles reiettent d'un genereux dedain les importunités de ce poursuivant iusques à tant, ce disent les Auteurs, qu'on se soit aduisé de leur tondre & abbatre le crin pour leur abatre l'orgueil & leur faire souffrir l'estalon qu'elles auoyent tant dedaigné. Or qu'elles facent bon marché de leurs cheueux, qu'elles les donnent, les vendent, ou les engagent, ce n'est pas vne affaire qui nous importe tant: seulement ie prieray volontiers

celles à qui les chauues desagrément, ces belles qui ne veulent point d'eux, mais qui les reiettent & mesprisent, de se guerir meshuy d'une si mauuaise humeur. Auray-ie assez d'effrôterie pour leur dire vne parole libre, mais vne verité. Il ne leur sied pas bien de dedaigner les testes rases, puis que la partie qu'elles aiment le mieux en l'homme, & qui leur verse tout le Nectar qu'elles goustent en terre, a la teste sans poil. Je les prieray encore que lors qu'elles verro nt vn chauue, elles considerēt, que nature pourroit bien auoir reparé ceste tare [ si elles veulent qu'estre chauue soit vne tare ] par quelque qualité plus excellente & plus à desirer. L'Autruche na point de plumes sur la teste, & toutefois à la queue elle en a d'assez belles pour se faire estimer.

Mais si les Dames me sont contraires, que doy-ie croire de ces beaux fils qui ont voüé leur ieune perruque, non pas au fleuve de leur pays, comme Achille allant deuant Troye, mais à la bonne Fortune, de leurs amoureuses aduanures, ces mignons desquels

parle Seneque, qui tousiours occupez entre le miroir & le peigne, se faschent beaucoup moins du trouble de la Re. publique que du desordre de leurs cheueux meslez. Il m'est aduis que ie les oy s'entremander les vns aux autres avec des haussebecs de mespris, Mais d'où nous est venu ce babillard ennuyeux qui va faisant des discours à perte d'haleine sur vn cheueu ? Qui nous vient faire feste de ceste testes dégradées, & qui lanternier qu'il est, trouue bien encore dans son cerueau phantasque assez de ressemblance entre ces beaux chauues, & ie ne sçay quelles lanternes moïsiées du vieux temps ? Je croy qu'au lieu de plume il s'est serui à escrire son bel œuvre de l'aiguillon d'un Scorpiō : puis que comme luy, de toutes les parties de nostre corps ~~elle~~ ne perce ny n'entaine que les seules garnies de poil, le venin de sa mesdisance espargnant les pelées. Il mesle le ciel avec la terre pour auoir dequoy descrier les cheueux : & toutefois quād bien on luy donneroît gain de cause, à quel propos blasmer ceux à qui nature

en a esté liberale, les accusant de les idolatrer plustost que les cherir? N'est-ce pas en luy vne insigne impudence? qui les prise? qui les estime? qui les idole? si ce n'est luy mesme & les semblables? Les effects ne dement-ils point ses paroles? les cheuelus coupent & jettent leurs cheueux, les chauues les acheptent. Dequoy viuent ie vous prie Messieurs les Chauues, tant de perruquiers en France que du rebut de nos testes qu'ils changent à l'argent de vos bourses. C'est assez pour vn coup, Messieurs les Cheuelus, n'en dites pas davantage. Je vous aduoüe qu'il y a des chauues qui acheptent les cheueux, mais ie n'auoüe pas pourtant que vous ayez sur eux la prise que vous pensez, ny que ce trafic les mette à la portée de vos censures. Ils seroyent vraiment bien censurables, s'ils acheptoyent le poil pour l'opinion d'en deuenir plus beaux & de meilleure mine. Alors pourroyent ils dire en monstrant la calotté ce que disoit Pericles monstrant à ceux qui le visitoient au fort de sa derniere maladie, les billets que les Da-

mes auoyent attachez à ses bras ? vous voyez mes amis, si ie suis mal, puis que ie souffre telles choses. Les chauués en bonne foy seroyent bien malades d'esprit, s'ils se coiffoyēt à ce dessein: mais ils n'ont pas si peu de iugement ny de suffisance, qu'ils ne sçachent bien & ne considerent que la beauté n'est qu'un r'apport de lignes biē proportionnées & un propre meſlange de couleurs: & que par conſequent elle ſe paſſe bien du poil. Ils ſçauent que le poil eſt produit pour embellir nos corps, ſi la ſuye eſt produitte pour embellir les cheminées: & iugent fort bien que celuy qui croira imparfait quelque autre, s'il ne luy void point de cheueux ſur la teſte, aſſeurement il ſeroit homme encore à croire imparfait le Loure ou l'Eſcurial, s'il ne voyoit point de mouſſe ſur leur toit. Pourquoi donc la calote ? Eſt ce pour ſe couvrir de l'inclemence de l'air ? auſſi peu. Ceſt ſans plus pour ſe mettre à couuert de vos impertinētes railleries, & ſ'accommoder en choſe indifferente à voſtre foibleſſe & à voſtre mauuais gouſt. Il importe peu au

Chaume

Chauue de soubmettre le dehors de sa teste au loix de nostre folie, pourueu que le dedans retienne assez de pertinence pour iuger comme il faut de vostre vanité & du neant de vostre cheuelure. Que ferions nous ? sommes nous pas bien excusables ? chacun de nous ne peut pas estre vn Caton qui mesprisoit iusques là, la folie du peuple badaut, qui sortoit bien souuent en public nudspieds, contre la coustume & la decence, pour s'accoustumer, disoit-il, à n'auoir honte que des seules actions vicieuses. Ie ne reprouue n'y son dire n'y son actiõ : mais aussi ne trouue-je pas de quoy blasmer ceux qui pour l'exterieur se presentent au vulgaire & en ce faisant se sauuent de son importunité. Quant à moy si i'auoys à passer le cours de ma vie avec les Arimaspes, ie seroy bien content de n'auoir qu'vn œil au milieu du front. Si avec les Monosceles ie ne voudroy qu'vne seule iambe, & vn seul pied capable de me mettre à l'ombre. Si ie deuoy viure avec les Astomes, ie voudroy n'auoir point de bouche : & si i'e-

N

stois avec les Blemiens, vn de mes plus  
grands maux seroit, non pas la teste de  
ma femme comme disoit Pittacus de  
foy, mais ma propre teste : & souhaite-  
roys, ou n'en auoir point, ou bien en  
auoir vne telle que les yeux des La-  
mies, pour l'oster & remettre à ma vo-  
lonté, & pouuoir eschapper aux sottes  
moqueries de ces peuples bestiaux.  
Ils diront que i'ay beau raualler les che-  
ueux, cela ne les empesche pas de croi-  
re, que si en mesdisant i'esperoy recou-  
urer ceux que i'ay perdus, ainsi que  
cest Ancien Poëte loüant Helene, re-  
couura la veuë qu'il auoit perduë en la  
blasmant, on m'en orroit bien tost di-  
re autant de bië que i'en ay dit de mal.  
Mais ie leur respondray que ce Poëte  
ne fut iamais si aucugle des yeux du  
corps, que ie le seray de ceux du iuge-  
ment, alors qu'il m'arriuera de faire ce  
qu'ils disent. Bref ils diront que ie fay  
le renard d'Aesope, lequel venant d'a-  
uoir la queue coupée, faisoit merueil-  
les de prescher ses compaignons qu'il  
auoit assemblez, & par viues raisons  
taschoit à leur persuader de couper

chacun la sienne , comme vne partie non seulement inutile , mais encore dommageable , qui les rendant plus lents & plus pesans à la course , les feroit de la proye lors qu'ils vouloyēt prendre , & les donnoit en proye , lors qu'ils vouloyent euitier d'estre pris. Et ierepliqueray , que quand bien ie leur conseilleroiy de mettre bas leurs cheveux , à l'aduanture ne seroit ce pas vn aduistant mesprisable. Les Medecins avec heureux succez les font assez souvent abattre aux testes phrenetiques & que la resuerie tourmente. Tant y a que ce n'est ny mon intention ny mon desir , de faire qu'ils se coupent ou arrachēt les leurs : bien vouldroy-ie qu'ils s'arrachassēt de l'ame la folie , qui leur fait croire qu'ils meritent quelque chose pour auoir des cheveux. Ie vouldroy qu'ils considerassent , que quand mesme semblables à des Sansons , des Nises & des Horriles , ils y porteroiyēt attaché leur destin , leur fortune , leur vie & leur grandeur , comme ils y ont attaché leur vanité , leur superbe , leur arrogance & leur orgueil : encore se-

royent ils dignes ou de risée , ou de pitié , ou de tous les deux ensemble , de faire estime d'un fueïllage , que l'iniure des ans abbat si facilement , & dont la cheute bien souuent , non seulement deuāce l'Automne de la vie : mais mesme apres auoir perdu sa plus aimable couleur , s'esparpille & s'enuole dans le plus verd de nostre âge , comme la fleur du Seneçō au milieu du printēps. C'est le discours où le vouldroy qu'ils entraissent , & s'ils pouuoient par ce moyen eschapper à l'erreur qui les gaste , alors auroient ils plus de subiect de couper leurs cheueux , & de les appendre aux autels en offrande , que n'en auoyent anciennement ceux qui venans d'eschapper du naufrage , se les coupoient pour payer leurs vœux , & les offroyent aux Dieux qu'ils reconnoisloyent auteurs de salut.

**F I N.**

## *Extraict du Priuilege du Roy.*

PAR Grace & Priuilege du Roy, Il est permis à Pierre Billaine de faire imprimer vendre & distribuer un liure intitulé, *Le Chaunc ou le Mespris des Cheueux, &c.* Avec deffense à tous Libraires & Imprimeurs de ce Royaume, de l'Imprimer ou faire Imprimer vendre ne distribuer, autres que de ceux dudit Billaine pendant le temps & espace de six ans, sur les peines portées par ledit Priuilege.

Donné à Paris le dix-huictiesme Iuin, Mil six cens vingt & vn.

Par le Conseil.

RADIGVES.